

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR TENTH SITTING ON TUESDAY, THE 21st FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **PU ZORAMTHANGA**, hon. Chief Minister to lay on the Table of the House a copy each of the following :
 - i) Annual Report of Mizoram Road Fund Board for the Year 2021-2022.
 - ii) 16th Annual Report 2021-2022 1st April 2021-31st March 2022, Right to Information, Mizoram Information Commission.
 - iii) The Mizoram (Election to Sinlung Hills Council) (Amendment) Rules, 2022.
 - iv) The Members of Sinlung Hills Council (Disqualification on Ground of Defection) Rules, 2022.
 - v) Economic Survey of Mizoram (2022-2023)

FINANCIAL BUSINESS

3. General discussion on the Budget for the year 2023-2024 (to be concluded)

LALHMAHRUAIA ZOTE
Commissioner & Secretary

SPEAKER : *Chapona a lo awmin mualphona a lo awm a; Inngaitlawmte hnenah chuan finna a awm.* - Thufingte 11:2

Vawiinah hian Dr. R. Lalthangliana, kan Minister zahawm tak ama enkawl a nutei a boral a, House-ah a rawn kal thei lo a ni.

QUESTIONS & ANSWERS

Zawhna leh Chhanna-ah kan kal nghal ang a Starred Question No. 141- zawt turin Member zahawm tak Pu Zothantluanga ka sawm e.

PU ZOTHANTLUANGA: Pu Speaker, ka lawm e. Ka zawhna chu -
“Mizoram-ah kum 2019-2023 chhungin Health Sub-Centre Quarters sak thar engzat nge awm?” tih a ni e.

SPEAKER : Chhang turin kan sawi tawh ang khan kan Minister zahawm tak hi thihna avangin a lo kal thei lova, amaherawhchu, kan Dan angin Home Minister zahawm tak Pu Lalchamliaana hnenah a authorize a, chhang turin Pu Lalchamliaana kan sawm e.

PU LALCHAMLIANA, MINISTER: Pu Speaker, Member zahawm tak Pu Zothantluanga zawhna chhanna chu –

Mizoramah kum 2019-2023 chhungin health sub-centre quarters 25 (sawmhnih panga) sak thar a ni.

SPEAKER : *Zawhbelhna* zawt turin in phar a, tunhma zawngin minister an awm lovin zawhbelhna kan la ngai lova, amaherawhchu tun term-ah bikah hian ‘zawhbelhna kan la ang’ tiin ka lo puang tawh a. Kan la ang a; member zahawm takte’n a zawhbelh dan erawh chu in chhia leh tha hriatna in hmang dawn nia. *Zawhbelhna* zawt turin a zawhna neitu - Pu Zothantluanga ka sawm e.

PU ZOTHANTLUANGA: Pu Speaker, ka lawm e. Ka zawbelhna chu -

Kan bial Aizawl West-I ah hian health sub-centre la awm lohna khua 6 lai kan nei a, khaw inhlat tak taka sub-centre pan ngai a nih lain, tuna kan sorkar hian duhsak takin health clinic centre awm lohna hmun 6-ah min dahsak a. Hetah hian equipment leh mi in ruak te, school ruak te kan luah a, ‘hemi enkawl chhonzawmna tur atan hian sorkarin hma min lak sak thei ang em?’ tih leh,

Health clinic din anih khan MLA fund atangin equipments te, damdawi te kan lo leisak ve a, bul tanna tur atan. Tin, damdawi bakah thil tul dang danga thuam nghal a ni a, ‘kan hnathawkte hlawh hi engtikah nge pek theih a nih ang?’ tih te a ni e.

SPEAKER : *Zawhbelhna* - Pu Zodintluanga Ralte.

PU ZODINTLUANGA RALTE: Pu Speaker, ka lawm e.

A chhang tura kan Disaster Management Minister zahawm tak a rawn ruat hi ka lawm a, ka zawhbelhna nen hian a inkungkaih viauin ka hria a.

Covid hun lai khan Jordan Centre, khawvela ruihhlo enkawl na tha ber tura kan sak mek hi hman a ni a. Hetah khuan tun thlengin electric bill cheng 2,02,933/- leh tui bill cheng 1,78,276/- lai bat a ni a, a thawktute khu an mangang em em mai a. Anni hi *Grant-in-Aid* type deuha inenkawl anni a, a chang chuan electric leh tui connection tihtawpah te vau an ni a. ‘Hei hi a *health* ang zawng emaw, a *disaster management* ang zawng pawhin a rang lama tihfel sak theih a ni em?’ tih kha Pu Speaker, ka rawn zawt a ni e.

SPEAKER : *Zawhbelhna* - Pu C. Ngunlianchunga.

PU C. NGUNLIANCHUNGA: Pu Speaker, ka lawm e. A changtu minister a awmlo nain, department lam hotute an awm a. Ka zawhbelhna chu –

Lawngpuighat-ah khuan Congress sorkar lai atang tawh khan PHC building sak a ni a, mahse vawiin ni thlengin hawn a ni lova. Khulai khu healthcare chungchangah hian kan buai khawp mai a, Bungtlang South, Chawngte ‘P’ leh Lawngtlai a ni mai a, Parva te, Siminasora khung hla tak takte pan a ni thin a, Lawngpuighat ami hi hawn vat a nih chuan a tangkai hle dawn a. A building sak zawh a ni tawh a, kan Home Minister chuan min chhang thei kher lo ang a, department lam khan hria sela, ‘engtikah nge hawn theih a ni ang; rang lama hawn theih dan a awm ang em?’ tih ka zawt a ni e, Pu Speaker.

SPEAKER : A theih ang ang chhang turin Minister authorized Pu Chama kan sawm ang a, ‘ka chhang thei lo’ a tih pawhin a awm tho e.

PU LALCHAMLIANA, MINISTER: Pu Speaker, ka rinthu in ka chhang vak mai dawn em maw ni aw. *Zawhbelhna* a awm kha a tha ka ti a; tikhan record-ah a awm ang a, a changtu minister te leh department-in an lo enzui turah ka ngai a. Kei chuan zawhbelhna ho kha chu ka chhang lo mai ang e. Ka lawm e.

SPEAKER : Aw le, a lawm awm e.

PU ZORAMTHANGA, CHIEF MINISTER: Pu Speaker, ka lo pui lawk ang chu? (Speaker: Aw le.)

Nichina member zahawm takte health clinic chungchanga an zawhna kha - in te chu kan han sa a, mi in te pawh kan luah a. Amaherawhchu, a hmanrua tur tlema zawng te MLA fund atanga tum te a ni a, 'hengte hi tih zui theih a ni ang em' tih zawhna kha - engpawh ni se bungrua man to a ni chuang lo bawk a, keimahniin kan theih ang-anga MLA fund atanga kan lo puih kha chu a tha a, pui zel ila, hetah sorkar lam pawhin SASCI atangin emaw, a remchang angin kan lo pui ang e.

Tin, Jordan Centre chungchang kha ka hnen a lo thleng hauh lo mai a, thleng sela chuan problem lutuk a ni lova, cheng nuai 2-3 thil a ni a. Kha kha kan lo hria ang a, a rang thei anga pek kan lo tum ang e.

SPEAKER : House Leader, a lawmawm e. Starred Question No. 142 - zawt turin Member zahawm tak Er. H. Lalzirliana ka sawm e.

ER. H. LALZIRLIANA : Pu Speaker, Sports Minister zahawm tak chhan atan ka zawhna -

- a) Tun sorkar chhung hian PMJVK hnuai atangin sports infrastructure tih hmasawna atan sum engzat nge central sorkar atangin sanction approval hmuh a nih tawh?
- b) Mizoram sorkarin District Sports Complex siam tumna a nei em? Khawiah te nge siam tum a nih a, project cost engzat nge?

SPEAKER : A chhang turin a changtu Minister zahawm tak Pu Robert Romawia Royte ka sawm e.

PU ROBERT ROMAWIA ROYTE, MINISTER: Pu Speaker, ka lawm e. Mamit bialtu zahawm tak Er. H. Lalzirliana zawhna chhanna chu -

- a) Tun sorkar chhung hian PMJVK hnuai atangin sports infrastructure tih hmasawna atan central sorkar atangin Sanction approval ₹42,204.67 lakhs hmuh tawh a ni.
- (b) Mizoram sorkarin district sports complex pathum (3) siam turin hma a la mek a, heng hmunah te hian siam a ni ang -
 - 1) District Sports Complex, Lunglei - ₹4,919.31 (Lunglei hi Rahsi Veng-ah leh a then Zobawk Sports Academy lamah te pawh item thenkhat dah a ni).
 - 2) District Sports Complex, Lawngtlai Mampui - ₹5,019.43
 - 3) District Sports Complex, Mamit - ₹4,496.48.

SPEAKER : *Zawhbelhna* - Er. H. Lalzirliana.

ER. H. LALZIRLIANA : Pu Speaker, ka zawhbelhna te -

- i) Mamit District-a PMJVK project atang te hian labour cess leh GST ah Mizoram sorkarin cheng engzatnge hmuh a neih?
- ii) Ka bial chhung RD Block hnuai - Zawlnuam, Kawrtethawveng, West Phaileng RD Block chhungah hian khaw thenkhat (a hming chu sawi vek lo mai ila) ah te hian sports infrastructure PMJVK emaw, State budget emaw leh source dang atangin dah tumna a awm em?
- iii) Mamit District Residential Sports School-ah football ground bik hi Décor India in an thawk niin ka hria a, hei hi engtikah nge hman theiha zawh-fel a nih ang?
- iv) Footballer Miriam Lalnunsiami inhliam enkawlnaa a senso kha sorkarin a pe ta em? Thenkhat ti ti leh sawi thuthang vel ka lo hriat danin, ‘sorkarin hei hi a pe lo, a ngaihsak lo’ ti anga sawi te ka lo hria a; hei hi thil dik a ni reng em?

SPEAKER : *Zawhbelhna* - Pu Zodintluanga Ralte

PU ZODINTLUANGA RALTE: Pu Speaker, ka bial Rangte-ah sawn Rangte Community Service Centre Ni 29.3.2021 khan a sakna tur lungphum phum a ni a; hei, a thlalak te pawh kan nei vek a. Tun kum chhung hian kan Minister zahawm tak hian minrawn tan sak tawh se kan ti a, ‘a rawn tan thei ang em?’ ka ti a nih chu.

SPEAKER : A theih ang ang chhang turin a changtu minister zahawm tak kan sawm ang a.

Thil pakhat ka rawt duh chu - kan House hian number sawi danah hian ‘*nuai sangli, nuai sangnga*’ ti pawl kan awm a, a *maktaduai* a sawi kan awm a, a *vaibelchhia* (crore) a sawi kan awm bawka. Hei hi rual deuha tihdan a awm lo em maw ni le? Vaibelchhe chin hi chu ‘*vaibelchhia* (crore)’ ti ila, tikhan a indawt thla thei dawn a.

Aw le, tunah a changtu Minister zahawm tak ka sawm e.

PU ROBERT ROMAWIA ROYTE, MINISTER: Pu Speaker ka lawm e.

Mamit bialtu MLA zahawm tak Er. H. Lalzirliana zawhbelhna kha - a sawi awl lampang atang hian ti mai ila. GST leh ‘labour cess’ tih lai kha a figure fek-fawka sawi a har deuh dawnin ka ring a. Mamit bialah sports infrastructure - Kawrtethawveng Block hnuai te, Zawlnuam Block hnuai te, W. Phaileng Block hnuai te Mamit MLA bial ni si khaw thenkhatah te hian tih leh tumna a awm em tih kha, ‘Mizoram state budget atang hi chuan kan ti thei lo’ tih kha chiang deuhin ka sawi duh a. A chhan chu, state budget-ah engmah kan nei lova, mahse, scheme dang atangin theih ang-ang chuan kan try ang a. Tin, MLA zahawm tak pawh hi hetiang lama smart tak a ni a, ani pawhin a thiam angin lo try ve turin ka ngen duh nghe nghe a. A chhan chu tunlaih MLA te kan pawimawh em em a, anmahni rawtna atang tein department dang dangah thil a kal thin tih kan hre vek ang a, churang chuan, sports-ah gaps a la tam em em a. A bikin Mamit

District bikah phei chuan MNF sorkar tirh lam phei kha chuan manganthlak khawpin, mi district neih ang nei lovin an awm a. Theih ang ang chuan hma kan han la a, mahse tunah pawh *gaps filling scheme* tam tak a awm tih kan hria a, PMJVK te pawh ‘gaps filling scheme’ a ni tih kan hria a; khatiang zawnga hmalakpuiah ka han sawm let hlauh teh ang. Sports Department atang chuan ‘theihtawpin tan kan la ang’ tih kha ka chhanna ni ta sela.

Tin, Mamit Residential Sports School-a football ground ‘engtika siam zawh tur nge’ tih kha - Ni e, amah pawhin a vei a, a bial tan thahnem a ngai thin a. He football ground tur hi tlang chhipa awm a ni a, thil awl-ai lo tak a ni a; Mamit khaw sir, Mamit khaw chhung ang a ni mai a, khulai Luangpawl ramah khuan sports school tur cheng nuai sangthum leh tih lain sak mek a ni a. Chuta component pawimawh tak pakhat chu football ground a ni a, tunah hnathawh mek a ni a. Kumin chhung hian tawngkama kan engineer-te leh department officer-te ka zawhnaah chuan, ‘kumin chhung hian an zo hman turah kan ngai’ an ti a, mahse a work order-ah chuan nakum lama zawh tur niin ka hria a, a chhan chu project dang lian tak tak a ken tel avangin.

Tin, Miriami chungchang kha he House ngeiah pawh Serchhip bialtu zahawm tak Pu Lalduhoma, Opposition Group Leader ni bawk khan a rawn sawichhuak a; Miriami sorkarin tanpuina la pe lo ang deuh a sawichhuahna he House-ah hian a awmin ka hria a. Miriam Lalnunsiami hi, Mizoram State Sports Council tihdan phung pangngai a awm a; hetiang tanpui danah hian MFA te dilpuinain nikum December Ni 15, 2022 khan Miriami inhliam tanpuina ₹25,000/- pek a lo ni tawh a, sorkarin pe lo anga sawi kha hriatsual palh anih ka ring a. Tin, Mizoram Olympic Association hi Mizoram sorkar funded association tho a ni a, kei hi a president ka ni nghe nghe a, chuta tang chuan ₹10,000/- kan lo pe tawh a, a inzaina atan pawh khan a hmang tangkai niin kan lo hria a, an mamawh zawng zawng erawh a phuhru lo maithei a. Mahse, Miriam Lalnunsiami hi sorkar anga tih theih dan chin leh tihdan phung pangngai angin association concern in a rawn dilpui thlap angin tanpuina kan lo pe tawh tih kha kan sawi duh a.

PU LALDUHOMA : Pu Speaker, Minister hian Miriami bill kha pe vek angin hmanni khan a insawi a. A tirah ₹10,000/-a kanna Olympic Association atangin pek a ni a, a hnuah ₹25,000/- MFA-in a khawnkhawm a, an pe leh a, “hei hi chu Sports Council atangin bill leh kan tum dawn nia” an ti a; an bill leh bill loh chu ka hre lova, a bill kha ₹60,000/- chuang a ni a, ₹40,000/- chuang kha a thiante’n an thawhkhawm a, Jejea phone atangin gpay in Miriami account-ah hian thunsak a ni. Chutiang chuan a thiante’n an tum sak a ni a, hei hi sorkar tumsak anga sawi talh tur a ni lo.

PU ROBERT ROMAWIA ROYTE, MINISTER: Pu Speaker, Mizoram sorkarin tihdan phung pangngai angin leh Mizoram Football Association recommend ang thlapin Miriam Lalnunsiami hi ₹25,000/- pek a ni a. Mipuite’n eng emaw zawnga an ngaih theih tur anga sawi tur niin ka hre lo, he thil hi. Tin, ‘an senso zawng zawng tumsak’ tih

hi ... (**Pu Lalduhoma:** I sawi a, a bill kha ₹60,000/- chuang a ni a, in pe kim lova; “₹25,000/- chin hi kan pe” ti ve mai la. Pe kim anga insawi talh tur a ni hlei nem)

Pu Speaker, hmanni a sport infrastructure sawiho ni khan tuna Serchhip bialtu MLA zahawm tak Pu Lalduhoma hian sorkarin pe miah lo angin a sawi a, a sensitive a; kan sportsperson ... (**Pu Lalduhoma:** Khatih lai khan an la pe miah lo) ... Ngawi rawh; thudik ka han sawi teh ang, Pu Speaker - Miriam Lalnunsiami hi record-a kan neih dan chuan national games a inhliam a ni. Pu Lalduhoma, Serchhip bialtu zahawm tak khan north-east games a inhliam angin a sawi a kha pawh kha thudik lo a ni; *pakhatna*.

Pahnihna – ‘hmanniah chutiang chuan i sawi’ a tih opposition group leader zahawm takin a rawn sawi kha a pawl ka ti; a thusawi kha nawh reh tlak a ni. A chhan chu - Hmanni khan ka chhang duh lo a ni; he House hi a zahawm a, inchachhuahna chi a ni lovin ka hria a. Lalnunsiami hi kan footballer, kei pawhin ka hriat em em a ni. Sorkarin a inzaina pe lo anga helaia sawi kha amah pawh a rilru a na a, a daw chi a ni a, ‘a mangang lutuk’ tih te pawh sports association hruaitute atangin phone pawh ka dawng nasa a; an coach ngei pawhin min rawn phone a, a hming chu ka sawi lovang a. He House zahawmtakah hian hriat nuam lo zawnga sportsperson te chungchang sawi pawh hi tih fo loh chi tak a ni.

Chuvang chuan, hmanni khan Miriam Lalnunsiami chungchang hi kamkhatmah ka sawi lo. Tunah, ‘chutiang chuan i sawi’ a han tih leh mai ang chi te kha a pawl ka ti. Chuvang chuan, ka hre reng; ka sawi chak khawp a; mahse, kan intimualpho lutuk ang ... (**Pu Lalduhoma:** Nia, ‘sorkarin kan pe’ tih kha sawi a ni.) Kei chuan ka sawi miah lo; Miriami chungchang ka sawi miah lo. Record en leh ila, “khatih lai khan ₹10,000/- chiah a dawng; ₹25000/- kha chu MFA in”

SPEAKER : A nih leh pakhatin, ‘ka sawi lo’ a ti a, pakhatin, ‘i sawi’ a ti a. Proceedings kan en dawn em? A diklo zawkin ngaihdam in dil ang. He House hi diklo a inpuhna tur a ni lo. (**Pu Lalduhoma:** Sawi an awm a lawm.)

PU ROBERT ROMAWIA ROYTE, MINISTER: Heti mai-maia he House-ah hian tawng tawng tur a ni lo. Sports person te hi hetu mai-maia tih tur a ni lo.

PU LALDUHOMA : Tih tur ni lo reng e. ‘an inhliamin in ngaihsak tur a ni’ kan ti a, an thlavang kan hauh zawk a lawm. Dik tak chuan amah pawhin a rawn phone chein ka hria.

PU ROBERT ROMAWIA ROYTE, MINISTER: Min phone miah lo Miriami hian; kan chhui ang. Pu Speaker, enquiry commission din rawh; dawt sawi zawk chu bang rawh se.

PU LALDUHOMA : ₹40,000/- chuang hi sorkarin an pe lo; a thiante thawh-khawm a ni.

PU ROBERT ROMAWIA ROYTE, MINISTER:..... Khalam kha chu thudang daih a ni, Pu Speaker. Serchhip bialtu zahawm tak khan Miriam Lalnunsiami kha

SPEAKER : Awle; tihian ro ka rel ang. He House hi a zahawm a, mipui an zahawm a, thudik lo sawi kan en ang.

Tunah hian ka officer-te, kan Assembly-in prodeedings kan en ang a, Khalai thu inchuh lai tak, 'in' te in inti leh nghal a; hetiang hi nakin zelah pawh mizo mipuite hmuhah tunge dik lo zawk kan en ang; wawiinah kan enchiang hman tur a ni. Awle, chhang zo rawh le.

PU ROBERT ROMAWIA ROYTE, MINISTER: Pu Speaker, Miriami chungchang kha a tawi zawngin ka han khawikhawm tawh ang e; kan House hian chiang taka a hriat pawh a tha.

Mizoram Olympic Association-in ₹10,000/- kan pe a, Mizoram Sports Council-in ₹25,000/-; MFA kaltlangin, MFA Financial Secretary-in seal pawh a rawn chhu thlap a, a receipt te pawh a awm a. Chutiang chuan tanpuina Mizoram sorkarin kan pe a.

Hetiang nikhua hian, he House zahawmtakin kan hriat hrim hrimah, inhliam dan chi hrang hrang a awm thin a, inhliamte mamawh zawng-zawng hi pek vek theih a ni ngai lo. Chuvang chuan, kalphung pangngai tak sorkarin kan zawh thin angin kan pe a ni.

PU VANLALHLANA : Tunah khan 'a pe' a ti a. Olympic Assiciation chu kan hriat angin 'association' a ni a, sorkar a ni chiah lova. Tin, Sports Council pawh autonomy nei a ni a, sorkar a nilo deuh em? Chuvangin, Sports Council-in a pek kha, sorkarin a pek anga ngaih tur em ni?

SPEAKER : *Sorkar* ni thei reng mai; hei hi chu sawi a ngai lo.

PU ROBERT ROMAWIA ROYTE, MINISTER: Mizoram Olympic Association kha chu 'sorkar a ni' ka tihna pawh a ni chiah chuang lova, mahse sorkar funded, sorkar atanga sum dawng a ni a, kan pek pawh kha sorkar sum ngei niin ka hria a, sum source dang kan nei chuang lova. A petu kha chiang zawka he House zahawm takin kan hriat theih nan kan sawi tel a ni a.

Tin, sawichian pawh a hrehawm ang reng a, dik tak chuan. Sports person-te an hming-hmerha he House-a han sawi te, mimal hming te, private company hming te han sawi bawng-bawng hi a hrehawm thin a. Khami ni pawh khan, 'ka chhang ang nge, chhang lo ang aw' ka ti a, ka inngaihtuah a. Sports-lover ka nih ve avangin Miriam Lalnunsiami chungchang kha helaia sawirik loh hram ka tum a, mahse, a chungchang zawhna kha a awm leh takah khan thudik ka rawn sawi ta a nih kha.

Tichuan, Mamit District Sports Complex, Mamit District-a sports infrastructure siamna atan hian Mizoram Sorkarin GST leh labour cess a lakluh zah kha ka sawi mai thei lova, a zawttu kha a hrechiangtu zawk pawh a nih ka ring a. A sawi theih dan zawk chu hetiang hi a ni - GST hi 18% a ni a, chu chu central leh state-in kan insem thin tih kan hria a. Tin, labour cess hi 1% a ni a, chu chu Mamit District-ah nuai ₹10,000 man sports infrastructure-ah Mizoram State Sports Council-in emaw, Mizoram sorkar hnuai - UD&PA emaw, RD Department emaw pawh hi se Mamit District a sports infrastructure siamna zawng zawnga 18% kha sorkarah a lut a. Tin, 1% kha sorkar hnuai LESDE-ah a lut baw k a, hei hi sorkar account-ah a lut lo mai thei a, LESDE hian tihdan phung fel tak a nei a.

PU C. NGUNLIANCHUNGA: Pu Speaker, *Point of Order* - GST leh labour cess kha, sawi ang khan GST kha 18% a ni a, zat leh zat insem tur a nih chuan, 9% kha kan chan tur a nih hmel a. Labour Cess kha 1% a ni a, chuti a nih chuan 10% kan chan tur a ni a. "He project hi 90:10 a nih chuan, state sorkarin SMS ah engzat nge a tum ve?" tih ka zawt e.

PU ROBERT ROMAWIA ROYTE, MINISTER: Pu Speaker, 10% a tum a, churang chuan, Mamit District sports infrastructure siamna zawng zawngah khuan Mizoram sorkarin 10% a lakluh leh tho avangin chengkhat mah a seng lo ang a ni.

Tin, tukinah pawh thildang kan sawinaah Charter Accountant, 'Northeast-ah chuan a thiam ber ang a' an tih Pu Parley Chakraborty pawh ka zawt a, chutah chuan 18% kha chu a minimum a ni a, pek loh theihloh, sorkarin a hmu let lo thei lova. Mahse contractor-te khan kha 18% kha ITC claim lovin a pawisa faia sorkara an chhun chuan cement-ah 28% a ni tih kan hria a, iron rod hi ka hre chiah lova, khang kha cement hralhtute khan sorkara an chhun baw k si chuan Mamit District a sports infrastructure siamtu sorkar khan 28% aia sang percent pawh Mamit District sports infrastructure siamna atang hian a la thei a ni. Tin, 18% aia tam hi chu a la hrim-hrim a. Tin, ITC hi contractor ten an claim vek hman lo tih kha ka sawi duh a. Tikhan a Chiang maiin ka ring a. Nuai sang tam tak chu sorkarah sports infractructure atang hian a hlep hlang a lalut a ni.

Tin, central share pawh kha kan hria a, central-ah a chanve kal mahse *share of taxes* atang sum kan dawng let leh tho tih pawh kha kan hriat vek a tha awm e.

PU C. NGUNLIANCHUNGA: Pu Speaker, khalai tak kha - kan Sports Minister zahawm tak hian “sports infrastructure avangin state sorkar hian pawisa tam tak kan hmuh phah dawn a ni” a tih lai kha; ‘zero’ a nih khan, engtin nge a tum ve tur kha a sawi tel lova, a hmuh tur lai chauh kha a sawi a.

PU ROBERT ROMAWIA ROYTE, MINISTER: Pu Speaker, kawng laih hna ah pawh miin contract a thawk a, cement a lei a, GST a claim leh a, a hmu mai a; khami avang khan ‘PWD a thawk angin pawisa kan hmu dawn’ tihna a ni lova. Miin building a sa a, GST a claim leh a, a hmu let leh a; state sorkarin ‘pawisa kan hmu teuh’ tih lam kha a ni lova.

Funding scheme te pawh kan hmu a, nichinah ka sawi a.... Sorry.

SPEAKER : Nichinah ka sawi a, ‘khalai kha chu kalsan rawh’ ka ti a, khalai kha chu kalsan tur a ni. Opposition lam te pawh insum ve deuh hlek tur. ‘*Thlarau rah chu insum theihna*’ tih te pawh a ni ve tho kha maw. Tawi deuhin han ti rawh aw.

PU ROBERT ROMAWIA ROYTE, MINISTER: Pu Speaker, ka lawm e.

Ni e, sawi tur tam tak a awm thei ang a. PMJVK chauh kha an zawt a, PMJVK lo 100% funding chi kha tam tak a awm a, CSR thlengin; kha khan tax an pe tho a ni.

Pu Zodintluanga Ralte, Thorang bialtu zahawm tak leh opposition group leader zawhna kha a pawimawh ka ti a. Rangte-ah hian a lung ka phum a, a date pawh kha a dik turah ngai ila; a bial a ni a, a hrechiang ang a. Chawngte-a kan kal haw lam khan lehkha an lo pawt parh a, kan phum ve mai kha ni a. Khatih lai khan sanction pawh a awm thlap tawh a, mahse kan hriat angin Covid nasat em em lai kha a ni a. Tin, Finance Deptt-in sum kan duh ang hunah an rawn release zung zung bik lova; kan sorkar kan timualpho ni lo se la, kan hre vek a. Chuvang chuan PMJVK guidelines ah hian a lungphum function hi a khuaa mite, a zar zo tur ten sanction zah te leh a scheme nihphung te an hriat theih nan transparent takin a lung phuma, ceremony te pawh neih tih hi a guidelines-ah chiang takin a inziak a. Chuvang chuan, function lian tak tih theih loh pawhin kan han phum nazen a. Mahse, 1/3 pawh kan phum thei lova; hei hi a scheme kan bawhchhiatna lai tak te pawh a ni awm e.

Tunah chuan an sa mup-mup tawh a, kumin December-ah te hi chuan harsatna tak Covid hrileng leh emaw, hriat lawk loh harsatna a awm a nih loh chuan ‘kan zo thei ang’ tih kha department lam atanga feedback ka dawn dan chu a ni a. Tin, hmun hrang hrangah a ni a, thenkhat chu hawn theiha han peih deuh thuak tawh te pawh a awm a. Establishment lian a ni lova, cheng nuai 100 leh tlem chauh man a ni a, thla 4-5 lek thawh tur te pawh a ni ang. A work order-a ‘zawh hun tur’ a tih aia hmian Rangte

Community Service Center hi kan hawng thei dawn niin ka hria a, ka lawm viau a ni. Pu Speaker, ka lawm e.

SPEAKER : Pu Robert-a hi in ngam si a, a niin a ngam si che u a, a ngaihnaawm thin e.

Tunah Starred Question No. 143 - Dr. ZR Thiamsanga zawt turin ka sawm e.

DR. Z.R. THIAM SANGA: Pu Speaker, ka lawm e.

Boruak a han sosan deuh hlek pawh hian thiam tak maiin Bible chang I han quote a, *Speaker* nih hi chu ilo tling hlein ka hria; ka lawm hle a ni. ‘*Thlarau rah insumtheihna*’ tih i rawn tilang hi a ropui ka ti khawp mai.

Pu Speaker, ka zawhna *pakhatna* hi i remtihnain tlema tihdanglam deuh hlek a ngai a. ‘Champhai-ah hian online hmanga electric bill pek dan min ngaihtuah sak thei em?’ tih hi, hmun then-thenah chuan lo tih tawh a ni a. Amaherawhchu, kan tih tak zawka chu - Champhai leh a chheh vel khuaah khian signal thatloh avang tein duh angin kan ti kal tha thei lova. Kha kha ‘min tih that sak thei ang em?’ tih kha a ni zawk mah e.

Pahnihna-ah chuan - Electric supply-a harsatna phuhruk turin solar energy lamah hmalakna a awm em?

Pathumna-ah chuan - Hei hi AMC tum awm tak zawk chu a ni a. “Aizawl khawpui chhung street light hi tun aia eng tha zawka siam tumna a awm em?” tih a ni e. Pu Speaker, ka lawm e.

SPEAKER : A chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, zawhna chhanna siam hnua rawn tihdanglam leh kha a buaithlak deuh tlat mai a; chuvangin, a zawhna pangngai kha ka han chhang ang a -

- i) Champhai veng hrang-hrangah online hmanga electric bill pek theih a ni tawh a, chung veng/khua te chu - Vengsang, Kharawt, Vengthlang, Vengthlang North, Venglai, Bethel, Vengthar, Zion Veng, Electric, Kanaan, Dinthar, Jail Veng, Hmunhmeltha, N. Khawbung, Zote, Tlangsam, New Champhai, Zotlang, Ruantlang te anni.
- ii) Awm e.
- iii) AMC kut a ni a, Power & Electricity Department-in a hriatpui lo.

SPEAKER : *Zawhbelhna* - Dr. ZR Thiamsanga.

DR. ZR. THIAMSANGA : Pu Speaker, ka lawm e.

Pakhatna chu - Champhai khawpui power supply pekna tur E. Lungdar leh Khawzawl inkara 132 kV line min han pe hi kan lawm khawp mai a. Hemi line hi pawt penga Keifang tlang - Champhai 132 kV double circuit tihna tur hi eng chen nge hma lak a nih tawh? Engtikah nge bul kan tan theih ang?

Pahnihna chu - Champhai District-in 132 kV level-a power supply kan dawn thin hi 12.5 mVA transformer pakhat chauh a ni a, hei hi a overload thin avangin 12.5 mVA power transformer min dah belh sak thei em ang em? Tin, Champhai - 33 kV power transformer 2.5 mVA pakhat khi a overload thin a, 6.5 mVA a thlak dan min ngaihtuah sak thei ang em?

Pathumna chu - Kan veng Kulikawn hi sorkar hmun pawimawh - Police Station, Fire & Emergency Sub-Station bakah Damdawiin pawimawh tak tak awmna hmun niin, power supply-ah hian min chawm zo lo deuh thin a; hetah hian transformer thar dah belh tumna a awm em? Awm ta se, engtikah nge hma min laksak theih ang? Ka lawm e.

SPEAKER : *Zawhbelhna* - Member zahawm tak Dr. BD Chakma.

DR. B.D. CHAKMA : Pu Speaker, Minister chak tak kan nei hi lawmawm ka ti a. Ka bialah hian transformer a chhiat pawhin kan dil ve leh a rang lamin min thlak sak thin a, a hmasain lawmthu ka sawi duh a ni e. Chuti ruala ka zawhbelhna chu -

i) Indo-Bangla border area ah khaw 10 aia tam hian electric connection an la nei lova, electric connection kan neih tura hmalak tumna a awm? A chhan chu - Chhotapansuri piah lamah khaw 10 velah hian electric supply pakhatmah a la awm loh avanga zawt ka ni e.

ii) Eklavya Model Residential School hi electric leh tui connection bakah approach road a la awm loh avangin hawn theih a la ni lova. Electric line chu awm tawh a, mahse domestic connection hi an la nei lo a ni. Engtikah nge Eklavya Model Residential School hi electric connection pek theih a nih ang? Ka lawm e.

SPEAKER : *Zawhbelhna* - Member zahawm Pu Lalrintluanga Sailo.

PU LALRINTLUANGA SAILO: Pu Speaker, Ka zawhbelhna chu -

i) Power grid hovin 132 leh 11kV line kum eng emaw kal ta atanga an siam West Phaileng, Marpara sub-station hi engtikah nge mipui hman theiha commission a nih ang?

Chutih rual chuan, Pu Speaker, kan Power Secretary pawhin min ngaipawimawh a, a hmunah te a zu kalchilh tawh a, covid hma te pawh khan; State sorkar kut chiah ni lovin. Hmalakna a chak lo khawp mai a, kha kha min hriatsak se ka duh a.

ii) Silsuri Village Council huamchhungah khuan Ugadasuri leh New Location Veng, in 48 leh in 57 awmna te hian power supply an la hmu ve lova, hengah hian hma min laksak thei ang em?

SPEAKER : Aw le; a theih ang ang chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, ka lawm e.

Dr. Thiamsanga, MLA zahawm tak zawhbelhna – ‘Champhai power pekna E. Lungdar - Khawzawl siamthat’ tih leh; ‘Keifang tlang - Champhai 132 kV double circuit siam’ tih kha, Pu Speaker, ‘strengthening infrastructure scheme’ tih niin ka hria a, chutiang hnuaiah chuan thun a ni a. CEA-in a approve tawh a, a sanction nghah mek a ni. Chhonzawm thuai theih kan inbeisei.

Tin, ‘Champhai District 132 kV level-a supply dawn thin 11.5 mVA chhia’ tih kha - dahbelh tura hmalak mek a ni a, March thla hi chuan commission theih beisei a ni.

Tin, ‘Kulikawn lam power supply indaihlo’ tih kha, tunah transformer dahbelh tura hmalak mek a ni a, cheng nuai 35 sorkarin finance lam atangin min rawn sanction tawh a, SEDP hnuaiah. A dahna hmun tur kan van hle thin a, amaherawhchu Pu Lalhmingliana’n a ramah min dahtir dawn avangin kan lawm hle, hna pawh kan thawk tan mek e.

Tin, Pu BD Chakma, MLA zahawmtak khan, ‘Bangladesh border lama connection la neilo khaw 10’ a tih kha, khaw 8 niin ka hria a. Tin, *un electrified* (la thlun-zawm loh) hrim hrim hi khaw 5 a awm bawk a. Hei hi a chhan chu DPR siam lai khan heng khuate hi census village annih loh avangin an tel thei lova, a dang thlun-zawm tawh khaw eng emaw zat kha nei leh ta lo an awm a, chung chu mi tu emaw ten an tihchhiat a vang te leh thlipuiin a tihchhiat a vang te, a kawng a thui tham avanga chhia te leh, a chhiat laia a hrui lo rua hralh mai thinte an awm avangin kan chhonzawm hlei thei lova. Chu chu helaia kawh awmte ina eng an neihloh chhan chu a ni. Hei hi lo en zui zel a ni.

Tin, Model lama building ‘power la nei lo’ an tih kha, keimahni Power Deptt-ina kan tih tur a nih ka ring lova, khami a satu te khan Power Deptt-ah an rawn deposit ang a; chu chu Power Deptt. lamin an lo thawk tur a ni a. In satute khan an scheme-a an telh lo a nih chuan, ‘sorkarah a hrana dil a ngai a ni’ tih kha ka chhanna ni sela.

Tin, Pu Lalrintluanga, MLA zahawmtak rawn zawhna ang zawhna hi kan dawng zing tawh a, amaherawhchu Mizoram sorkara Power Deptt. hnathawh a ni lova; Power

Grid central lam thawh a ni avangin duh angin kan control thei lova, a hawn hun tur sawi theih a la ni lo a ni. Tin, 'in 40 lai eng neilo' tih kha chu kan lo enzui ang e.

SPEAKER : Starred Question No. 144 - zawt turin Member zahawmtak Dr. F. Lalnunmawia ka sawm e.

DR. F. LALNUNMAWIA : Pu Speaker, ka lawm e. Health Minister zahawmtak chhan atan ka zawhna -

- a) Mizoram-ah kum 2019 - 2023 chhungin Health Sub-Centre engzat nge Health and Wellness Centre a hlankai a nih?
- b) Mizoram-ah kum 2019 - 2023 chhungin Health Sub-Centre Quarters sak thar engzat nge awm?

SPEAKER : A chhang turin Pu Lalchamliana, Minister in-charge ka sawm e.

PU LALCHAMLIANA, MINISTER: Pu Speaker, Member zahawmtak, Prof. F. Lalnunmawia zawhna chhanna chu -

- a) Mizoram-ah kum 2019 - 2023 chhungin *Health Sub-Centre* 305 te chu *Health and Wellness Centre*-a hlankai a ni tawh a, a bak Sub-Centre 8 te hi March, 2023 ral hmaa *Health and Wellness Centre*-a hlankai hman tum a ni.
- b) Mizoramah kum 2019 - 2023 chhungin Health Sub-Centre Quarters 25 sak thar a ni.

SPEAKER : *Zawhbelhna* - Member zahawmtak Dr. F. Lalnunmawia.

DR. F. LALNUNMAWIA : Pu Speaker, ka zawhbelhna hi a changtu Minister a awm lo nangin, sorkar ina min lo hriatpui theih chuan –

Hlimen-ah sawn UPHC (Urban Primary Health Centre) a awm a, tunlaih doctor kan nei lova, khawtlang mipui leh a chheh vel ten a an pan tangkai em em a ni a, doctor awmlh chuan an buai em em thin a. Doctor hi remchang hmasa berah min dahsak thei ang em?

SPEAKER : *Zawhbelhna* - Pu KT Rokhaw.

PU K.T. ROKHAW : Pu Speaker, Health Minister awmlo mahse kan Chief Minister a awm a, a in-charge Home Minister a awm bawk aa. Ka zawhbelhna chu –

Pu Speaker, Siaha District, Mara Autonomous District Council huam chhungah hian Primary Health Centre pali a awm a, chungte chu - Tipa PHC, Phura PHC, Chhaolo

PHC leh Chakhei PHC te an ni a. He PHC pali kan neiha doctor pakhatmah awm lo hi kan Minister hian a hria em?

Pu Speaker, Health Minister i nih khan heng PHC pali-ah te hian doctor min pek vek avang khan harsatna kan tawk lova. Tun MNF Ministry-ah hian Siaha District huam chhunga PHC-a doctor pakhatmah kan neihloh chhan hi ka zawt duh a; hei hi engtikah nge min pek theih ang?

Tin, Siaha District hi refugee tamna ber kan ni a, doctor mamawh ber kan ni bawk a ni. A nihna takah chuan, district pakhat ve lem si, PHC pali kan neiha doctor pakhatmah awm lo hi, “district dangte aiin Siaha District-a awmte nunna hi a hlu lo zawk tihna em ni?” tih hi ka zawt bawk a ni e. Ka lawm e.

SPEAKER : *Zawhbelhna* - Pu C. Lalsawivunga.

PU C. LALSAWIVUNGA: Pu Speaker, ka lawm e. Minister in-charge khan a chhan theih hi ka ring vak lova, amaherawhchu kan House Leader a awm tho a; tin, a minister hnenah pawh thleng turah ka ngai a, ka han zawt hram ang a -

Pakhatna-ah chuan - Kulikawn Hospital ah sawn doctor pahnih chauh an awm a, mipa leh hmeichhia an ni a, a mipa zawk hian High Court-ah additional charge a la bawk a, a indaih lo hle bawk a. Kulikawn Hospital saw Civil Hospital ang thuk anih avangin doctor indaihlohna puhru turin doctor dahbelh theih ani ang em?

Pahnihna-ah chuan - Sisters te, nurse te, fourth-grade te an indaih lo hle mai a, saw-saw rang takin dahbelh theih a ni ang em?

Sawlai hospital-ah sawn nau-neihna te leh Psychiatry Department te awm bawk avangin IV-Grade mipa an mamawh em em mai a, depression nei leh ruihhlo avanga harsatna tawkte admit thin an ni a. Khalai kha min lo chhinchhiah sak se la.

Pathumna-ah chuan - sawlaia an hman thin ultrasound a chhia a, a hmantlak tawh lova, Ultrasound khawl thar dah thuai a tul a. Kan dahsak nghal theih chuan kan lawm ngawt ang. Tin, ambulance pawh saw a hman tlak tawhlo a, ambulace thara thlaksak a tul hle mai a. Kha kha sorkar pawhin kan hriatpui atan leh hma kan laknghal atan ka rawn zawt bawk a ni.

Tin, a *palina* atan - oxygen pipeline saw vuah a ni a, central atangin oxygen tam tham tak min pe a, mahse, a lawmawm rualin, a pipeline saw a leak thin a, siamthat ngai tak a nih avangin sorkarin ngai pawimawha hma lak nghal a pawimawh a, ‘Hma kan la nghal thei em?’ tih kha ka zawt duh bawk a.

Tin, Aizawl South-I bika Health Sub-Centre te hi an pachhe khawp mai a. Zunthlum leh BP check-na te, damdawi kits chi hrang-hrang chungchangah te he sorkar hian kan Health Sub-Centre te thawmthat dan kawng a nei thei ang em?

SPEAKER : A theih ang-ang chhang turin Pu Lalchamliana, authorized minister ka sawm e.

PU LALCHAMLIANA, MINISTER: Pu Speaker, supplement note an rawn pekah hian zawhbelhna ho kha a tel miah lo mai a. Chuvang chuan, zawhbelhna kha chu ka chhang thei lova, a zawttu memberte khan lo ngaihsak mai se a tha ang e. Ka lawm e.

SPEAKER : Awle, nidang zela kan vaia hriatah - hemi chhunga zawhnaah hian lut lovin a dangah kan ti ta thin a. Tin, member pakhat hian zawhna pahnih bak zawh belh loh hi a mawiin ka hria. A tam thei lutuk a, ka han sawi ve a nih chu.

Starred Question No. 145 - zawt turin Member zahawm tak Dr. L. Thangmawia ka sawm e.

PU L. THANGMAWIA : Pu Speaker, ka lawm e. Minister zahawm tak, Health & Family Welfare changtu chhan atana ka zawhna chu -
Starred Question No. 145.

SPEAKER : Chhang turin Minister zahawm tak Pu Lalchamliana ka sawm e.

PU LALCHAMLIANA, MINISTER: Pu Speaker, member zahawm tak Pu L. Thangmawia zawhna ka chhanna chu –

- a) Tunhnaiah Mizoram sorkarin Health Clinic eng emaw zat a hawng thar a ni.
- b) Sorkar kum 2019-2023 chhung hian Health Clinic 235 hawn thar a ni.
- c) Tunhnaiah Mizoram sorkarin Health & Wellness Centre 368 a siam a, henga thawk tur hian Health & Wellness Officer mi 310 lak anni.

SPEAKER : *Zawhbelhna* - Member zahawm tak Pu L. Thangmawia.

PU L. THANGMAWIA : Pu Speaker, ka zawhbelhna chu –

Ka bialah khian thangkhat lian zet kan neih tawh loh, Ngopa-ah medical doctor te min dahsak avangin department chungah lawmthu ka sawi tel duh a.

Tin, Mimbung-ah building min sakthat sak tawh bawk a. Kawlhkullh khi ka bialah chuan khaw huam tam ber a ni a, Kawlhkullh PHC building khi sak that a ngai tawh em em a. Heihi SASCI atangin emaw, khawi emaw atangin min tihsak theih ang em?

Tin, a tawpna atan chuan, Ngopa hi ka biala CHC awm chhun a ni a, dental min dahsak a lawmawm rualin, KTP General Conference hi nakum kumtirah kan thleng dawn a, heng atana inbuatsaihna ni bawkin doctor tam zawk min dahsak theih ang em?

SPEAKER : *Zawhbelhna* - Member zahawm tak Pu Lalduhoma.

PU LALDUHOMA : Pu Speaker, Serchhip-ah khian kan Minister thahnemngaihna District Hospital sakna atan CSR thahnem tak kan hmu a. Amaherawhchu, a hmun thua kan buai rei viau mai a, tunah chuan sorkarin thutlukna a siam fel ta a. Engtikah nge a sak hna hi kan tan theih ang? Tin, restricted tender ti lo hramin, hospital building sakna lama experience neite ngeiin min saksak tir thei ang em?

Tin, a dang leah chuan - 'nau nei tanpuina' kan tih ang hi an dawng lo rei ta em em mai a, tlem tete a ni a. Tin, ASHA-te hian lawmman kum khat dawn an dawng tawh lova. Helaiha kan auchhuahpui a, an han dawng a; tunah an dawng lo leh char char tawh a. Heng lawmman tlemte te hi chu sorkar sum atang hian tih hram theih awm a ni a; henge hi ngaih pawimawha, an lawmman te pek theih an ni ang em?

A tawpna atan - Healthcare-a kan leiba zat kan hria a; tuna kan budget thar turah hian eng emaw zat chu kan han nei dawn a, mahse hei hian kan bat sa rulhna tur pawh a daih lo a ni. Chuvangin, he pawisa hi kum tharah hian, tuna healthcare bill tang mi 20,000 chuang hnenah hian a awm ang ang hi pekchhuah nghal thei a ni tawh ang em?

SPEAKER : *Zawhbelhna* - Pu C. Ngunlianchunga.

PU C. NGUNLIANCHUNGA: Pu Speaker, hetah hian ka zawhna a awm ve a, a chhuak hman dawn bawk si lova. Engpawh nise kan ngaihthlak tawh ang khan a changtu minister awm lo mahse, a thawktute an awm a.

Health Clinic chungchangah hian Health Deptt. kan ti dawn nge, Mizoram sorkar? A rual lo hle mai a. Lawngtlai district-ah khian bial hnih - *East* leh *West* kan awm a. Lawngtlai East chu ruling bial a ni a, khua zawng zawngah a awm vek a ni. Pu Speaker, nangmah minister i nih laia health clinic min sak sak Hmawngbu te, Zochachhuah te, Kar Lui te, a building kan sak tawhah pawh khan thawktu min dahsak ve duh lova. Kan sawi thin a, sawi hian awmzia a nei lova. He sorkar hi Mizoram sorkar ding tawhah chuan 'sorkar lai lo ber' a niin ka hria. Helai House-ah pawh hian

Lawngtlai West bialtu ka nih angin, kan bial kan chhiangchhia a, kan inkarkik a, kan dinhmun te a harsat avangin health facilities-ah hian ‘enkawl ngai tak kan ni’ tih vawi tam kan sawi a. Mahse, Lawngtlai khawpui chhungah ringawt - Electric Veng te, Lawngtlai bazar te, Chanmari te, Bethel Veng te, Council Veng te leh Lawngtlai Vengpui te; Lawngtlai khawpui chhungah hian health clinic centre-a awm thup mai a ni.
(*interruption*)

PU LALRINTLUANGA SAILO: Pu Speaker, zawt mai sela a tha lo em ni le?

PU C. NGUNLIANCHHUNGA: Ka zawt dawn a, sawifiah ngai chi ka sawi fiah duh a ni. Pu Speaker, lo rak ve fo teh suh se, ani hi.

PU LALRINTLUANGA SAILO: Senior member a ni a, a zawhna zawt mai rawh se.

PU C. NGUNLIANCHHUNGA: Sawifiah a ngai a, ka zawt dawn a ni.

Pu Speaker, chutiang chuan a rual lo a ni. Keini biala khaw pakhata awm mek hi khaw panga - parukin an intawm a ni a. Inkalpawhna te hla tak tak a ni a, an dinhmun a harsa a, khawpui pan an harsat a ni. (**Speaker:** I zawhnaah lut rawh; hun a zo dawn.)

Pu Speaker, ka zawhna, hetah pawh hian a chhanna chu a la awm tho a; kan bial thenawm tho Lunglei South-ah pawh hian chutiang tho chu a ni. Kan thenawmte an ni a, kan hria. Hei hi ‘rual tlang deuha tihdan a awm thei ang em?’ tih kha, department lam hotute pawhin min hriat sak se. Hleih nei lutuk hi chuan kal lo se a thain ka hria a, hei hi sim thei dan a awm ang em?

SPEAKER : Aw le; chhang turin Pu Lalchamliaana, authorized minister ka sawm e.

PU LALCHAMLIANA, MINISTER: Pu Speaker zawhbelhna pawimawh tak tak (**Speaker:** Ngawi rawh u aw. *Zawhna leh Chhana* hun a tawp a, chhangzo law law se kan ti em? Awle; chhangzo rawh le.)

Aw le, Member zahawm tak tak ten zawhbelhna pawimawh tak tak kan zawt a, khang kha a proceeding han ziaak chhuak hma sela, minister pawhin a lo en thuai thuai theih nan leh, department lam pawhin an bawhzui thuai theih nan a thain ka ring a.

Member zahawm tak Pu Nguna vuina kha – ‘Congress sorkarah kha chuan Congress bial kha chu an duhsak deuh a, Congress sorkar loah hian an lo duhsak lo deuh a ni awm mang e’ tih kha a zawhna atang khan a lo lang deuh a.. (**Pu C. Ngunlianchunga:** Pu Speaker, a ni lo. Congress Sorkar chuan tumah thleibik kan nei

lo; an mamawhnaah kan pe mai thin a ni.) Ni e, ‘khatiang khan a lo awm a ni awm e’ tih kha ka rilruah a lo lang a nih chu. Ka lawm e.

SPEAKER : Kei pawhin ka hrechiang khawp mai.

Awle, kan sawi ang khan, minister awmlodin zawhbelhna hi tihngai reng reng loh a ni a. Kan CM zahawm tak House Leader karawn a, tihian rilru zau takin kan phalrai che u a. Tuna in zawh kha, minister awmlo mahse officer-te, Secretary hoin an awm a ni.

LAYING OF PAPERS

Awle, tunah Paper Lay-ah kan kal ang a, kan Chief Minister zahawm tak Pu Zoramthanga’n, heng –

- i) Annual Report of Mizoram Road Fund Board for the year 2021-2022;
- ii) 16th Annual Report 2021-2022 1st April 2021-31st March 2022, Right to Information, Mizoram Information Commission;
- iii) The Mizoram (Election to Sinlung Hills Council) (Amendment) Rules, 2022;
- iv) The Members of Sinlung Hills Council (Disqualification on Ground of Defection) Rules, 2022;
- v) Economic Survey of Mizoram (2022-2023) te hi House dawhkanah rawn lay se; ka sawm e.

PU ZORAMTHANGA, CHIEF MINISTER: Pu Speaker, I remtihna leh House remtihna, heng –

- i) Annual Report of Mizoram Road Fund Board for the year 2021-2022;
- ii) 16th Annual Report 2021-2022 1st April 2021-31st March 2022, Right to Information, Mizoram Information Commission;
- iii) The Mizoram (Election to Sinlung Hills Council) (Amendment) Rules, 2022;
- iv) The Members of Sinlung Hills Council (Disqualification on Ground of Defection) Rules, 2022;
- v) Economic Survey of Mizoram (2022-2023) te hi House dawhkanah karawn lay e.

SPEAKER : Awle; a copy kha han sem ula ... (Kan changkim em?)
A tha e.

FINANCIAL BUSINESS

Tunah Financial business-ah kan kal ang a. Kan hriattlan angin kan Chief Minister zahawm tak Pu Zoramthanga, Finance Department changtu ni bawkin, Ni 13.2.2023-a budget a pharh tak “*The Annual Budget for the Year 2023-2024*” sawihona

(general discussion) kan nei ang a. Tin, kan general discussion hi vawiinah conclude (zawh) kan tum dawn a ni.

Member zahawm takte Ningani lama kan tih tawh ang khan, *minute 10* kan ti leh mai dawn em? (*Memberte'n an remti a.*)

Aw le, tunge han sawi hmasa ang le? Member zahawm tak Dr. L. Thangmawia ka sawm e. Mi pariatin an sawi tawh a ni.

PU L. THANGMAWIA : Pu Speaker, ka lawm e.

Kan Chief Minister zahawm tak, Finance changtu Pu Zoramthanga'n kar kal ta February Ni 13 (Thawhtanni) khan budget speech ropui tak leh ngaihnaawm tak, he House zahawm takah hian a rawn present a. Kum 2023-2024 Financial Year atan Mizoram sorkar sum hmuh tura beisei leh hmanral tura chhut zat chu 'cheng vaibelchhe 1,42,09 l. 95 ve ve' a nih thu a rawn tarlang a. Thil lawmawm tak chu, revenue surplus cheng vaibelchhe 417.87 tling tura beisei a ni bawk a, nikum aia budget punna tur hi cheng vaibelchhe 201.80 a ni dawn a ni.

He budget hi ngun takin ka zir a, ka thiam ang tawk tawkin Pu Speaker, miretheite thlengphak budget a ni a, mipuite fairel bel thleng tur, tin, thalaite tan, thalai lekhathiamte tana lawmna tur budget leh, kawngpui tha zawk kan neih theih nan te, MNF returnee-te tan te leh thildang tam tak lawmawm tak, sum harsatna kan tawh lai hian ka hmu a, a remchan dan angin nakinah kan la rawn sawi chhunzawm ang a.

Hetih lai, "*Statement under the Mizoram Fiscal responsibility and Budget Management Act, 2006,*" February Ni 13 thoa kan Finance Minister-in a pharh tel tak (phek 9-na) ah chuan, cheng vaibelchhe 4,453.24 chu sorkar hnathawk hlawh atan leh cheng velbelchhe 1,875.69 chu pension atana ruahman a ni a. A belhkhawmin - sorkar hnathawk kaihhnawihah cheng vaibelchhe 6,328.93 zet a ni dawn a, kha budget pumpui vaibelchhe 14,000 chuang hret atanga en chuan, a thahnem hle a ni. Hei hi budget pumpui atangin 44.5% chuang hret a ni a, CSS kaltlanga kan sum hman tur CSS expenditure cheng vaibelchhe 2,147.9, budget pumpui atanga 15.1% nen pheii chuan, hengho ringawt hian 59.6% a hawlh ta dawr a ni.

Pu Speaker, heta tanga thil chiang tak chu - Sorkar hnathawkte tana senso hi a thahnem hle mai a, chutih lai chuan department hrang hrangah thawktu indaihlohna a awm chho mek reng tho zel bawk a. *Salary and Employment 2023-2024* data kan en chuan, post ruak hi Group A - 1,352; B - 9,362; Group C - 8,680; Group D - 4,024; a vaiin tunah hian Mizoram sorkar hnuai a post sanction tawh atangin post 23,418 ruak mek anga tarlan a ni a. Pu Speaker, post ruak tarlanah hian permanent post hi 11,168 leh, temporary post 12,250 a ni a. Keini ang thil hre tam lo chuan permanent leh

temporary post danglamna te hi ka lo hre hauh lo mai a, kan member dangte chuan in lo hre vek mai thei a. Hei hi kan Finance Minister zahawm tak hian min hrilhfiah theih chuan ka lawm ngawt ang.

Tin, a pumpuia post sanction zat hi 71,663 niin, hnawhkhah mek zat hi 48,245 a ni bawk a. Pakla hisapa chhutin - sorkar hian post ruak zawng zawngte hnawhkhat ta vek sela, sorkar hnathawk hlauh leh a kaihhnawihah kan budget pumpui atangin 66% lai a kal pha dawn a ni. Hei hi a takah chuan a dik chiah lo ang a, group hrang hrang an awm avangin. Mahse tuna hnawhkhah tawh ho atana kan sen atangin a ratio kan chhut a ni a. Kum 2022-2023 data nen ka han khaihin chhin a, Group A-ah post ruak 57-in nikum ai khan a tlem a, hei hian ‘Group A-ah hian nikum chung khan kan lo recruit tam deuh’ tih a kaww thei em? “Group A-ah pawh hian nikum chung khan pension an tam ve awm tho si a,” tih zawhna ka nei deuh a.

Tin, Group B-ah 605-in a pung dawrh thung a, Group C-ah 392-in a pung bawk a, Group D-ah erawh chuan, Group A ang bawkin 81-in a tlem thung bawk a. Conclusion nei thei chiah lo mah ila, “Group A leh Group D hi nikum chung khan lak hnem deuh a ni em?” tih zawhna ka han nei deuh bawk a. Tichuan, ‘Group B leh C kan lak belh mang lo’ tihna a kaww anih chuan, hei hi en deuh a ngai mai thei bawk a. Engpawh ni se, Pu Speaker, he harsatna hi hriain kan CM zahawm tak hian covid avanga hnathar lak phal loh anih chung pawhin ngaihtuahna sengin, department hna lak thar mamawh zual ngaihtuahtu tur - Manpower Assesment Committee chu nikum lam khan a din a, tuna Group A leh D-a post ruak lo tlem ta hi, he committee hnathawh tilangtu a ni thei bawkin ka ring a, a lawmawm kati hle a ni.

Pu Speaker, leiba lamah han pakai ta ila. Hei, Union Budget pawh kha February, Ni 1 khan Union Finance Minister-in a pharh a, kha union budget pharh takah pawh khan central sorkar leiba *outstanding liability* chu GDP atanga tehin ‘57% lai a hawlh’ tih pawh kha ka han tarlang hmasa duh a. Kan state bik ah han lut ta ila - kan state leiba hi GSDP atanga tehin actual 2019-20-ah 32.72% a ni a. Tin, actual tho, 2020-21-ah 33.98% a ni a, 2021-22 ah 40.98% a kai chho dawrh a, hei hi covid hripui avanga kan harsatna vang a ni a, tin, state dang pawh an kaisang ve viau a ni, helaiah hi chuan. Tichuan, nikum 2022-23 revised estimate ah khan 41.29% a kai leh a; amaherawh chu kumthar 2023-24 atan hian a tlahniam zawng ‘37.84% beisei theih a ni’ tih kan Finance Minister-in budget speech-a a rawn sawi hi thil lawmawm tak a niin ka hria.

Tin, Pu Speaker, tun MNF sorkar hi hun harsa kan tawh hma pawhin sum lama chona lian tak hmachhawn tura kal tan a ni hrim hrim a. Sorkar kal ta khan Mizoram-a zu an zawrh chhung khan zu-chhia atang khan cheng nuai hlir - 2,63,61,58,398/- lai an hmuchhuak hman a, RTI zawhna chhanna atangin. Zu chhia atanga sum lut tam tak chu Zoram mipuite tana hnawl ngamin, kan CM hian chan huamin bul a tan a, a sorkar kumhnihaah 14th Finance Commission atangin 15th Finance Commission ah kan lut

leh ta nghal a, keini ang duang finance lama mithiam ni lo chuan 14th Finance Commission emaw, 15th Finance Commission rawtna emaw te hi hrethiam kilkelh lo mah ila, keini state rethei te tan chuan ‘a thalo zawk hle a ni’ tih hi finance lam mithiam ten min hrilh ka hriat ve a ni.

Mizoram sum leh pai dinhmun hetiang anih lai hian sorkar laipui lah chuan kan sorkar tan remchanga lo hman-puk ve mai theih CSS sum zawng-zawng release turin min han ti zui leh nghal a, Mizoram sorkar pawhin kumin 2022 chhungin cheng vaibelchhe 600 chuang zet CSS sum hi lohtheih lohna avangin a pekchhuah a ngai ta a, kan dinhmun a rapthlak chho hle a ni. Ziaktu lar William Shakespeare chuan, “vanduaina te hi a mal malin a rawn thleng mai lova, a huhovin a rawn thleng zut-zut mai zawk a ni” a lo tih angin, ramri buai nasa tak tawkin silai hial a ri a. Tin, khawchhak lamah lir te nghing foin vawk pul hri nasa takin min nuai a; Myanmar leh Bangladesh atanga kan unau ralhlante kan buaipui a ngai bawk a. Chu mai ni lovin, Pu Speaker, khawvel pumpui tibuaite ‘sorkar lian leh hausa apiangin kan dawng hneh lo zawk em aw’ tih turin covid hripuiin min la nuai leh ta nghal a. (Pu Speaker, vawiin hi tun term-a Budget Session hnuhnung ber tur a ni tawh a, hun pawh min pek belh deuh ka han ngen a.)

He hripui leng avangin, Ni 25 March, 2020 ah lockdown puan tan a ni a, tunah hun ziaawm zawk January Ni 16, 2021 a rawn inher chhuak a, Biakinah zai te chu la phal lo mah se, zai lovin kan inkhawm hman a. Reilo te hnu-ah lockdown puan ngaiin kan han awm leh a, amaheawhchu vanneihthlak takin December Ni 1, 2021 atangin guideline thar duhawm zawk hman theiin kan awm ta a. Tichuan, Pu Speaker, September Ni 2, 2022 ah covid inkhuahkhirhna order hi hlih fel a ni chauh a ni. Tichuan, lockdown chi hrang hrang - total lockdown ni 150, partial lockdown - ni 165, no tolerance - ni 96, AMC area total lockdown - ni 27, AMC partial lockdown - ni 107 leh new guidelines hnuaiah ni 173, a vaiin (ka chhutsual loh chuan) Pu Speaker, ni 718 (kum hnih dawn lai) lockdown chi hrang hrang kan hmachhawn a ni. Hemi kan hmachhawna kawngah hian sorkar chauha tih theih loh a tam a, kan sorkar hnathawk te, kohhran te, tlawmngaipawl te, Zoram mipuite kan thawhhona a tha em em a, vawiinniah hian ka sawilo theilo a ni.

Pu Speaker, khawngaih takin hun min pekbelh la, tun term chhunga budget session, general discussion-a ka sawi hnuhnun ber tur a ni tawh a. Chu mai bakah nikum budget session-ah pawh kan hmu a, cheng vaibelchhe 2,632.58 central atanga sum kan beisei chu kan hmu lo a ni. Mizoram UT a nih hnuah hetiang em ema budget-a beiseina pha lo a la awm ngai lo a ni; ka phak chin chinah ka han en ve a. A chhan chu - budget reng renga hi a kum hmasa mila duh zat zat ziah ni lo, awmze neia dah a ni thin a; a dik chiah chiah thei lo nain, a dik lohna hetiang zat em em hi vawikhat mah Mizoram pian hnuah a la awm lo a ni. Hetiang a nih avang hian, kan Chief Minister zahawm tak hian sorkar sum hmuhna tipung tur leh inrenchemna lama hma la turin Mizoram Resource

Mobilization Committee (MRMC) nikum January, Ni 21, 2022 a a din thawhrah thui tak a niin ka hria a. MRMC hi kumkhat awrh chauh hna la thawk hman a, mahse vawi 10 lai thukhawmin cheng vaibelchhe 35.74 zet he committee rawtna avang hian sorkarin kumin hian sum a hmuh belh nghe nghe a ni. A lawmawm hle mai.

Kan Chief Minister Pu Zoramthanga hian a theih ang angin sorkar sum renchemna kawngah hma nasa takin a la thin a, Chief Minister a nih hmasak zawk lai kum 2001 khan huaisen takin sorkar officer motor kawl thei chinte titlemna atan *“The Govt. of Mizoram Privatization of Vehicle Schemes, 2001”* duangchhuakin, August, Ni 28, 2001-ah Mizoram Gazettee ah tihchhuah a ni a. Kha scheme hnuaiyah khan sorkar hnathawk officer motor kawl lai 534 zet mai tihral a ni a, sorkar sum bawmah ₹1,74,23,258 lai a luh phah nghe-nghe a ni. Khatih laia kan budget pumpui kha vaibelchhe ₹1147.91 a ni a, khata tanga teh pheih chuan he scheme avanga sum lo lut hi a tam viau a ni. Tin, tuna kan sorkar leh hnu kum November Ni 19, 2019 khan sorkar motor thar leina leh a hlui enkawlna senso vaibelchhe tel ni thin, workshop bill ringawt pawh vaibelchhia tling thina kha, tihbo nan ... hei a copy pawh ka rawn keng reng a Pu Speaker, *“The Government of Mizoram Vehicle Outsourcing Policy, 2009”* GAD-in Notification No. D.26017/16/2019-GAD chu tichhuak leh in sorkarin tul bika a ngaih te tan lo chuan motor thar lei a phal ta lova. Pu Speaker, a vai chuan ka ti lo ang a, tlem khawngaih takin – “Kan hriat theuh angin 14th Finance Commission kha a lo tawp a, hetah hian PRDG min pek dana hi a zuih zawngin min pe ta lehngal a” tiin ka han kaitawi tawh mai ang e.

Tichuan, tunah hian, Pu Speaker, SEDP - mipui fairelbel tur vaibelchhe ₹300 te, scheme hrang hrang do let nan vaibelchhe ₹220 te, tiang khanin tam tak PMGSY kawng atan vaibelchhe ₹33 te, Lunglei Municipal Council atan te, heng zawng zawng hi ka han belhkhawm chhin a, budget speech-a a rawn tarlan bik hoa hi vaibelchhe ₹1,565 lai hi mipuite hnen thleng phak tur a ni e. Ka lawm e, Pu Speaker.

SPEAKER : Tunge sawi ang? Aw le, Member zahawm tak Pu KT Rokhaw i lo sawm ang.

PU K.T. ROKHAW : Pu Speaker, ka lawm e.

Kan Finance Minister, kan Chief Minister ni bawkw budget speech 2023 - 2024 hi hriatthiam awl taka ruahman a ni, keini tak ngial pawhin kan hrethiam a. Chuvang chuan, kan Finance Minister leh Finance Department-te chungah lawmthu kan sawi duh a.

Tin, G20-ah India-in President nihna kan chelh te hi ropuiin, a lawmawm ka ti hle a ni. G20 meeting thleng tur te zinga Mizoram kan tel ve hi a lawmawm tak meuh a, G20 palai mi pawimawh tak takte an lo thleng dawn a, chung ho hmaa kan hnam

rohlu leh ziarang pho chhuahna kawngah hian kan sorkar pawh uluk taka inpuahchah turin kan chah duh bawk a ni.

Pu Speaker, ka hmaa member khan minute 15 lai a sawiin ka hria a, keipawh min hriatthiam ka beisei a.

Pu Speaker, kan budget estimate pumpui hi ₹14,209.95 crore a ni a, hetah hian revenue expenditure hi ₹11,068.76 crore a ni a, chu chu budget estimate pumpui atanga chhutin 78.10% a ni. Pu Speaker, he revenue expenditure hi chu sorkar hnathawk leh pension hlawh te, buhfai leina tur te, power leina tur te, tui leina tur te, healthcare leh a dangte tana hman tur a ni a, mipui nawlpui tana beisei tur a awm lova. Tin, capital expenditure hi ram hmasawna kawnga hnathawhna tur a ni a, chu chu ₹3,141.19 crore niin, budget estimate pumpui atangin 21.90% a ni. Capital Expenditure hi chu development hnathawhna tur - asset building te, kawngpui siamna te, lei dawhna te, tui lakna te, infiamna ruhrel sakna te a ni tlangpui a. Chutah chuan revenue expenditure leh capital expenditure belhkhawm hi ₹14,209.95 crore a ni ta a, chu chu budget estimate pumpui a ni. Pu Speaker, sorkar leiba zawng zawng belhkhawm hi ₹13,584.80 crore a ni. Kan budget estimate pumpui leh kan leiba inthlauhna chu ₹625.15 crore chiah a ni. Revenue expenditure hi chu sorkar hnathawk leh pension hlawh etc. te a nih avangin khawih chet theih chi a ni lova, capital expenditure ram hmasawna kawnga development hnathawhna tur cheng ₹3,141.19 crore hi, avaiin leiba rullhna atan hmang ta ila, leiba ₹10,443.61 crore kan la nei cheu a ni. Leiba kan ngah lutuk avangin Mizoram future hi a thim hle a ni. Chuvang chuan, MNF sorkar hi 'financial management-ah chuan a fail a ni' tih hetah hian a chiang khawpin ka hria.

Pu Speaker, financial management an fail a ni tih a chianna chu - tuna kan budget sawiho a fiscal deficit hi kum 2022-2023 ah hian 6.95 a thleng chho a ni. Kumin fiscal deficit hi dah a la ni lova, dah nise, a san viau ka ring a ni. Pu Speaker, Finance Commission chuan fiscal deficit hi '3% aain a sang tur a ni lo' a tia ni. Congress sorkara kan finance minister khan financial management a thiam bawk a, kan fiscal deficit pawh kha 30.2 vel chauh a ni; tuna kan fiscal deficit hi 6.95-ah a chhuk dawrh mai a ni.

Pu Speaker, SEDP chungchang hi tlem han sawilan ka duh a. 2019 - 2020 khan cheng vaibelchhe 750 dah a ni a, 2020 - 2021 cheng vaibelchhe 513, 2021- 2022 ah cheng vaibelchhe 400, 2022 - 2023 ah cheng vaibelchhe 595, a vaiin cheng vaibelchhe 2,258 dah a ni. Pu Speaker, 'covid avangin SEDP hi kan sem thei lo' tih hi chu chhuanlam tlingah ka ngai lo a ni. Kum 4 chhungin SEDP ah hian cheng vaibelchhe 2,258 kan dah tawh a, hman tawh a ni. Chuvang chuan SEDP hi MNF sorkar hian sem duh se la chuan, a sem thei a ni. SEDP kum 4 chhunga hman tur vaibelchhe 2,258 dah a ni tawh a, hman tawh a ni bawk a ni. A dik tak chuan he SEDP-flagship programme hi an ngaih pawimawh loh vangah ka ngai a ni. Congress sorkar khan NLUP hnuaiyah 'cheng nuaikhat theuh chhungkaw tin kan pe dawn a ni' tih Pu Lal Thanhawla sorkar

khan a sawi a, theihtawp a chhuah a; chhungkaw 1,31,735 hnenah nuaikhat theuh pek a ni. Khang hun laia budget estimate amount leh tun huna budget estimate amount chu a inthlau lutuk; congress sorkar pawhin a pek thei a nih chuan, MNF sorkar hian ‘SEDP nuai 3 theuhin kan sem ang che u’ a tih hi an pek theih lohna chhan tur kan hre lo; an Flagship programme hi an ngai pawimawh tawh loh vang mai a ni. Tunah Pu Speaker, kum 4 a liam tawh a, a kum 5-na tunkumah kan inthlang dawn a, amaherawh chu chhungkaw 60,000 cheng 25,000/- theuha sem tur tih a ni leh ta a, hei hi chhungkaw dinchhuahna tur atan chuan a tlemin, a beitham lutuk a ni. Pu Speaker, wawiin niah hian chhungkaw 50,000 chauh hnenah sem tur pawh ni se, cheng vaibelchhe 3 vel sen tur a ni. Wawiin ni ah hian an flagship programme hi an ngaihsak lova, ‘an fail a ni’ ka ti lo thei lo a ni.

Tin, Pu Speaker, healthcare scheme ah cheng vaibelchhe 50 dah a ni a, a lawmawm em em laiin heta kan leiba hi cheng vaibelchhe 65 lai a ni si a, leiba rul a nih chuan, healthcare sum kumina hman tur a va awm awm lo ve tih te ka ngaihtuah a. Pu Speaker, healthcare te phei chu keini a practical-a chen chilh kan ni a, ka bialte chu in hria a, Burma border-a awm a ni a, Mizo mipuite hi cancer vei kan tam khawp a. Ka fapa hi cancer Institute-ah sawn a thawk a, zan tin deuh thaw cancer avanga thi kan nei a, ka bial atang te pawhin cancer vei tam takin an lo pan ve a. Chutah chuan mi rethei te te an inngahna chu healthcare scheme hi a ni. Mi rethei te inngahna ber healthcare-ah hian cheng vaibelchhia 50 dah a ni a, chutih laiin he scheme hnuai kan ba hi cheng vaibelchhia 65 lai a ni si a, ‘eng sum nge kan hman tak ang’ tih hi kan Finance Minister-in khawngaihin min hrilhfiah se ka lawm hle ang.

Sorkar laipui chuan “*Special Assistance to State for Capital Investment 2022-23*” hnuai cheng vaibelchhia 497.50 min pe a, a hma khan cheng vaibelchhia 500 a lo pe tawh bawh a. Hei hi soft loan niin, a pung hi kum 50 a nih hnuai a pung awm lova rulh tur a ni a. Pu Speaker, he soft loan hi a tam viau a, chuvangin, district tin asset puitling siam ni se; tin, a hna hi open tender-a siam ni se a thain ka hria.

A tawpna atan chuan, he budget hi mipui nawlpuite tan chuan ‘a thlakhlelh awm loh a ni’ tih ka sawi duh a ni e. Ka lawm e.

SPEAKER : Minute hnih leh a chanve i hman belh ve a ni e. Member zahawm tak BD Chakma ka sawm e.

PU B.D. CHAKMA : Pu Speaker, ka lawm e. Budget 2023-24 a tan sawihona kan nei thei hi a lawmawm ka ti a.

A hmasa berah chuan - para 4-ah hian, “Mizoram Resource Mobilization Committee din thar a ni a” tih a ni a. He Committee kan dina resource te mobilized a nih hnuah cheng vaibelchhia 35 lai Mizoram sorkar tan revenue source mobilized a ni

kha lawmawm ka ti a, nakin zelah pawh he committee hian revenue sum lak dan tur te pawh duang thei se a lawmawm khawp ang.

Tin, central sorkar atangin SASCI hnuaiah kumin atan cheng vaibelchhia 497.50 kan nei thei hi lawmawm ka ti a. Hei hi kum 5 chhung a tan *soft loan, without any interest*, kum 5 chhunga rulh tur a ni. Hei hi post-Covid state-te zingah Mizoram a tel ve avanga SASCI hnuaia *soft-loan* kan la theih hi lawmawm ka ti a. Chutih rualin Member zahawm tak tak te pawhin recess laiin an sawi thin a, MLA bial tinah SASCI hnuai sum hi capital investment atan hman thin niin ka hria a, hemi SASCI hnuaiah hian ka bial chhunga internal road blacktopping - Chawngte leh Boropansuri te pawh kha a awmin ka hria a, kha kha 'a la sustain em' tih ka hre duh khawp mai a. Chuvangin, bial dang ang bawkin ka bialah pawh he SASCI hnuaia sum hi capital asset creation a tan dah ve ni se ka lawm khawp ang.

Tin, targetted GSDP hi nikumah khan cheng vaibelchhe 39 lai a awm laiin, tuna kan target chu cheng vaibelchhe 30 niin, a tlahniam nasa a. GSDP hi eng vangin nge a tlahniam; 'State economy tan a tha vak lo' tih a lang bawk si a? Tin, kumin atana Anticipated Revenue Surplus cheng vaibelchhe 4,17,087 awm hi lawmawm ka ti a, mahse, khawi atangin nge chhiah hi lak tur; electric leh tui bill atangin nge? Bill tihsan avangin revenue surplus a awm thei tih kha a lang bawk si a. Chuvangin, '*not at the cost of State citizens*' tih kha ka sawi duh a ni. Chuvangin, revenue surplus a awmna chhan hi mipuite pocket atanga chawi a tam lutuk vang a ni thei em ka hre lova.

Tin, DAP GSDP percentage pawh kum 2018-19 ah hian 32.89 a ni a, tin 2019-20 ah hian 33.72, 2020-21 ah a pung ta viau a. Tin, 2021-22 ah 40.98 ah a chho a, 2022-23 ah a pung leh a; tin, budget estimate - State-owned tax revenue-ah 35.32-in a increased bawk a, a lawmawm ka ti a. Hetianga a kal chhoh zel theih chuan Mizoram mipuite tan hian a tha dawn a ni.

Tin, *Disbursement*-ah hian lut ta ila. Revenue Expenditure atan kuminah 78.10% dah a ni a, chutih laiin capital expenditure-a 21.90% chauh dah a ni hi, hei hi budget him a ni em ka hre lova. Chuvangin, revenue expenditure-ah hian 65% aia tam anih chuan budget tha a ni ngai lova. Chuvangin, sorkar hnathawk-staff salary leh khami department hrang hrang enkawlina tur revenue expenditure a awm ve thin a, revenue expenditure atana percentage sang tak neih hi 'state-economy atan a him vak lo' tih kha ka sawi duh bawk a. Tin, capital expenditure hi asset creation (siamna) a ni a, a bik takin - road, bridge, irrigation, sport infra-structure te hi capital expenditure hnuai atanga hman a ni thin a. Mahse, capital expenditure hnuaia 21.90% chauh dah hi state development - asset creation atan chuan a tlem deuh em aw ka ti a, Pu Speaker.

Tin, *Sectoral Allocation* - General Service ah hian 38.45, Social Service 31.69, Economic Service ah hian a hniam lutuk a, 19.97 % chauh a ni a, hetiangah dah tlem hi

pawi ka ti khawp mai a. Tin, *Important Allocation*-ah, Pu Speaker, nikumah SEDP - Family oriented scheme atan cheng vaibelchhe 350 lai dah anih laiin kumin hi election year a ni nain vaibelchhe 300 chauh a dah a ni hi pawi ka ti khawp mai a. Kum li a kal tawh a, kum li chhungin mi pakhatin ₹25,000/- chauh an dawng tur hi pawi ka ti khawp mai a; hei ai hian PM-Kisan hi kan hlawkpui zawk lo maw ka ti a ni, Pu Speaker. PM-Kisan hnuaiyah kum nga chhungin mi pakhatin 30,000/- a dawn theih laiin, SEDP hnuaiyah ₹25,000/- chauh dawn theih a ni hi pawi ka ti khawp mai. Chuvangin, SEDP - beneficiary ten sum an la dawng kim lo anih chuan, PM-Kisan hnuai-ah insawn se an hlawk zawk dawn a ni, Pu Speaker. SEDP sum dawn aini PM-Kisan sum dawn kha a hlawk zawk daih a nia; kum nga chhungin 30,000/- an dawng dawn a ni a, PM-Kisan ah chuan. Chuvangin, hei hi ennawn a ngaiin ka hria a ni.

Pu Speaker, *Education leh Health* hi ka ngaipawimawh em em a. Tin Health Insurance ah hian cheng vaibelchhe 50 chauh an dah a, Lottery ah vaibelchhe 10, avaiin vaibelchhe 60 dah a ni a, kan leba rullhna tur pawh a daih loh hian health insurance hi engtin nge a kal theih ang tih hi Pu Speaker, ka hrethiam lova, hon. Chief Minister, kan Finance Minister ni bawh hian khawngaih takin min hrilhfiyah thei se ka ti hle mai. Tin, Samagra Siksha hnuaiyah SSA zirtirtute hlawh tinpun a ni hi a lawmawm ka ti a, chutih rual rual in state danga - Assam te, Tripura ah te, Manipur ah te anmahni state SSA hnuaiyah thawktute service chu regularized vek anih laiin Mizoram sorkar hnuaiyah thawkte service erawh pakhatmah regularize a ni lo hi pawi ka ti khawp mai a. Khawngaih takin hei hi ngaihtuah ni se; mi thenkhat kum 15 lai service te an awm tawh a. An fate pawh college ah an thawh tawh laiin ₹25,000/- thlakhat-ah an hlawh ve tawh a ni a. Chuvangin, SSA hnuaiyah zirtirtu thawk zawng-zawngte service hi regularize theih ni se tih kha ka ngenna a ni.

Tin, hetah SMS Top-up atan vaibelchhe ₹52.98 crore dah a ni hi a lawmawm ka ti a. Chutih laiin Central Service exam-te senso a tan cheng nuai 50 chauh dah a ni hi a tlem deuh lo em ni, Pu Speaker? Kei pawhin ka MLA fund atang hian cheng nuai 10 ka dah ve thin a. Chuvangin, hei hi kan dah tlem lutuk a, kan mizoram thalaite Delhi emaw, Kolkota emaw, Mumbai ah emawa All-India Service zirna atan chuan a tlem mah mah a, a tlem berah cheng vaibelchhe 1 tal dah theih ila a lawmawm khawp ang.

Tin, *Firm Capital Investment* - power leina tur emaw, kawng siamna tur emaw atan sum dah tam tha ka ti a. Pu Speaker, kalkawng te a chhia a, agriculture department atang pawhin land development fund hmuh tur engmah a awm lova. Hetiangah hi chuan sum thehnem tak hi dah theih ni se tih kha ka sawi duh bawh a ni.

Tin, Pu Speaker, '₹1.8 crore for primary management of Lunglei Municipal Corporation' tih hi, hei hi chu district council pangngai a ni a, mahse heta pawisa dah a tlem lutuk hi ka sawi duh a ni, Pu Speaker. Ka lawm e.

SPEAKER : Nichina kan hmeh khan, minute 10 diat diat kan pe deuh vek che u a, a hmaa mite khan an ei tam deuh hlek a.

Khai le; tunge sawi leh ang? Aw le, Member zahawm tak Pu K. Laldawngliana ka sawm e.

PU K. LALDAWNGLIANA: Ni 13. 2. 2023-a kan Chief Minister zahawm tak, Finance Minister ni bawkin Budget 2023-2024 a rawn pharh tak sawiho a ni hi a lawmawm ka ti hle a ni. Pu Speaker, tun tum hi 8th Legislative Assembly-a budget pharh tum 5-na a lo ni ta reng mai a. Kan hriat theuh angin tun term-a kan budget hmasa 2019 kha MP inthlan atan 'Model Code of Conduct' bawhchhiat hlauh avangin *Vote on Account*-a pharh a ni tih kha kan la hre theuhin ka ringa. Khami tum tih loh kha chu budget pharh hrim hrimah harsatna kan tawk lova, a hun takah regular budget kan pharh zel thei hi a lawmawm hlein ka hria a ni. Tun tum budget hi term hmasa lama kan budget pharh thin hun hma daihin pharh thin a ni a, hei hian financial year tawp dawna sum tam tak hman thina kha a titawpin ka hria a. March thla laihawl-ah bill te pawh Treasury-ah kan thehltut hman deuh vek tawh a, March Ni 31, financial year tawp zana pawisa draw vak-vak ang chi kha a awm ta lova, hei hian thangthar zelah rilru puthmang dik min pe chho zel dawnin ka hria a, a lawmawm ka ti hle a ni.

Pu Speaker, House member-a ka lo luh ve hma pawh khan kan sorkar hi ka lo chik ve thin a, budget bag atana tum khat brief case sem tih loh kha chu mizo siam, tualchhung product vek hman a ni hi lawmawm ka ti a, kuminah pawh local product muga silk atanga siam kan han dawng hi lawmawm ka ti a ni. Sorkar hmasa lamah khan phai lam product hlir hman a ni a, hetiang local product hman a ni ta hian kan enterprenuer te a ti phur vein ka ring a ni. Sorkar lo awm zel turah pawh mizo siam hi hman theih zel ni se a duhawm ngawt mai.

Pu Speaker, kumin hian kum dang zawng aiin budget hi pharh hma a ni a. February Ni 1 a union budget pharh anih atangin kan budget pharh nan hian working-day Ni 8 vel chauh a awm a. Thawktute leh a changtu kan Chief Minister te inpekna te pawh a fakawm ka ti hle a ni.

Pu Speaker, 2023-2024 kan budget allocation chu ₹14209.95 crore a ni a, nikum aia a tamna hi ₹209.80 crore zet a ni a. Member zahawm tak tak eng emaw zatin an sawi tawh a Tthlir dan pawh a inang lo thei viauin ka hria a ni. A hmasa berah revenue expenditure sang chungchang sawi ka duh a.

Kum 2023-2024 budget-ah hian revenue expenditure tur hi ₹11,068.75 crore a ni a, chu chu total expenditure atanga chhutit 77.89% lai a ni a, member ten kan ngaimawh a, capital expenditure hi sang se kan duh hle a ni. Amaherawhchu, kan ramin thawhchhuah kan ngah loh avangin hmun tinah revenue expenditure kaihnhawih a ni

zel a, electric bill leh tui bill tihsan kan duh bawk lova, mahse kan khuaah eng awm se, tui supply hnianghnar se, a tul anih pheii chuan motor-in tui min chawi sak se tih thlengin kan duh thin a. Heng hi revenue expenditure tisang tu zel a ni a. Tin, kan bialah office thar hawng se, zirtirtu leh doctor post te luah khat kim se tih kan duh vek bawk a. Heng zawng zawng hi member zahawm takte duhdan niin, mipui rawngbawlina anih avangin revenue expenditure a sang ta lutuk thin hi ngaimawh lutuk thei dinhmunah kan ding lova. A chhan chu, mipui tan leh mipui rawngbawlina vek a nih vang a ni. (*Dy. Speaker-in Chair a la a..*)

Pu Dy. Speaker, sum puk leh leiba chungchang hi sawi leh lawk ka duh a. Kumthara sorkar leiba lo awm tur hi Annual Financial Statement, 2022-2023, 2023-2024 pheii 23-naah kan hmu a, cheng vaibelchhia 130,000/- chuang ni tura chhut a ni a. Han en mai chuan a tam khawp mai; mahse, heng zinga atam ber te hi chu state development loan niin, open market atanga puk a ni a, a pung hi 7-8% te a ni tlangpui a, kum 10-15 inkara rulh turte a ni hlawm a ni. Tin, kumina SASCI - scheme implement atanga sum puk hi cheng vaibelchhia 1,197.5 a tling dawn a, hei pheii hi chu pung awm lo, kum 50 hnua rulh tur a ni. Sum hlutna tlakhniam chak dan ngaihtuahin, kum 50 vei meuh hi chuan tuna vaibelchhe sang chuang hi chu a sang lutuk lo ang a. Kum 50 kal taa kan budget kha cheng vaibelchhe 92 vel niin kan Speaker khan a sawi a, kumin hian cheng vaibelchhe 92 chu sorkar phur tirit tham a lo ni lo ta hle a ni. Tin, kan sum puk hi vawikhata rulh vek tur anih loh avangin mut-mawh, hnar-mawh ah nei lo ila, heng loan te hian rulh dan tur kalhmang fel tak an nei vek a. Chumi hre reng chung chuan Govt. of India in sum puk phalna min pe thin a ni.

Khawvel ram hausa ber USA khuan leiba 31 trillion dollars a nei a, tum khata pek tur ni se, an pe thei lul bik lo ang. Mahse a rulh hun bi hrang hranga rulh tur anih avangin an tan phurrit lutuk a ni lo. Pu Dy. Speaker, kan leiba zinga 43% zet hi chu public account ba a ni a, heta tam zawk fe chu sorkar hnathawkte GPF te GIS te a ni a, heihi leiba ti tamtu tak pawh a ni. Hengte hi tum khata rulh ngailo a ni a, a then chu kum 2-3 leka pek ngai a ni. Tin, kum 20 hnua pek ngai te pawh an ni ve tho bawk a ni.

Chutihreal erawh chuan thawhchhuah nei tam zawnga kan kal erawh thil tha tak chu a ni reng ang. Sorkar thawhchhuah tam tur chuan chhiah pun hi a kawng a ni ber mai a, chu chu a awm tawh chinah chuan kan dodal loh tlan te pawh hi a that a rinawm a ni.

Pu Dy. Speaker, ka sawi leh duh chu, mipui hnena thleng tur thil pawimawh tak tak kan budget a lo lang ta hi a ni a. *Pakhatna*-ah chuan - chhungkaw lam hawi SEDP atan cheng vaibelchhia 300 lo lang te hi mipui thleng ngei-gei tur a ni a, mipuiin direct-a an chan ve tur budget-a lo lang hi a ropui ka ti hle a ni. Healthcare atan SEDP atanga puk tur cheng vaibelchhe 50 lo lang leh, lottery sum thawhchhuah atangin pek tur cheng vaibelchhe 10, avaiin cheng vaibelchhe 60 dah a ni hi lawmawm ka ti a, healthcare bill

ba tam tak a rul thei dawn a ni. Tuna Bill ba awm mek cheng vaibelchhe 65.90 hi rul zawh ni lo mahse corpus fund-a sum awm mek a pung (interest) atang hian cheng vaibelchhe 12 chu hmuh a beisei awm bawk a, chuvangin, minawlpuite hriselna kawnga kan harsatna hi a zia chho ngei ang. ADB atanga sum pek anih pheh chuan tha takin a in manage chho thei dawn tawh a ni.

Tin, healthcare scheme hi kan sawrkar hian lo kalpui lo ta se, mipui dam lo enkawlana atan sum kan sen tho-tho a ngai a. Healthcare scheme hi awm lo ta se, kan pocket atangin a chhuah tho-tho a ngai a ni. Covid avangin han ba deuh rih mahse, rulh chhoh thuai tur a ni tawh a, a let leh an han hmu tur hi thil lawmawm tak a ni tho-tho a ni.

Pu Dy. Speaker, mipuite'n electric bill tlawm deuh zawka kan hmuh theihna tur *direct subsidy* atan cheng vaibelchhe 157.90 lai dah a nih hi thil lawmawm tak a ni. Subsidy hi dah ta lo ila, P&E department-in JERC-ah power petition an file hunah cheng vaibelchhe 157.90 hu hi mipui chawi turah an file tel a ngai dawn a. P&E hnuaiah hian consumer mi 2,70,000 an awm a, consumer tinte hi kumkhatah cheng 5814 zel sorkarin min pek sak tihna a lo ni dawn a, thla khatah consumer pakhat zelah cheng 484 a tling a ni. Hei hi sorkarin min pek sak lo se chu kan electric bill chu a sang viau dawn tihna anih chu.

A tawp berah chuan, Pu Dy. Speaker, budget hi chu engzata tam emaw, engzata tlem emaw pawh ni se, a hmanna pui ber hi public interest ni se a thain ka hria a. Chu chu kan sorkar Pu Zoramthanga kaihhruaiin a tum ber pawh a ni. Kan budget hi duhthusam a ni kher lo ang; thawhchhuah lam a tlem miao avangin central sorkar sum min pekah kan inngat thui viau mai a. CSS scheme hnuaiah kan sum hmuhte chu state duh dan ang-anga hman theih loh a ni hlawm tih kan hre vek awm e. Chuvangin, kei chuan kan budget 2023-2024 hi a tha tawka ti a. Pathian nung betu kan ni a, rinnain House-in a pass ngei atan ka rawn thlawp a ni e. Pu Dy. Speaker, ka lawm e.

DEPUTY SPEAKER : Member zahawm tak Pu Lalrindika Ralte ka sawm e.

PU LALRINDIKA RALTE: Pu Dy. Speaker, ka lawm e. Kan hriat tak angin kan budget hnuhngung ber (ti mai ang) chu kan lo sawi ho leh ta a. A bu chhung thu hi chu Pu Dy. Speaker, general discussion a ni bawk a, kei ka luhchilh vak dawn lova. Keimah hian ngaihpaawimawh zawngte ka nei ve a, ka approach hi a lo dang deuh hlek a nih pawhin min hriatthiamna ka ngen duh bawk a ni.

Nikum lamah khan kan budget kha 'sorkar hnathawk hlawh an rawn dah kim lo e' tih chungchangah khan press conference pawh kan lo nei a. Pu Dy. Speaker, i phalnain ka han chhiar lawk ang a.

Sorkarin a rawn sawifiahnaah hian, “a tlangpuiin hlawh tur budget-a dah hi hman sen a ni ngai lova. Kum kal ta 2021-22 chhunga hlawh tur budget a dah pawh kha tuna chhutchhuah tawh chinah chuan cheng vaibelchhe 336 hman zawh lohin a awm a. Hei hi chhutchhuah kim vek hnuah pheih chuan cheng vaibelchhe 400 vel tling tura ngaih a ni” tih a ni a. A awmziaah chuan, sorkar hnathawk hlawh kha a ‘in daih lo lo e’ tih kha an rawn sawifiahna kha a ni a. Amaherawhchu, hei kuminah hian a indaih lohna hi a rawn lang Chiang ta em em a, salary expenditure-ah hian BE-ah hian cheng vaibelchhe 3537.8 leh, RE-ah cheng vaibelchhe 4445.93 a ni. A inthlahna hi cheng vaibelchhe 908.45 a ni a, 30% vel dawn a ni.

Kan budget hi kan sawi tak thin angin, Mizoram hi chu sum indaih lo kan ni a, kan hria a; mi pangngai chuan kan hre vek a. Amaherawhchu, a tak ang thei ang bera kan kal erawh hi chu kan ram leh hnam hmalam hun kal zel turah hian a thain ka hria a. Kei chuan ka ngaihpawimawh chu –‘duhamna leh mahni hmasialna’ tih te hi kan budget kan pharh lai hian ka rilruah a lian hle a. Dinmun harsa zawk te hi an lo duham deuh anih pawhin a hriatthiamawm ka ti a, kei chuan. Amaherawhchu, vawiin nia kan ram dinmunah hi chuan miduhamte hi miharsa leh mimangangte an ni ta lo hian a hriat a, hei hi a pawh ka ti a. Dinmun tha tak taka ding ten, chu an dinmun chu duhamna leh mahni hmasial nan an la hmang duh cheu hi keichuan a pawh ka ti a. Chu chu helai kan sum ziah chhunga mi vek tho hi a ni a, a hmangtute hi chutianga ngaihtuahna kan nei a nih chuan kan budget hi eng ang pawhin a bu-ah hian tha thin mahse, a enkawltu rilru a dik tlat loh chuan ‘engahmah kan chan dawn chuang lo a ni’ tih hi kei chu ka ngaihdan a ni a, chu lam chu ka ngaihpawimawh a ni bawh a ni.

Tin, keini ho hi heti hian ‘ram leh hnam tan kan penchhuak’ kan ti a, helai hian kan thu a. Miten min zawt ta se ‘ram leh hnam tan hian i theihtawp i chhuah em?’ tiin min zawt ta se, engtin nge kan chhan ang? ‘Theihtawp ka chhuah’ tia kan chhan ka ring a, amaherawhchu, vawiin niah hian kan rawngbawlsak mipuite hian an tan hian ‘kan theihtawp kan chhuah em’ tih hi min zawt a, chu chu - *Zawhna lian tak a ni* tih hi kan hriat nawn a thain ka hria a. Kan theihtawp hi ram leh hnam tan hian kan chhuah tak tak em tih pawh kan inzawh nawn a pawimawhin ka hria a ni. Helai hmuna kan in auh buai nek nek lai hian, kan mipuite chuan an dam khawchhuahna tur ngaihtuahin ‘rim takin hna an thawk a ni’ tih hi kan hriat tel ngei-ngei a thain ka hria a. Helai ro kan relna kawngah pawh hian kan mipuite thawhrimna te, kan mipuite suangtuahna kal vel tur te pawh hi kan ngaihtuahpui a tha tak zetin ka hria a ni.

Tin, kan ram leh hnam min tehna a ni a, miin; kohhrana kan thilpek te hi an hmang lo. He Mizo hnam min teh nan hian - “*sorkar tha kan nei em* tih, kan sorkar hi miten min teh nan hian min hmang a ni” tih hi kan hriat a thain ka hria a. Chuvangin, kan zavaiin, mi hnam leh mi State ten min tehna hi kan hriatnawn a thain ka hria a ni.

Tin, kan chanchin - mimal chanchin emaw, hnam a ni emaw, sorkar a ni emaw kan chanchin ti Chiangtu chu ‘kan thiltih’ hi a ni. Kan chanchin hi a thangmawi em? Kan thiltih hi a mawi loh chuan kan chanchin hi a thangmawi ngai lovang. Chuvang chuan, ‘eng angin nge thil kan tih thin’ tih pawh hi kan ngaihtuahnaah awm se ka duh bawka a ni.

Tin, miin an sawi thin a, “sorkar inrelbawlina diklohna hmunah chuan politician leh sorkar hnathawkte an Hausa thin” an ti thin. Vawiinah hian kan ram, kan hnam hi, ‘politician leh sorkar hnathawkte Hausakna ram a ni em’ tih hi kan inzawh nawn pawh a thain ka hria a. Chu chu kan rilruah awm lian se ka duh hle bawka a ni.

A tawp berah chuan, Pu Dy. Speaker, kan hnam hian chanchin kan lo nei tawh; kan ram leh hnam hian chanchin mawi tak te pawh kan lo nei ve tawh. Heta ka sawi duh chu - kan ram leh hnam tan hian mi tamtakin ram leh hnam hmangaihna avang hian an nun an chan a, an lo inhlantawh a; chu chu kan hre vek a ni. Vawiinah hian ka ngaihtuah vang vang hian, heng mite inpekna hi phatsanin a awm ta ni hian ka hria. Mahni ram leh hnam tan pawha rinawm theilo nih hi a pawiin ka hria a.

Chuvang chuan, kan zavai hian vawiin a kan budget sawiho te, sum leh pai te kan sawi lai mek hian, chu *inpekna thuk zawk* chu kan neih ngei a thain ka hria a, kan mipuite min beiseina pawh a ni a. Chutiang tur chuan mahni pawh infuih ila kan ram leh hnam, he Zoram dinchhuah nan hian theihtawp chhuah thar turin ka inngen duh a ni e. Ka lawm e.

DEPUTY SPEAKER : Member zahawm tak Pu C. Lalmuanpuia ka sawm e.

PU C. LALMUANPUIA : Pu Dy. Speaker, ka lawm e. Kum 2023 budget tluang taka kan House Leader-in Ni 13 kar hmasa (Ningani) a a pharh hi a lawmawm ka ti a. Hetianga budget 2023 pharh theihna hun tha min petu Pathian hnenah lawmthu ka sawi a ni.

Pu Dy. Speaker, ka sawi duh chu - kumina kan budget pharh hi revenue section leh capital section atanga kan sum hmuh tur, kan beisei zawng zawng hi cheng vaibelchhe 14,209.95 a ni a. Lawmawm ka tih deuh chu, nikuma budget estimate kan pharh kha cheng vaibelchhe 14008.15 a ni a, nikum kha kan khum a. Amaherawhchu, a percent zawnga en chuan kan khum tamin a lang lova. Mahse a lungawithlak viauin ka hria a. Cheng vaibelchhe 201.80 zet maia kumina kan han khum thei hi a lawmawm ka ti khawp mai. A chhan chu, nikuma project lian an kalpui mek PM-Devine atang te khan cheng vaibelchhe 600 kan hmu a. Khangte kha hmuh a ni dawn tawh lova. Chutichung chuan Pu Dy. Speaker, kan budget kan khum thei hi a lawmawmin ka hria a.

Tin, kan hria a, kan sawi fo thin a; covid-19 khan namen lovin min nuai a. Hei hi khawvel rampum hriat a ni a, India ram pawh a tuar nasa ber pawl kan ni a. Chuvang chuan, kan budget thlir hian ka lo thaw dep dep a, 'nikum kan pha lo mai ang a' tih ngaihdan te ka rilruah a lo awm a. Chu mai a la ni lo; Pu Dy. Speaker, *Post Devolution Revenue Receipt Deficit Grant* kan hmuh thin te kha 14th Finance Commission kha chuan min recommend tha khawp mai a. Mahse 15th Finance Commission hian ruahmanna a rawn siamah hian min recommend dan hi a hniam zawngin min recommend a. Nikum khan cheng vaibelchhe 1,474 kan hmu a, amaherawhchu, kumina kan hmuh tur kha cheng vaiblechhe 1474 a ni a, nikuma kan hmuh aiin kumina kan hmuh tur hi hi cheng vaibelchhe 141 zetin a hniam nghal ringawt mai a. Chuvang chuan, kan budget pawh hi hniam duai turah ka lo ngai a. Mahse Pu Dy. Speaker, wawinah hian a hmalam kan la pan hret thei hi a lawmawm ka ti takzet a ni.

Sawi tur tam tak a awm a, Pu Dy. Speaker, a vai chuan kan luhchilh hman dawn lova. General discussion a nihna ang ngeiin kan House Leader zahawm tak hian a budget speech-ah pawh hian a rawn sawilang nghe-nghe a. Hei, G20 meeting thleng turin Mizoram State thlan kan han ni te hi a lawmawm ka ti khawp mai a. December Ni 1, 2022 atang khan G20 presidency hi India ram sorkarin a chelh tan kha a ni a. Chutah chuan meeting hrang hrang thleng tur zingah India ram state heti zozai zingah Mizoram pawh kan hniam bik lo a ni tih a lang a, min han thlang nalh te pawh hi a lawmawm ka ti a. Hetah hian Mizote kan hnam ziarang leh kan rohlute phochhuahna hun remchang tak kan han nei tur te pawh hi; khawvel huap deuhthaw a ni a, G20-a a tel ramte chu kan hria a. Chuvang chuan, hetiang te pawh hi Pu Dy. Speaker, lawmawm ka ti tak zet a ni.

Ka sawi leh duh chu - hei Mizoram sorkar sum lakluh leh tihpun zel bakah a tul lova kan sum hmanral te tihlem chungchang ngaihtuah turin Mizoram Resource Mobilization Committee (MRMC) hi nikum lam khan din a lo ni a, hei hi a lawmawm takzetin ka hria a. Kan budget leh sum hman dan tur te lo thlir lawka, a chuang bang tur te a awm thei em tiin uluk taka kan budget an lo thlir lawk hi a lawmawm hlein ka hria a. Tin, ka hmuh danah chuan, department hrang hrangte bank account pung atangin cheng vaibelchhe 35.74 zet chu sorkar sum-bawmah a lut te hi a lawmawm ka ti khawp mai. A changtu kan House Leader leh Finance Minister zahawm tak, kan CM leh a department te hian rilru tak-tak sengin he budget hi an buaipui thin a ni tih hi a lang Chiang hle a ni.

Tin, Pu Dy. Speaker, ka sawi nawn leh duh pakhat chu - kan budget kha han thlir ila, SEDP a lo lang kulh mai a. SEDP hi a pawimawh hle mai a, Socio-Economic Development Programme a ni a. Khatah khan cheng vaibelchhe 595 dah a ni a, a lawmawm hlein ka hria. Tin, cheng vaibelchhe 220 chu scheme hrang hrang heng - CSS te, EAP, NCDC leh a dangte heng counterpart funding atana dah hi a lawmawm hlein ka hre bawk a, kan sorkar hian tih tak zetin hma lak a tum a, heng te tan hian SEDP

hnuaiiah hma chhawp mumal tak neia sum dah a ni hi Pu Dy. Speaker, a lawmawm ka ti khawp mai.

Chumai ala ni lova; family-oriented scheme atangin ₹300 crore dah a ni leh te hi a lawmawm khawp mai. Member zahawm tak ten an rawn sawi a, SEDP hi mi harsa, mi rethei zawkte dawm chhohna tur programme lian tak, chhungkua te tana ruahmanna kan sorkarin mumal tak mai a rawn chhawp chhuak leh hi a lawmawm khawp mai a. Kan hriat theuh angin Pu Dy. Speaker, hriin min tibuai em em a, chu mai ala ni lova, vawk-pul hri ten min nuai nasa a, kan ran te, kan vawk te; Mizo phe chu vawksa kan mamawh zia kan hria a, krismas kan hunpui berah pawh vawksa tel lo chuan ruai te pawh a famkim ngai lo a ni. Chutiang khawp chuan heng SEDP hnuaiiah hian zokhaw lama kan unaute leh mi harsa zawkte chhanchhuahna tur kawng a rawn inhawng zel hi a lawmawm ka ti a, kawng hrang hranga hmachhawp lo kal leh tur ₹25,000/- hi a hlu khawp mai Pu Dy. Speaker. A dinhmun leh kan awmdan zelah hian, a tunlai zel hi chhut ngai niin kha hria a. Heng ₹25,000/- kan han pek hmasak tur te pawh hi hman thiam chuan bul tanna tham a la ni thei dawn a ni. ₹50,000/- zela ruahmanna kalpui mek, chhunzawm zel tur atana SEDP - mi harsa zawkte tanpuina tura ruahmanna a lo kal hi Pu Dy. Speaker a lawmawm ka ti takzet a ni.

Tin, cheng vaibelchhe ₹50 - healthcare scheme tana ruahhman a ni te hi a ropui ka ti a; kan hriselna lam ngaihpawimawh a tul zia member zahawm tak takte pawh khan an rawn sawi a, Mizoram kan dinhmun kal zel tur chu Pathian thu thu a ni a, kan hriselna lamah - cancer te pawh a tamna ram a ni a, kum upa lam natna tlanglawn tak chu 'cancer' hi a ni a. Hei hi kan duh vang leh keimah niina kan tum reng vang leh kan cho chhuaha heng cancer te pawh hi vei kan ni hauh lova. Miin cancer a veia treatment a lak tawh chuan, a enkawlna a hautak em em thin a, natna chi hrang-hrang zinga langsar ber ka sawi mai a ni a. Heng lo lang te hi a lawmawm ka ti a, mi harsa zawk ten an in enkawlna senso an han claim thei tur hi ka lawmpui tak zet zet a ni.

Tin, Pu Dy. Speaker, kan vei leh deuh pakhat chu - kum hmasa lama kan lo tih angin cheng vaibelchhe ₹5 MNF returnee te tundinna tur ruahmanna a a lo awm hi a lawmawm ka ti a. Returnee te hi ram leh hnam tana theih tawp chhuaha lo tang tang-tanga, tun kan dinhmun min hruai thleng tute an ni a, an nite hlamchhiah lova chhawmdawlna tur ruahmanna a rawn lang hi a lawmawm ka ti tak zet zet a ni.

Pu Dy. Speaker, kan sawi leh duh chu - SDRMF State Disaster Relief Management Fund-ah vaibelchhe ₹52 dah a ni hi a lawmawm hlein ka hria a. Kan ram chu kan hriat theuh angin furpui a lo thlenin fur hi a na thei em em a, hengah te hian chhiat tawkte kan awm thin a, chung rikrum tuarte tanpuina tur kan sorkarin a lo inruahhman lawk hi a lawmawm ka ti tak zet zet a ni. *Special Assistance to State for Capital Investment* atan cheng vaibelchhe ₹200 dah a ni pawh hi a lawmawm ka ti hle

a ni. Sawi tur tam tak karah kha-kha ka sawi theih ni se la. He budget hi ka thlawp a, a lawmawm ka ti tak zet zet a ni. Pu Dy. Speaker, ka lawm e.

DEPUTY SPEAKER : Member zahawm tak Pu Lalchhuanthanga ka sawm e.

PU LALCHHUANTHANGA: Pu Dy. Speaker, ka lawm e.

Hei kan budget a general-in kan han sawiho a. Kan budget hi Pu Dy. Speaker, ka hmaa sawite kha chuan ‘budget tha tak; budget ropui tak a ni’ an ti a, i dinglam a mite hian. Budget hi vawi 15 vel an pharh tawhin ka ring a, chung an pharhah te chuan ‘budget tha tak; budget ropui tak’ tiin kan pass hnan thin a. Amaherawhchu, sorkar department-ah hian hlawhtlinna emaw, intodelhnaah emaw hian kan la hlawhchham si a; artui-ah pawh kan la intodelh chuang lo a ni. ‘Budget tha tak’ tia kan pass hian kuthnathawktute hnenah hlawhtlinna kan la thlentir thei tlat lo a ni.

Hei, kan hria a; khawvelah indona thu thang te, ram ropui leh ram lian te an indo a, indo te pawh an tin-tuah mek a ni. Chutiang ang harsatna te chu lo thleng ta se la, “cheng vaibelchhe ₹1 hi engtihna nge ni ang le” ka ti a; covid hri a lo len dawn khan kan hre vek tawh a ni. Mizoram-ah a lo len tlai avangin kan hre har; a lo thlen tlai avang khan hriat lawkna kan nei a, keini ZPM-MLA te chuan, “special session nei ila, kan budget te hi helam pang hrileng tur venna atan hian re-appropriate I la, hri dona tur hian kan budget te hi i sawi rem ang u,” tiin Governor hnenah special session ko turin kan ngen a ni.

Amaherawhchu, Special Session kha min koh sak duh lova. Tichuan, hri chu a lo leng ta a, kan buai ta hle mai. Sorkar hnathawk ten an hlawh te an chhungkhawm a; NGO ten theih ang tawk tawkin an chhungkhawm a; mimalte pawhin donation pawisa an rawn thawhkhawm teuh a ni. Keini MLA pawhin kan MLA fund cheng nuai ₹40 bakah, kan hlawh atang te leh fund dang atang tein kan hmang a, kan tangrual khawp mai a. Thingtlang lam atangin kuthnathawktu mi harsa tete te pawhin ‘chawhmeh tur kan nei lovang’ tih hlauin an theih ang tawk tawkin an rawn thawhkhawm a ni. |Chung kan relief fund tlingkhawm chu a tam khawp mai a.

Amaherawhchu, khang kan sum neih te kha relief fund-ah hmang lovin sorkar inrelbawl nan, State-level task force te inrelbawl na atan kan hmang ta teuh mai a. A dik tak chuan covid-ah khan kan budget atangin 1% pawh kan hmang lo a ni. State dangah te chuan an budget atang hian pawisa tam tak an seng a. Khatiang kha a nih avangin, tuna emergency case atana cheng vaibelchhe ₹1 kan dah hi a iaiawm em-em a ni. Hrileng leh harsatna kha lo thleng leh ta se la, engtin nge kan hmachhawn ang? Kan NGO te, kan Kohhran te, kan sorkar hnathawk te kutah kan innghat leh mai dawn em ni?

Hei, ka biala chhunga Mission Veng Kohhran te kha an ti tha thlawt a ni. An Kohhran hmunhma zawng zawng an hmang a, task force an din a, 'task force te in inthlahrung ang e, engmah sawi suh u' an ti a, an dil piah lam thleng-thleng, a nuai telin an pe a ni. Chu chang a ni lova, veng dangah te pawh an luangchhuak a ni. Chutiang khawp chuan kha hrileng kha kan vei a, kan do a ni. Amaherawhchu, sorkar chuan kan budget atangin 1% pawh kan hmang tling lo. Khatiing khawp khan hrilengin min tuam a, lungngaihna chhumpuiin min tuam tak meuh-meuh a. Kan MLA zahawm tak Pu Zodintluanga Ralte khan Lunglei lam tan RTPCR a lei a, amaherawhchu, chhuanlam chi hrang-hrang siama a khawl kan bun duh lo te kha a mak ka ti a, a humanity lo riau ka ti a. Kan mihring puite chungah zahngaihna leh lainatna pawh kan lantir thei ta lo em ni, party dang thiltih a nih avang khan? A pawl lutuk a ni. Khatiing huna khawl awm sa han din mai theih tur din lova a awm kha chhim lam mipui tan chuan theihngilh a harsa duh ngawtin ka ring.

Pu Dy. Speaker, hun hi ka la dil belh ngai lo che a, tlem te in min pek belh chuan ka lawm hle ang.

Kan sawi ang khan - kan budget atangin 1% pawh kan hman loh laiin, kan mi duhsak zawng - Kamrula te, Pu Zoramchhana te chuan hna thawh tur an haihchham lova, an thawk reng a, an bill a tang lo a ni.

Thil pakhat mak deuh mai chu - hri a lo leng a, Health Department te pawh inbuatsaiha an buai em-em lain, quarter khat (thla thum) pawh a tlin hma in audit a ni a; khatiing audit kha ka la hriat ngailoh a ni a. Audit hi kum khat dana tih thin a ni a, quarter khat pawh an hman tlin hmain audit anni a. Chung avang te chuan a ni ang e, Health Department khan budget sum an khawih theih loh ni.

Ka duh tawk mai ang a, Pu Dy. Speaker, hun a tawp tawh a. He kan budget speech-a *emergency case* a tana pawisa dah hi a tihpun theih deuh em? Kan lo hmang lo a nih pawhin lawmawmah ngai ta ila. 'Revenue surplus 417 lai kan neihah hian tih theih dan a awm em' tih rawtna ka han siama a. A tlangkawm nan chuan - Kan budget hi 'budget pangngai, hlawhtlinna awm chuang tur si lo, development atana hmachhawp awm chuang si lo' niin ka hria a, kei chuan pawm har ka ti e.

DEPUTY SPEAKER : Tunge sawi leh ang le? Minute 5 kan la nei a; sawi tur kan awm tawh lo a ni maw?

Awle, tun atang chuan kan chawl ang a, chawhnu dar 2:00-ah kan chhunzawm leh dawn nia.

(Recess till 2 PM)

2:00 PM

DEPUTY SPEAKER : Kan budget - General Discussion kan chhunzawm leh ang a. Tunge sawi leh ang le?

Member zahawm tak Dr. ZR Thiamsanga ka sawm e.

DR. ZR. THIAM SANGA : Pu Dy. Speaker ka lawm e.

Kan Chief Minister zahawm tak leh Finance Minister ni bawkin kum 2023-2024 Mizoram Budget estimate a rawn pharh takah khan mipuite tana hamthatna tur leh Mizoram hmasawna tur tam tak a rawn tarlang a.

Kan hriat angin Covid-19 hripui leng vangin sum leh paiah ramin nasa takin harsatna kan tawk a. Keini ram mai ni lovin, kan hriat angin khawthlang ram, ram hausa tak takte pawhin harsatna an tawk a. Thomas Schaefer, German Finance Minister, Hesse State ami ngei pawh kha an ram economy covid ina tichhiat nasat avang khan ama nunna a la hial anih kha! Chutiang bawkin, France ram Prime Minister pawhin covid avanga sum leh paia an harsatna avangin amah leh amah a intihlum bawk a, a pawh khawp mai. India ramah pawh hian National Crime Record Bureau-in a tarlan danin, kum 2020 chhung khan business person mi 11,000 chuang zetin mahni nunna an la hial a ni; India ram economy a tlakhniam avang leh sumdawna te a that loh avangin. Chutiang chuan, harsatna namen-lo kan ram pawhin kan tawk a, kan Chief Minister ngei pawhin, “kan dam khaw chhuahna hi a pawimawh ber a ni; development chu a nih-nihin lo ni mai rawh se” a ti a. Chutiang chuan kum 2 chhung ngawt mai harsatna kan tawk chung pawha hetiana budget puitling tak leh tha tak a rawn pharh thei hi a lawmawm takzetin ka hria a. A bik takin kan Finance Minister - kan Chief Minister leh a thawhpui Finance Department te an fakawm hlein ka hria a ni.

Pu Dy. Speaker, budget estimate-a a rawn sawi hi a vai chuan ka sawi seng dawn lova. Ka ngaih pawimawh zual rawn tarlang ve ila.

Pakhatna-ah chuan, SEDP atana cheng vaibelchhe 595 kum 2023-2024 budget-a dah a ni hi a lawmawm hlein ka hria a. Chung zingah chuan *family-oriented* cheng vaibelchhe 300 lai dah a ni a, a bakah *counter funding* atan cheng vaibelchhe 220 dah niin, heng scheme hrang hrang - CSS, EAP, NCDP, etc. atana hman tur a ni dawn a. Tin, kum kal mek 2022-2023 aia cheng vaibelchhe 220 lai maia kan han dah tam zawk te hi a lawmawm hlein ka hria.

Tin, healthcare scheme atana cheng vaibelchhe 50 dah a ni hi a lawmawm leh zual ka ti a. Tin, SEDP fund ah a tul ang-anga hman theih turin cheng vaibelchhe 25 dah a

ni te pawh hi a lawmawm hle a ni. Pu Dy. Speaker, he healthcare chungchangah hian, i phalna leh remtihhain han sawi belh lawk ka duh a.

Kan hriat angin Mizoram State - Healthcare hi MNF party sorkar hmasa-Pu Zoramthanga kaihhruai ina a rawn hrinchhuah a ni a, 'kan CM fahrin' kan ti lo theilo ang. Tichuan a bul tanna corpus fund-ah cheng vaibelchhe 50 dah a ni a. Tichuan, an sorkar laiin Asian Development Bank atangin cheng vaibelchhe 117 lai mai an han dil chhuak a, amaherawhchu sorkar-na tawp lamah a ni a, an sorkar chhung khan a rawn chhuak hman ta lova. Congress a sorkar khan cheng vaibelchhe 117-Asian Development Bank atanga dil kha a rawn chhuak ta a ni.

Tichuan, Pu Dy. Speaker, kan hriat angin Congress party kha an rawn sorkar ta a, khang hun lai kha chuan healthcare scheme-ah khan natna zawng-zawng kan bill thei lova, a tlangpuiin natna khirkhan deuh chi 160 vel a bill theih awrh kha a ni a. Tun MNF sorkarah hi chuan natna zawng-zawng deuhthaw kan bill thei a ni. Tin, kum 10 chhung Congress party sorkar lai khan Mizoram Healthcare - corpus fund atan cheng khat mah dah a ni lo kha pawl ka ti khawp mai a. Kum 10 chhung an sorkar lai khan, kumtin cheng vaibelchhe 50 lo dah ta ang se chu, tuna healthcare-a harsatna hi kan tawkin ka ring lo a ni.

Kum 2018 ah MNF an rawn sorkar leh a, 2019 ah kan CM chuan healthcare ngaipawhin cheng vaibelchhe 50 lai mai corpus fund atan a rawn dah leh kha a ropui ka ti. Amaherawhchu, tum dan phei chuan covid avanga buai lovin sorkar pangngai angin kal thei ta ila chu, kan CM hian kumtin cheng vaibelchhe 50 healthcare atan dah hi 'a duh dan a ni' tih kha Pu Dy. Speaker ka rawn sawi duh a.

Tichuan Congress party - kum 10 sorkar chhunga bill lut kha cheng vaibelchhe 16 vel niin, kum 5 chhung MNF sorkar chhunga bill rawn lut hi cheng vaibelchhe 65 vel a ni a, a inthlau hle a ni, kum 10 leh kum 5 chhunga luta kha. Chuvang chuan, healthcare-a in register pawh sorkar hmasaah kha chuan an tam lova, a mi 30,000 - 40,000 te, a tam ber laiin 70,000 leh tih a rawn hawlh a. Tun MNF sorkar - healthcare-a in register hi 1,13,720 lai a lo ni ta a. Tichuan, Congress sorkar - healthcare hnuuia damlo bill pekchhuah kha cheng vaibelchhe 82.8 leh tlem a chuang a, tun MNF sorkara kum 5 chhung kan pekchhuah hi cheng vaibelchhe 138 leh tih lai a ni.

Chuvangin, healthcare chungchangah hi chuan kan sorkar kan dem kan dem hi a dikin ka hre lova, theihtawp kan chhuah a, hun harsa tak karah pawh. Chu mai ni lovin, natna zawng zawng deuh thaw bill theihin kan han siam leh ta a. Tunah cheng vaibelchhe 60 erh-awrh kan la ba a, amaherawhchu, kan chief Minister te, kan Health Minister te leh Finance Department ten theihtawp an chhuah a, tunah hian Asian Development Bank atangin cheng vaibelchhe 1000 puk theihna tur an han ruahman leh

a. Pathian zarah kum te a lo tluan chhoh chuan, kum tawp lamah chuan a sum te pawh hmuh kan inbeisei a. Heng atang hian ba te pawh inrul thei turah ka ngai a ni.

Chu bakah chuan, healthcare atana kan CM-in Mizoram State Lottery atanga sum kan hmuh ve tur cheng vaibelchhe 10 a dah a, a vaiin cheng vaibelchhe 60 a ni a, hei hi a ropui hlein ka hria a. Kan Chief Minister leh kan sorkar hi Mizoram State - Healthcare mai ni lovin, Mizoram-in hriselna kawnga hma kan sawn theihna turin theihtawp a chhuah a, a bik takin thingtlang khuate pawhin inenkawlana an neih ve theihna tur - health clinic 230 chuang lai, sub-centre awm lohnaa siam a ni te hi a ropui a ni, Pu Dy. Speaker. Heng te hi kan lawm hle turah ka ngai a ni.

Chuvangin, kan sorkar hian ‘miretheite a ngaihven hle a ni’ tih hi ka sawi duh a. (Pu Dy. Speaker, hun a va tlem ve..) Tichuan, MLA Fund atan cheng vaibelchhe 60 lai mai dah a ni a. MLA Fund te phei chu kan hmang tangkai a, i veilama member-te pawhin an hmang tangkai em em a, i dinglana mite pawhin kan hmang tangkai a ni. Hengte hi sum harsa chung-chunga dah niin, kan CM hi a fakawm hlein ka hria a, opposition leh opposition lo pawhin angkhat vekin kan hmang tlang dawn a ni a, a lawmawm hlein ka hria.

Tin, State Matching Share - SSA hnuai 2023 - 2024 budget-a cheng vaibelchhe 38.27 a rawn dah te hi a lawmawm ka ti a. Tin, Mizoram sorkar - Council of Ministers ina SSA hnuai thawktute hlawh tihpun sak a han phalsak zui a, SMS-top-up atan cheng vaibelchhe 52.98 a han dahsak nghal te pawh hi a lawmawm hle mai; an lawm khawpin ka hria. Chuvangin, Pu Dy. Speaker, tun sorkar hi an vote leh ngei chuan ka ring a ni. Tichuan, he SSA-SMS normal top-up bik atana dah zawng-zawng cheng vaibelchhe 95.25 a ni te hi a lawmawm hle a ni.

Tin, *Women & Child Development* - ICDSS scheme kaltlanga hlawh la thinte sorkar laipuiin a tih tawp avanga thawktute rawih chhonzawm nan top-up SMS cheng vaibelchhe 8 zet mai kan sorkar hian a dah leh te hi thil lawmawm tak mai a ni. Chu bakah chuan, PMGSY hnuai ah inkalpawhna - rural connectivity kan sorkarin a ngaihpaawimawh zia tihlan nan PMGSY project hnuai State matching share - SMS atan a hranpaa cheng vaibelchhe 33 dah a ni te hi a lawmawm a, hei hi ram hmasawna leh inkalpawhna tha tak kan neih theih nan a tangkai hle dawn a ni.

Tin, Art & Culture Department hnuai atul anga hman tur cheng nuai 50 dah a ni te pawh hi, hei kan chhawr tan a, Chapchar Kut senso atan budget-head a hranpa a siam niin, a tul ang zela hman tur sum dah belh a ni te pawh hi, he sorkar hian kan hnam a chawi-hlut zia a chiang hlein ka hria.

Tichuanin, P&E Department hnuaiah Mizoram mipuite hnianghnar zawka power kan hmuh theih nan leh a chhit man tlawm zawk mipuiten kan chawi theihna tur *direct subsidy* atan cheng vaibelchhe 157.90 dah a ni te hi a lawmawm a ni.

Tichuan, hei, ka bial chhung a ni a; Sialkal Range Development Council atana sum dah cheng nuai 30.24 kha cheng nuai 224.55-a tihpun a ni a, kan bial SRDC area chhunga mite tan chuan thil lawmawm tak a ni. Tunah rih chuan hripui hi reh deuh hlekin, Mizoram-ah pawh case pakhatmah kan nei tawh rih lova; India ramah chuan eng emawzat an la awm a, thi pawh an la awm zeuh zeuh a. Amaherawhchu, eng emaw thleng leh thut thei laka invenna atan cheng vaibelchhe khat ngawt mai a dah a ni te hi a thlamuanthlak hle a ni. Pu Dy. Speaker, central sum lokal ringa khawsa kan nih avang leh harsatna hrang hrangin min chimbuaina karah pawh, hetiang budget puitling kan han pharh thei hian hmasawna min thlen ngei ka ring a. Kum te a lo tha tawh ang a, state-matching share eng emawzat te pawh kan dah tawh a, nunphung pangngaia ding tawh turah inbeisei ila. Kum 2023-2024 Mizoram budget hi ram hmasawna leh tihchangtlun nan ka rawn support a, hei hi pass ngei turin ka rawn rawt nghal a ni e. Pu Dy. Speaker, ka lawm e.

DEPUTY SPEAKER : Tunge sawi leh ang le? Member zahawm tak Er. H. Lalzirliana ka sawm e.

ER. H. LALZIRLIANA : Pu Dy. Speaker ka lawm e.

Hei, 8th Legislative Assembly ina budget-general discussion a neih ni hnukung berah hian hun ka neih ve avangin ka lawm hle a. Hei hi keini ang duang tan hi chuan, ‘kan dam chhunga kan sawi chhun’ a ni lovang tih pawh a sawi theih lova. Chuvang chuan, hun tam deuh te hi han nei thei ila a chakawm khawp mai a. Engpawh nisela, hun min pek ang-angah han sawi chhoh ka han tum ang a.

Budget vawiinnia kan sawi hi ‘Mizoram State Budget’ a ni a. Budget hi chihnih - *State Budget* leh *Union Budget* kan nei a, ‘Union Budget-ah hian keini State Budget hi a tel ve a ni’ tih hi kan hriat a thain ka hria a. Vawiinniah hian mi sawi loh dan deuhin ka rawn sawi maithei a. Chu Union Budget-ah chuan keimahni *fair-share* a hi a inbilh tel ve vek a ni tih hi kan hriat a ngai a. Kan Chief Minister zahawm tak, smart tak leh kan Minister-te bakah kan official-te hian he kan Union Budget a kan fair-share tura hi an haichhuak thiam ang tih hi ka ring tlat bawk a ni. Union Budget hi kan budget anih ve si avangin tlem han sawilan ve a thain ka hria a.

Kan Finance Minister Pi Sitarami khan 1st February khan Union Budget a pharh a, chu chu *Amrit Kaal*, ‘Amrit Kaal’ tih kha a sawilang ngun viau a ni. ‘Amrit Kaal’ chu India ram zalenna kan neih atanga kum 75 na - *Azadi ka Amrit Mohatsav* kan tih atanga another 25 years; kum 100 a tlinna tura kalpuina-ruahmanna kawng hrang hrang

ruahman chhohna budget a ni a. He budget hi kumdang zawng ai pawha keima phak tawka ka lo thlir ve leh ka lo analyze ve ah chuan, budget lawmawm leh hmathlir thui tak, development atan phei chuan a tha lawr lak niin ka hria a. India ram economy hi khawvelah pawh economy future bright ber pawl kan lo ni a. Tuna kan economic growth hi 7% tura estimate a ni. Chu chu major economists ram hrang hrangte zingah pawh a sang ber pawla ngaih a ni a. Covid 19 avang te, indona avang te leh thil hrang hrang avang tein duh angin khawsak theih loh mahsela, he budget hi keini tan phei chuan lawmawm tak a ni. North East te, keini hnam hnufual tan phei chuan he budget-ah hian beisei tur tam tak kan nei a ni a.

Chu Central Union Budget-ah chuan priorities 7 set a ni a, priority *pakhatna* chu ‘Inclusive Development’ niin, chutah chuan he philosophy sorkarin a kalpui *Sap Ke Sath, Sab ka Vikash* - mi zawng zawng tan he budget-ah hian OBC, SC/ST, economically weaker sectors, farmers, hmeichhia, thalaite leh under privileged ho tana ruahmanna heng zawng zawng huapzo tura ruahmanna siam a ni a.

Priority *pahnihna* chu, ‘reaching the last mile’ a ti a; chutah chuan sorkar hian scheme hrang hrangte siamin hnam hnufual zawkte hmun hla tak leh a kilkhawr ber pawh thleng thei tura he program hi chi hrang hrang siam a ni a. Ministry of DoNER te a rawn piang chho a, Vajpayee PM hunlai atang tawh leh he Modi Era ah pawh hian hei hi kalchhoh pui mek a ni a ni.

Priority *pathumna* chu, ‘Infrastructure investment’ niin, capital investment a tan hian 33% growth-a siam a, 10 lacs, crore rupees he investment atan hian a dah tawp a, chutah chuan state hrang hrang bakah keini North East mite tan ruahmanna a awm a. Airport ringawt pawh 50 a thar siam tur leh hospital nursing college te pawh siam chhoh tur a ni. Tin, priority *palina* chu ‘unleashing the potential’ a ti a, chutah chuan Dan hmanga criminal case awm thei ang chi te khatiang thil tullo ang chi nuaibo theihna scheme te a ni a. Tin, priority *pangana* – ‘green growth’ a ti a, green hydrogen mission te, energy transition te, agriculture lam te a hawi nasa a. Tin, priority *parukna* chu, ‘youth power’ a ti a, a chipchiar chuan kan sawi seng lova. Tin, priority *pasarihna* chu, ‘financial sectors’ niin, khang priority hrang hrang kha an rawn set a ni.

Tichuan, kan budget kalphung chu kan hre vek a, *revenue* leh *receipt* a ni mai a. Expenditure leh revenue hmuhna turah hian a lawmawm ka tih em em chu - kan state owned-tax revenue ah hian 35% pungin keimahni *own-revenue* hi kan han tipung a. Tichuan, state owned non-tax ah 20.98%-a pungin kan han siam a, hei, tax devolution atanga te leh grant-in-aid atanga kan hmuh tur ang te a ni a. Tin, grant-in-aid atanga kan hmuh turah hian kan hriat tur chu - nikum khan cheng vaibelchhe 1,615 bawr vel kan hmu a, tunah hian cheng vaibelchhe 1,474 a ni a, vaibelchhe 141 in a hniam a ni. Nakumah chuan hei pawh hi a hniam belh leh ang. Hei hi *punch-line* a ni a, kan alert a ngaiin ka hria a, central atang hian he ‘post-devolution deficit’ hi a hniam thla tulh tulh

dawn a ni. Chuvang chuan, ‘keimahni own revenue hi kan generate tam ve a ngai a ni’ tih hi Zoram mipuite leh helaia rorel khawla thute hian kan chian hle a ngai a ni. Chu chu, kan hmuh tura kan beisei cheng vaibelchhe 11,486 te zinga mi a ni a. Chutah chuan, capital receipt-ah hian thil pahnih - ‘loan recoveries’ tih te leh ‘loan and advances’ te a awm a, heta kan budget-a kan vote tur te pawh a rawn lang a ni.

Vawiinah hian ka rawn sawi duh ber zawk chu - a bu chhung thu hi chu engpawh ni sela, hemi kan hmanna tur ‘sectoral allocation’ hrang hrang kan nei a - General service - 38.00%, social service - 31.6%, economic service - 19.79%, other allocations - 10.07%. SEDP te, inthlan senso tur te, MLA fund te, tin, SSA lama hman tur te, PMGSY doletna tur te, a detail kha chu a awm a ni.

Tichuan, Pu Dy. Speaker, Mizoram-ah chuan kan revenue han tisang viau turin tax pe lo kan ni tlat mai a. Income tax kan pe ngai lova, tin, thil tam tak - buhfai te, electric leh tui te pawh subsidy veka la khawsa kan ni a. Mizoram-a kan thawhlawm leh sum leh pai luhna tam ber chu *kohhran* a ni a, kohhrante an fakawm hle a, covid do chungchangah te leh thil hrang hrangah, hmun tin veng tina kohhran te hi an fakawm em em a ni.

Chutih mek lai chuan, chhungkaw tinte kan sum leh pai luhkhawmna ber ‘kan tax’ kan ti ve mai ang chu, (tax chu a ni lova) kan thawhlawm a ni a, hetah hian sorkar leh kohhrante hi hei aia tha zawk hian thawhhona tha nei thei ta ila. Development chungchangah te veng, khawchung leh ram development tur thleng hian kan thawh hona tha sela. *Entirnan* - veng khatah kohhran hrang hrang kan awm a, pahnih te, pathum te kan awm a ni. Hengte nen hian thawh hona tha nei ila, ‘kumin chhungin cheng chuti zah chu he kan veng develop nan hian in hmang ve teh ang’ emaw, ‘kan culvert chhia repair nan’ tih emaw, ‘kawng thalo siamrem nan’ tih ang chi te, hetiang te hian han inpeizawn thei phei ila chuan nasa zawkin he kan development pawh hi a thawk thei ang tih ka ring a, mi tam tak ngaihtuahna a lo kal theih nan.

Tin, kan sawi ang khan, central-a kan hmuh tur a tlak hniam ve zel si avangin, state te hi mahni intodelh turin central hian min beisei zel a ni. Chutihlai karah chuan, kan sorkar hi hengah te hian corporate type a kan kal chhoh hret hret, kan in manage chhoh hret hret pawh hi a pawimawh dawn hlein ka hria. Central atanga sum kan hmuh te hi ‘engtin nge kan lo invest ang; cheng khat kan hmuh hi engtin nge cheng khat duli emaw, cheng hnihah emaw kan siam theih ang’ ti zawnga rilru pu hian vawiina mipuite leh sorkar hi kan kal chhoh theih zel beiseina ka nei a. **(Dy. Speaker:** I zo thei dawn taw hem aw?) Kan thawh khawma kan pek tam hian keimahniah pawh *sense of ownership* a awm a, chu chuan nasa takin thahnem ngaihna te, tha duhna te, thikthu chhiatna te a pe a, chu chuan hmasawmna a rawn keng tel a ni.

Kan vote tur *charged expenditure* hi cheng vaibelchhe 12,112.97 a niin ka hria a, hei hi a tha ka ti a, karawn thlawp a ni e. Pu Dy. Speaker, ka lawm e.

DEPUTY SPEAKER : Tunge sawi leh tur? Awle, Member zahawm tak Dr. Vanlalhlana ka sawm e.

DR. VANLALTHLANA : Pu Dy. Speaker, ka lawm e. General discussion a ni a; general tak, tluangtlam taka han sawi te pawh a chakawm viau a, amaherawhchu, beiseina deuh hi a awm ve thin a, i dinglama mite pawh khan min beisei viau maithei a.

Hlawm thuma han sawi phawt ka duh a, budget kal tawh atang ten kan budget pawimawhna hi a nep viauin ka hria a, khawiah emaw hmun khatah kan dahkhawm a, 'khawnpui' kan ti a, sorkarin kalphung a siam dan – 'engtin nge kan kal dawn; engtin nge kumtharah hian sorkar sum, mipui sum hi kan kalpui dawn' tih hi a lang tlem khawp mai a. Kan kal tumna ber nia lang ta deuh ber chu 'SEDP' hi a ni a; chu lah chu party hovin an insem zo ni mai turah ka ngai a, a ngaihtuatu ah pawh party hruaitute kan indah a, ti khan a kalphung awm dan tur 'form 1, 2, 3, 4 a awm a, chutiang chuan kan kalpui em' tih te pawh en a ngai viau a. Tin, SEDP policy bu kan nei a, 'chutiang chuan kan kalpui em' tih te en manglo hian kan kal ni hian ka hria a.

Vawiinah hian *hlawm-thum* karawn sawi dawn ka tih kha. A hlawm *pakhatna* chu – 'Covid-19 hi chhuanlamah i siam tawh lo ang u' ka ti duh a ni. Ka sawi leh ang - Covid-19 hi chhuanlam a tling tawh lo. Sorkarin sum kan dawn ve, kan duha kan baia, kan duha kan kan theih pawisa hi a awm a ni. Chungte chu devolution of taxes, sorkar laipuiin chhiah tlingkhawm atangin state ho dawn tur kha a lo dahkhawm a, chu chu ₹100/- ni ta sela, Mizoram hian *duli* kan chang ve thei a ni, ₹100/- atang khan. Chumi kan dawn chu, kum 2019-20 atangin kan chhut sak zawk ang a; hripui awm hma kha chhuanlamah a tel tlat; nikumah khan. Kan dawng kimlo tehlu mai. Kumin revise estimate nen chuan vaibelchhia ₹267,74,00,000/- in kan dawng kimlo a ni. A awm viau e. Amaherawhchu, state hian chhiah kan la ve a, state owned-tax revenue a awm a ni. Chumiah chuan engzat nge kan dawn? Kan budget aiin kan dawng tam daih a ni; kha kha kan sawi duh thin lova. Vaibelchhe ₹448,3,00,000 in kan khum tlat a ni. Kha kha i sawi ve ang u. Lehlan chauh kan sawi a, engati nge chhuanlama kan hman ziah?

Tin, sorkar hian non-tax-revenue a nei ve leh a, traffic-a chawi te, tui bill te pawh a niang chu; chung atang chuan sum kan hmu a, chu pawh chu a kiam ve tho a ni; chhuanlam chu a tling ve tho. Vaibelchhia ₹169,74,00,000/- in kan pha lo a ni. Amaherawhchu, 15th Finance Commission-in post-devolution revenue deficit grant an ti a, nichinah pawh kan sawi, thlahniam zel, khami min pek kha, budget document kha lo en rawh ula, 2020 - 2021 ah khan cheng vaibelchhe 211 in min pekbelh tlat a ni; budget document hi a diklo a nih loh chuan.

(*Pu Lalrindika Ralte, Chairman in Chair a la a..*)

Pu Chairman, budget document hi a diklo la nih ngawt loh chuan, vaibelchhe ₹211,48,00,000/- kan hmuh belh tlat a ni. Chuti a nih chuan, leiba kha kan lak belh thei a, chu pawh chu 'revenue deficit grant' ka tih, devolution of taxes tling-khawma kan dawn a tlem avang khan sorkarin 'GSDP atangin .5 (percent chanve) in puk belh thei' a ti a, pawisa pawh kan puk belh nual a lawm, *Ways and Means* advance te; chu chu sawi tel lo leh nghal ila, chu thil pali chhiah tling-khawm kan lo dawn ve - state chhunga chhiah kan lo lak te, state chhunga chhiah ni lem lo, *fine* ang chi kan lak te; post-devolution revenue deficit grants kan dawn kimlohna leh kan dawn belh kha rawn chhut ve rawh u; vaibelchhe ₹221,89,00,000/- in a pel daih a ni; kan dawn belh tlat. Engatinge chhuanlama kan siam fo? Chhuanlam siam hi a awl in a nuam a ni ang; sum kan hman thiamloh chhuanlamah engatinge kan hman fo? Kan inngaihtuah chian a ngai hle mai, Pu Chairman.

Nikum budget-ah khan 'vaibelchhe ₹2,632 kan dawng kim lo' tih kha tarlan a ni a, a awm viau mai. Tunah chuan *data* thar a awm tawh; kha kha chu i sawi fo lo ang u. Vaibelchhe ₹2,632/- kha awmzia a awm tawh lo; tunah chuan thil kan dawn belh leh teuh tawh a, 'chhuanlam a tlinglo' tih kha ka sawi duh a ni. Sum lama kan harsatna chhan chu - hotupa berin sum enkawl lamah ngaihtuahna a seng tawk lo a ni mai. MLA, helam pangah minister tih loah chuan naupang ber ka ni a, a lal ber kawr hakloh a naupang berin kan sawichhuah a ngai te pawh a ni mahna; a hreawm khawp mai! Bula mi ten kan fak kan fak a; a tak hi i sawi ang u. Consultancy lem hmangin contract kan inpe reng tho a ni lawm ni? Airport pawh kan sa thei tho a ni lawm ni? Airport sak nan khuan central sum kan hmang bik hlei nem; State chhunga sum SEDP alawm kan hman teuh. Engatinge kan insum si loh? 'Nuaih thum kan sem ang' in ti a, kan sem theihloh chhanah Covid kan puh a, family-base kan kalpui hma khan SEDP hnuaiah hian vaibelchhe sanghni chuang kan lo kalpui tawh a ni lawm ni? Vaibelchhe sanghni chuang khan engzatnge kan sem theih ang? ₹25,000/- aia sang hi chu kan sem thei a, kan tum loh vang leh chhuanlamah Covid kan neih vang a ni.

15th Finance Commission-in vaibelchhia ₹546 kum 2021-ah special grant in min pek tur a nei a, 'kan dawng lo' tih te chu kan hre tho. Amaherawhchu, Finance Commission Grant hi 'tih ngei ngei tur a ni lo' tih kan hria; kan insiamrem a ngai a ni mai. Loan kan lak nen phei chuan a in hand tawh lo lutuk tho a, hlawh pek tlai nikhat dawn leh ni sawm panga dawn te kan sawi mam a; inluah man pek a ngai, tui bill, electric bill, bank loan thlengin pek a ngai a; kan credit score te a tibuai vek a, engatinge kan sawi mam leh si? Pu Chairman, awi tur ka ngah khawp mai!

A hlawm *pahnihna*-ah chuan - kum 10 chhunga leiba ngah bera min siamtu khan tunah kum 3 a zawnin leiba ngah ber ah min siam leh a. Nikumah kan inhnial a, chuta

kan Home Minister zahawmtakina min thelhna chu - RBA Data a ni. RBA Data thar ber khu en rawh u. (**Chairman:** Hun a tawp a..)

Pu Chairman, midang pawh khan minute 3 te an lak belh a, hei chu a pawimawh tlat. Tunhnai kum 3 chhung, 2020-2023 budget estimate nen khan India rama leiba ngah ber kan ni leh tawh a, kan Finance Minister, kan Chief Minister zahawmtak tarmit hi vuah ta ila; engatinge HIV/Aids vei tam ber te kan in tih? Kan tam reng reng hlei nem, a number-a kan sawi dawn te chuan. Kan forest area te hi ‘a tam’ kan ti, a area-a teh a ni a; mahse Maharashtra forest area chanve-chanve leh chhawng pawh kan pha hlei nem. Chuti chungchuan tarmit kan vuah lui a, kan insawi thain kan insawi mam lui a, chu chu kan awmdan a ni.

Pu Chairman, sawi tur a tam khawp mai. Ka inbuatsaih hnem khawp mai a, mahse duhtawh tan tawh dawn mai ila.

Thil pakhat te ka han tarlan duh chu - Ram hian hma a sawn theihna tur atan Economic Services hi a mamawh a ni. Chu Economic Services-ah chuan State hian eng hma nge lak a tum ve lo en rawh u. Agriculture-ah hian nuaih khat chiah a awm; a bak chu Economic Services-a capital expenditure/capital outlay-ah khan State-in tum ve engmah a nei hlei nem! Central atanga inkhaiding ringawt kan tum chuan engtin nge ni ang? Kumthar thusawiah ‘*ei leh bar intodelh*’ kan ti dum dum a, khawiah nge a tak chu? ‘Engnge kan tih ve dawn’ tih hi rilru senga kan ngaihtuah a ngai. Budget hi heti laia kut bena pass mai hi a ni lo, Pu Chairman.

A tawp ber atan chuan - hei hun te a chep thin a; budget kan sawi a, minute 10 hi a rei lo thin khawp mai. Hun thawl zawk te neiha debate ka chak ngawt mai. Healthcare scheme, Covid, restricted tender chungchangte budget-ah ‘eng priority nge kan pek’ tih te hi hun thawl zawk neia tih hi ka chak khawp mai. Ka lawm e.

CHAIRMAN : Hun a pel nual mai a, hun hi kan duhthlan a ni tih hria ila. Aw le, Pu Lalrintluanga Sailo ilo sawm ang u.

PU LALRINTLUANGA SAILO: Pu Chairman, ka lawm e. Vawiin hi kan Chief Minister, kan Finance Deptt. changtu ni bawh Demand - General Discussion a ni a; a pawimawh hlein ka hria a. Pu Chairman, kan sawi duh dan erawh chu a in ang lo hle a ni.

Kha, ka hmaa Member zahawmtak te khan, “Covid-19 hi chhuanlam a tling tawh lo” te an han ti ngawt a; Covid-19 hi chhuanlam a tlin zia khawvel hian a hria a ni. “Khawvel ram pumpui hi Covid avang hian harsatna vawiin thleng hian kan la tawh a ni tih hi sawi ngai lo a kan hriat a ni” ti zawk sela, a thain ka han hre deuh a. Tin, Airport-ah te khan nuam tawl ang deuha central funding emaw, fund dang hmu lova SEDP

atanga hmu ang deuh khan an han sawi a. Pu Chairman, i remtihain hei hi NESIDS ina vaibelchhe ₹19.59 a rawn release-na a ni. Khatiang khan thudik chanve hmanga thu an rawn sawi thin hi a pawl hlein ka hria a. chuvang chuan, SEDP atang ngawta sawi kha a ni lova, vawiinah hian a thutiam ding tlat mi kan Chief Minister, Finance changtu kan nei hi lawmawm kan ti a, SEDP pawh 'kan sorkar chuan kan sem ang' titu kha a ni a, budget hmasa ber, 2019-2020 budget-ah pawh a rawn reflect nghal vek a; 2020-2021 ah te rawn ti zelin vawiin ni thlengin budget vawi 4 kan thu tawh a, he sorkarna hnuaih hian, SEDP-a ram develop a tum zia a lo lang vek a ni; sawi a ngai lova, a bu kan kawl theuhin ka hria a. Chuvang chuan, mahni thusawia ding tlat CM Mizoram-ah hian kan nei niin ka hria a. Vawiin nia a thusawiah hian, thil harsa tak chung a tih puitlin a tumzia te a lo lang thin hi lawmawm ka ti a ni.

Tin, chutih rual chuan central India sorkar meuh pawhin Covid avanga kum 2 chhung ngawt MP - Area Development Fund a pek theih loh lain, keini hi kan Finance Minister zahawm tak hian harsatna nei miah lovin vawiin ni thleng hian min la pe zat zat a ni. 'Hengte hi fak tlak a ni dawn lawm ni' ka ti a ni. Covid karah pawh central-a MP mi 500 rual, Upper House-ah phei chuan 700 chuang anni a, khangte khan fund kum 2 chhung an dawn loh lain keini chuan harsatna nei miah lovin fund kan nei a, hei hi financial management thiam vang a ni dawn lawm ni? Mahni thla hlawh leh family finance bak khawih ngai lo te hian 'a thiam lo' kan han ti ngawt mai te hi chu a zia lo deuh chuan ka hria a ni.

Covid-19 ah pawh nuaih ₹27,000/- chuang 'kan dawng lo' ti siin, a hnuah "kan dawng a lawm!" tih chu thil dang daih a ni. *Entirnan* - patlingin thla tin ₹10,000/- kan hlawh a, sorkar atangin ₹2,000/- min pe kim ta lova, damlo kan nan ₹2,000/- aia tam ₹5,000/- pawh min pe sela, a nihna tur ang khan a kal thei tawh lo tih hre rual kan ni tawh lawm ni, Pu Chairman? Kan sawi duh dana hi 'kan thutna a zir hian a danglam vel mai-mai a ni lo maw' ka ti a. Chuvang chuan, vawiiniah hian Finance changtu ina harsa taka hetiang a han duang hi chu ropui ka ti a ni. Abik takin i vei lama mite pawhin hmanna an sawi hmasakah chuan, a vaia lawmthu hrilhna an nei lova, amaherawhchu, 16 crore lo lang - MLA Local Development Fund, No. 49 ami hi chu lawmthu an rawn sawi a ni. 'Mahni chan thatna tur zawng ringawta thil kan en a nih chuan, midang ta kan en tel thin lo a ni' tih a lang a; hei hi chu kan sim a tul awm mang e ka ti a ni.

Chutih rualin, hei budget speech-ah hian kum hmasaa an lo tih thin tawh angin cheng vaibelchhe 5 ngawt mai, MNF returnee la inbengbel lo tak takte tana kan ram Pa-berin a rawn dah leh hi a ropui hlein ka hria a. A thu maia inhmangaihsiak lovin a taka enkawltu a nih zia a rawn tarlang hi a lawmawm ka ti takzet a ni. Tin, chutihrual in SEDP-ah family-oriented scheme atan vaibelchhe ₹300 dah a ni leh te phei hi chu a lawmawm hle mai. SEDP kan thlan danah hian sawiseltu an awm a; cheng nuai 3 kan ti a, nuai 3 hi 'vawikhatah kan pe ang' tih hi khawi MNF-pa kam atangin a chhuak lo a ni. Kha kha chu continuous in kan sem mai dawn; term leh pawh hi kan sorkar leh dawn

a, 'kan sem chhonzawm dawn a ni' tih hi i veilama mite pawhin lo hria se la a thain ka hria a.

Chutihrial chuan All India Services bei mek lekhathiam fal deuh te chhawmdawl na atan tan nuai ₹50 dah a ni te hi, hmanni lawkah Golden Jubilee kan lawm a, Pu Chairman, a hmain khawi budget speech-ah mah a heng te hi lang ngai lo. Hetiang chianguang mang lova a hrelo zawkte bum tum fo mai hi a tulin ka hre lo. Tin, Samagra lamah cheng vaibelchhe 91.25 kan hmu phei hi chu keini thinglam lam bialtute tan chuan a lawmawm tak zet zet a ni. Kan bialah Samagra kan han din chho a, sorkar hamsa kan en chuan hlawh la mang lo kha a ni a; an lak loh rei ber pawhin he sorkar hi chuan eng emaw khaih lak avangin thla hnih hnuah te an han la zat zat a. Tunah phei chuan advance-in kan pek annih tur thu kan Minister zahawm takin a sawi te kha a lawmawm ka ti a.

Tin, NGO lam te pawh a lo lang a, cheng nuai 50 Art & Culture kaltlangin; hengte pawh hi a lawmawm ka ti a. Tin, chubakah power purchase-na atan cheng vaibelchhe 400 lo lang te; i veilama mi thenkhat khan 'a siamchhuah lamah in ti lo' te an ti a, kan siamchhuah ve khu maw, sorkar hmasa lamah pawh. Ka bial kal kawng Tlawng Lui kamah khuan a awm a, megawatt 1 siamchhuahna kha an rawn ti ve kha a ni a, 1984 kumah khan. Khang kha electric chungchanga kan ram tana thawk nasa berah propaganda ah chuan an sawi thin a ni a. Vawiinah hian 'chhuan loh tur an chhuang fo em' tih te min ngaihtuah tir a ni. Chuvang chuan, vawiina kan budget bu hi a lawmawm thawkhat chuan ka hria a.

Tin, water supply scheme - thingtlang lama tui harsatna te hriain vaibelchhe 27 ngawt dah a ni a. Tin, BDO office hawna a hman tur cheng nuai 20 dah ang te hi thil awm fo lo a ni. Hetah hian ka sawi duh chu - kan Chief Minister, kan finance enkawltu hi ram nu leh pa, pa-chan a chang takzetin ka hria a. Opposition bial ve-veah leh nghal, Pu Chairman, i bialah te an dah a ni a, kha kha a lawmawm dan a danglam a ni. I veilama mite hi sorkar se la an tih hi ka ring chiah lo. An movement leh tawngkam ka en hian huatnain an khatin ka hria a. Chuvang chuan, party bil ni lo, ram pum huapa ngaihtuahna tak tak senga henga hmalakna hi vawiinah hian lungawi ila, lawm hi a kim lutuk thei lo mihring kan nih chhungin. Chuvang chuan, kan nihna te hriaa heng hi kan pass pui ngei atan he House zahawm takah hian ka rawn dilpui a ni e. Ka lawm e.

CHAIRMAN : A lawmawm e. Dr. K. Pachhunga, Member zahawm tak ilo sawm ang.

DR. K. PACHHUNGA : Pu Chairman, ka lawm e. Hei, minute 10 ka nei a, helaiyah hian ka lo en ve ang a. Pu Chairman, i inhme hle mai, i hmeltha vuah mai a.

Kan hriat theuh angin kum tinin sorkar inrelbawl dan leh ‘development engtingge kan kalpui ang’ tih hi budget chu a ni mai a. Mithenkhat chuan a mawl zawk leh hrelo zawkte bum kan ching a, ‘budget an pass alawm; dil teuh rawh u’ an ti a. A awmzia chu – ‘ruahmanna, lo la awm tur a ni’ tih hi hrereng chungin mite an fuih pawrh a. Pu Chairman, i veilama mite hi piangthar deuh se thain ka hria a. Tin, kan session hi kan naute leh kan thiante pawhin an lo en thin a, “a ruling lam hi in dawih lutuk nge ni, indawh reng mai a, an rawn bauh hrep hrep che u a, kei chu ka thlang dawn lo reng reng” an ti.

He roelna sang ber, zahawm takah hian Pu Chairman, kan budget session tawpna ber tur a lo ni a tun term-ah chuan; min hruaina zawng zawngah Pathian hnenah lawmthu kan hrilh a. Tin, kan tawng soal te leh mi huatthu kan sawi te a awm maithei a, chungah te pawh kan inngaihdam a tha a. Assembly Secretariat staff ten kan welfare leh min enkawlnaah te an fel em em a, an entawntlak ka ti a, lawmthu ka sawi duh a ni. Tichuan, he budget hi ‘ruahmanna’ a nih angin a bua lang ngei pawh hi remchan lohna avangin tih danglam thei a la ni tih kan hria a. Mi thenkhat, pa-fing awm tak tak te pawh hian, ‘engatinge in va dah tlem ve, mamawh a tam si a’ an ti a; *vaibelchhia hlira vaibelchhia* dah kha kan chak a, mahse a lo ni ngawt lo a. Kum kal ta atanga kan sum hmuh dan, central pipeline-a a rawn kal dan te leh mipui atanga kan khawn tlingkhawm tur hisapa ruahmanna a ni a. Chuvang chuan, Zoram mipuite’n lo hria ula, ‘budget kan pass velah *pawisa a awm tun nghal e* tihna a ni lo’ tih kha; mite inbum tir loh a tha a ni.

Kan hriat angin kan state sorkar hian, tupawh sorkar se, kan la pachhe em em a, 10%, 11%, 12% tih te kan han thawkchhuak a; tuna kan budget-ah hian 13% thawhchhuah tum kan ni a. Chuvang chuan, ‘90% hi chu Delhi drip khai kan ni’ tih hi a phat theih loh a, tute pawh sorkar se, hei hi chu kan nihphung a ni a. A chhan ber chu - income tax kan la lova, chhiah kan pek dan pawh kan hria a, road tax leh leiman te a ni a. Tin, subsidy – sorkar chawibelhin buhfai, electric leh tui bill te a ni a. Nikuma PRS kan traininga Parliament-a mithiamte min hrilh dan chuan - Mizoram hian electric bill unit khatah cheng 1.50 kan chawi belh a, Arunachal Pradesh-in 10% deuh thaw an chawibelh bawh a ni. Assam erawh chu an intodelh a, ka sawisual maithei a. Nei lo ro ro, intodelh lo ro roah ‘kan che chhe lutuk lo’ a tih te kha mipuiin hria se la a tha ka ti a. ‘Centre for Policy Research’ an ti a, mithiam te’n India mipuite kan khawsakna dinhmun *Human Development Index*-an zirchiannaah chuan, Mizoram sorkar chu a hausa a ti lem lova, mahse mimal tin kan dinhmuna hi India ram state hrang hrang zingah ‘a tha ber’ tih kan ni a, North East-ah pahnih - Sikkim leh Mizoram chiah kan awm ni. Haryana leh South India lam mipuite nen level khatah kan awm a, kan mipuite dinhmun hi a chhe lem lo a ni. Tute emaw lalna leh thuneihna duh vangin theihtawpin tun sorkar leh sorkar hmasaa kan hruaitute theihtawpin kan sawichhia a, mipui kan dinhmun zirchian hian kan dinhmun hi India ramah pawh a zahpuiawm lova, tun

dinhmun min hruai thlengtute chu vawiin a kan Chief Minister leh kan Chief Minister lo ni tawh te an ni.

Tin, Pu Chairman, kan sorkarin zirtirtu indaihloh zia hriain SEPD teacher-te min pe a, MR teacher a sang tel kan han la thei te hi, he hun khirh leh harsa karah a fak loh theih loh a ni. Chutiang zelin buhfai a harsa lo a, mi rethei berte inhlawhna job card-ah Ni zaa za pe thei sorkar a ni tih hi bengngawng pawhin an hriat a ngai a ni. Sorkar hmasa 2014-ah khan kan veng leh kan thenawm vengah te pawh Ni 45 chiah an pe a; chutiang chuan he sorkar hian mipui mamawh a ngaihtuah a ni.

Healthcare chungchangah pawh kan hria a; ka sawi duha chu - sorkarah engkim kan beisei a; kan thenawmah leimin sela, ‘sorkar a va che lo ve’ kan ti a; engkim mai sorkar tihtir kan tum vek mai hi chu Mizo mipuite pawh hi kan insiamthat a ngai a ni. Sorkar in a ti seng bik lova, mimal leh khawtlang, kan NGO te pawh an fakawm a. Kohhran te avangin kan living condition te, awareness avang te pawhin kan fing a ni.

Pu Chairman, kan hriat angin college zirlaite pawh kan budget hian a ngaipawimawh tak zet a, an fee te pawh pek let, eng emawzata tanpui let te, an inrelbawlina atan he sorkar hian zirlai thalaite education a ngaipawimawh zia ka bialah hian chiang takin a lang a ni. Kum 10 kal ta sorkar hmasa khan ‘world-class education’ kan au chhuahpui a, mahse ka biala school buildingte chu thlahrang awmna angin a chhe lutuk vek a ni. Mahse tunah theihtawpin kan Education Minister zarah eng emaw zat kan repair a, kan la tiseng ngang lova, 100-a 50 hi chu hmuhtlakin a awm ve tawh a ni.

Hei NGO kan hria a, kan sorkar chu ‘ruihhlo, chu ti-kha ti, smuggling sorkar; kuhva tawlh sorkar’ kan ti vak vak a, a nihna takah chuan America meuh pawh hian drugs, an rama lut tur a la dang thei lo a ni. Hmanraw tha - technology leh sum engkim nei America pawhin a dang seng lova, tu pawh sorkar se, a lut reng dawn a. ‘Sorkarin hma a la lo’ an ti a; a la a ni ang chu, tv-news ah te an man nasat zia kan hmu a ni. YMA te pawhin theihtawp a chhuah a, an fakawm a, mahsela, thuneihna leh lalna kan duh avangin mipuite kan bum a, ‘smuggling sorkar, chu ti kha ti; Kuhva tawlh sorkar’ te an ti a; anih leh tutenge sorkar hmasaa Kolasib DC ina Vairengte tlang dung zawng-zawnga kuhva a mantute kha? Han indem vak tur kan awm em le? He ruihhlo leh smuggling te dang tur hian kan zavaia tan tlan a ngai a ni. He sorkar hian Mizo mipuite mamawh zawng zawng a pe seng bik lova, mahse mipui tan a in dedicate a, zirna theihtawpin chawikan a tum a, building te, teachers te, tin, healthcare te, SEDP-health-worker te; chutiang chuanin kawngpui pawh theihtawp a chhuah a.

Tin, “Covid 19 chhuanlam tling lo” han tih te chu, engnge maw kan hriat tak le? Covid avangin rel a service thei lova, thlawhna a service thei lova, hotel zawng zawng shutdown a ni a; engtinngge kan tax contributor ten dawr an hawn siloh chuan a effect lo

em ni? Hetiang zirtirna hian kan ram hi tunah a luah mek a ni. Thudik tak sawi a ngai; kan mipuite hi i bum lo ang u; an khawngaihthlak a ni. Chutiingin official tute pawh hian dik takin hna thawk ila, 'hma kan sawn lo' han tih te chu; hma kan sawn nasa lutuk. Keimahin ka hriat chinah pawh - Aizawl hi 1986 velah kha chuan eng a la nilo; hma hi kan sawn nasa lutuk a ni kawng tin rengin; mimal te, building te, kalkawng te chitin rengin hma kan sawn a ni. Chu tak chu - *Lalna leh Thuneihna* kan chuh nat lutukna lamah Mizo rilru kan ti hrisel lova, kohhrante rilru pawh kan ti hrisel lova; thiltha reng reng sawi duh lo.

Tak takah chuan - Aizawl tawt lutuk pawh kan hria; AR Khatla pawh kan hria a, sipai ram zau takah kan office pawimawh zawng zawng tuin nge pe? Kan Chief Minister zahawm tak tih a ni. Mahse, ti miah loa sawi tute nge le? Mizo mipui hmaa ti miah lo, chapo taka au aute hi tute nge an nih? 'Finance enkawl thiam lo' tih te chu, fa nei ngai lovin fa neih enkawl dan sawi tlawr dup sela, fa nei tawhte chuan fa enkawl harzia kan hria a, kan ngawi a ni. Chuvang chuan, mipui hi kan bum na lutuk deuh a. Mizoram hi Kristian ram kan ni a, YMA dikna te chawikang leh turin eng party pawh hian kan tawng dan hi fimkhur deuh a ngaiin ka hria, chulai takah chuan.

A enga pawh nise, Pu Chairman, he budget hi a tha ka ti a, mipui budget a ni. SEDP kan sem chho zel; zirlai tan tiin fee pawh kan pelet. Tin, mirethei tan healthcare kan ti a, chutiang chuan, job-card pawh ni 100-ah Ni 100; he budget hi mirethei budget a ni si a. Zirlai budget a ni a, thalai budget a ni. Sorkar hnathawk budget a ni a, kan zavai budget, kan that tlanna tura tih a ni a, Pathianin mal pawh sawm se ka duh a ni. Ka lawm e.

CHAIRMAN : Tunge han sawi leh ang? Awle, Dr. Vanlaltanpuia.

DR. VANLALTANPUIA : Pu Chairman, ka lawm e.

Ni. 13.2.2023-a kan Chief Minister zahawm tak Finance changtu ina Mizoram ram pumpui pawisa hman tur cheng vaibelchhe 14,209.95 a rawn pharh hi lawmawm ka ti a, hei hi han thual ve ka duh deuh a. Ka thusawi tur hi point li-nga velin then ka duh a.

Pakhatna-ah chuan budget data kan CM-in a rawn pharh taka a pawimawh zual, mipuite hriat atan leh he House-a han sawichhuah ka duhte a awm a. *Pahnihna*-ah chuan mipui puala hope (beiseina) tha tak tak he budget a awmte tihlan ka duh a. Tin, leiba chungchang tlema zawng tarlan ve ka duh bawk a. Kha, ka thianpa Mathlantea khan, 'Covid chhuanlam awih loh' a ti a, mahse data atanga ka hmuh phak tawh chinah Covid ina kan economy leh kan budget a nghawng dante han tarlan ka duh a. Tin, a tawp berah chuan, roreltu kan nih angin, helai hmunah hian inhniala thiamchanna thute sawi ringawt tur kan ni lova. Kan ram tana tha tur kan relchhuak tur a ni a, chuta tana

challenges (chona) awm theite, ram rorel tute tan pawha thil pawimawh nia ka hriatte han tarlan ka duh a.

Pu Chairman, budget hi a har em em mai a, keini ang duang ina intithiam taka han sawi te pawh hi a fuh berin ka hre lova; thil complex tak a ni a. Amaherawhchu, tarlan dan awlsam ber, mipui pawhin an hriat theih dan tur awlsam ber chu – ‘receipt leh expenditure’ hi a ni mai a, chhungkua enkawl na ang chiah hi a ni a. ‘Engzat nge kan chhungkua ina kan lakluh a; engzat nge kan hmanralna tur?’ tih hi a pawimawh chu a ni mai a. *Receipt*-ah hian, tun tumah hian thil lawmawm deuh pakhat chu, ‘revenue surplus’ an ti a; mak deuh chu, ‘surplus’ tih awmzia chu ‘a chuangliam’ tihna a ni mai a; ‘kum danga kan mamawh thin aia tam, kan hmuh thin aia tam *surplus* kan hmu a ni’ tih hi a ni a. Chu chu - cheng vaibelchhe 417.87 hi tun tum BE-ah hian revenue surplus nei tura chhut a ni a, hei hi thil lawmawm tak a ni a. A chhan ber nia lang tlang deuha sawi chuan, NE State hote hi thawhchhuah nei tlem kan ni a, central atanga grant kan dawn tam hi surplus min petu chu a ni deuh mai a, tax devolution te, State owned-tax leh non-tax revenue te, ULB leh RLB enkawl na tur te, CSS atanga kan hmuh turte leh disaster fund atanga kan hmuh turte; tin, ‘deficit grant’ kan tih te ho hi kan hmuhna lar zual chu a ni a.

Tichuan, budget buaipuitute tana thil buaithlak tak, a lohtheih si loh chu ‘expenditure’ hi a ni a. Kumina kan expenditure-ah hian thil lar zual ho chu - salary and wages te, pension te, medical treatment te, minor works te, GIA non-salary te, loans and advances te, repayment - kan loan puk rulh lehna tur te, interest payment te, establishment cost te, other charges te leh investment te hi kan ngaihtuah tur tul kal sa an ni. chhungkua kan ni a, chhungkua inenkawl dawn chuan gas chhit tur leh eng chhit turte neih a ngai a, khatianga thil tul sa ho kha a ni a. Tichuan, thil pawimawh deuh, mipui pawhin kan a hriat tura chu - kan thawhchhuah hi kan expenditure aia a tlem zawk chuan, ‘puk a ngai’ tih a ni mai a. Chuvang chuan, keini ang State rethei tan chuan puk lo thei lo dinhmunah kan ding ta thin a, khawi state mah hi leiba neilo an awm lo hrim hrim a.

Pu Chairman, hei hei hi RBI data thar ber kha a ni a. Hetah kan leiba hi tun dinhmun, 2022-ah hian, RE ah cheng vaibelchhe 11,667 a ni a. Kan sawi kan sawi thin a, kan sawi dan a kha a inang lo thei a.

(Hon. Dy. Speaker-in Chair a la a..)

Pu Dy. Speaker, leiba hi state dangte pawh hian lo ba nasa em em mai a, keini hian cheng baibelchhe 11,000 vel kan bat lai hian vaibelchhe nuai 6 te, vaibelchhe nuai 4 te, vaibelchhe nuai 5 ba te an awm a ni. Chuvang chuan, leiba hi insawithiam pawh a ni chuang lova, amaherawh chu Mizoram pawhin ba kan nei a, state dang pawhin ba an nei a ni tih hi hriat ve tho a ngai a; amaherawhchu, chu chu kan inghahna tur a ni lova.

Kan ram kal zelah leiba hi phurrit anih theih avangin, ‘a titlem zawnga kan awm char char a ngai a ni’ tih hi. Chutiang atan chuan mipui pawh inzirtir ila. Chhiah te kan la dawn anih pawhin, chung te chu ram revenue pawimawh anih avangin, sawisel a, *political ball* atana hmanga invuak invuak te hi thil tha a ni lo a ni. Amaherawh chu, state dangte ang bawkin Mizoram pawh hian leiba kan nei ve a, a tihlem erawh chu ‘ram hruaitu te ina kan tih ngei ngei tur a ni’ tih hi kan hriat a tha a ni.

Mipuite tana hlimna tur *interesting notes* tlemte han sawi ka duh a. Tun tumah hian Mizoram inenkawl naah hian hnawk nuai leh inenkawl thiamlo anga tih hi a ni lova, kan ram resource - thil hlu kan neih te, sum leh pai kan neihte hi uluk taka vawng turin Mizoram Resource Mobilization Committee din a ni a, heng te hian sorkar sum bawmah tun kum kal mekah hian ‘cheng vaibelchhe 35.74 an chung lut tawh a ni’ tih te hi mipuite hian kan hriat a tha a. ‘Sorkar hian sorkar sum hi uluk takin kan enkawl a ni’ tih hi min hriat sak ka duh a ni. Tin, uluk zawka kan pawisa te hman anih theih naturin leh, awmze neia management kan tih theihna turin IFMIS, (Integrated Financial Management Information) din a ni a, hei hian pay roll te, bill preparation te, submission te, pension te, leiba chungchang te leh Budget and Accounts Management atan tea tangkai taka hman turin online apps-a siam a, heng te hian kan sorkar hi a tiropui em emin, kan budget management hi ‘uluk takin kan kalpui a ni’ tih kan hriat a tha a ni.

Tin, sawi leh ka duh chu Pu Dy. Speaker, hna thar kan thawhna tur capital expenditure-ah hian thil lawmawm em em kan hmu a, (ka hun hi a liam mai dawn a, ka sawi zo hman dawn lov, ka inbuatsaihna hrang hrang hi) Chuvang chuan, mipuite’n kan hriat tur chu - hnathar, Mizoram-a la awm ngai lo thawhnatur hi kan budget zawng zawng atanga 21.9% a awm a ni. Hei hi a lawmawm lutuk a. Chuvang chuan, kan bial enkawl theuhah te hian hna thar nasa tak hi kan thawk dawn a ni. Tuna kal lai mekah pawh hian cheng vaibelchhe 497 hi kan insem mek a, chutiang zel chuan kumtharah pawh hian cheng vaibelchhe 500 pek kan ni leh tawh bawk a. SASCI ‘Special Assistant to State for Capital Investment’ an ti a, hemi atang hian Mizoram-a hnathar capital investment thawhna tur hi ropui takin kan kalpui dawn a ni.

Pu Dy. Speaker, ka sawi zo hman dawn lo hle mai a, kan leiba chungchang kha chu tawitein ka sawi tawh a. Engpawh nise, ka thutawpna atan ka sawi duh chu - Kan revenue leh expenditure hi a inmil loh thin avangin kan expenditure a tam thin a, hei hi kan ven hram hram a ngai a. Chumi atan chuan revenue tihpun hi kan tum ngar ngar tur a lo ni ta a ni. Chuvang chuan, he House zahawm takah pawh hian nichina ka sawi tak ang khan, thiamthu sawi mai mai lovin, ‘engnge kan hmasawanna tur chu’ tiin kan sawichhuak tur a ni a, heng budget speech-ah te pawh hian kan sawi lan tur niin ka hria. Chung Mizoram lokal leh tur atana thil pawimawh zual points ho, kan budget ti ziaawm tur nia ka ngaih ho hi sawichhuah ka duh a. Chungah chuan, *entitlement* official te hnena kan pek ho te pawh hi tih ziaawma, ennawn a ngai hlein ka hria a. Tin, department thenkhat hlawk lo lutuk ang te hi chu cooperatize ni ta sela a thain ka hria a, state

dangah pawh kalpui a ni a. Tin, post creation tihltlem te, LSC leh house pass pek tam a ngai em em a, heta tanga chhiah kan lak tur te tihpun a ngai a.

Tin department spending, kan department ten pawisa an hman hoa hi priority set thiam a ngai hlein ka hria a, Pu Dy. Speaker. Ka han sawi duh chu - ATL Road a chhia a, kan au luai-luai a, nikum fur lai te pawhin ‘dil ang a ni e’ tih te pawhin; tui tling te thla kan la a, mahse tunhnai ka va kal pawhin ATL Road ah chuan, a chhuat siamna ai mah mah chuan retaining wall te an lo siam leh khup mai a ni. Chuvang chuan, kan spending hrim hrim hi prioritise a ngai tak zet zetin ka hria a. Sorkar sum hi a nilo zawnga kalpui a tamin ka hria a. Kan labour cess tlingkhawm te hi tangkai zawka hman te leh, *new pension scheme*-a luh vat te hi tulin ka hria a. Party thenkkhatin Pu Dy. Speaker, ‘*old pension scheme*-ah kan lut dawn’ an han tih te hi a mak ka ti; Mizoram tan hei hi thil tha niin ka hre lo. Tin, kan fiscal deposit hi tihhniam char-char ngaiin ka hre bawka. Tin, thalaite tan job opportunities - hna remchang siamsak hi kan tih tur niin ka hria.

He kan budget, kan Chief Minister ina heti zat a rawn pharh hi ‘a lawmawm kati em em a ni’ tih kha ka han sawi duh a ni e. Ka lawm e.

DEPUTY SPEAKER : Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Dy. Speaker, hei, tun term atan budget session hnunung ber kan han neiha kan han tel ve thei hi lawmawm ka ti a. Chutih rual chuan he kan sorkar hman mek hi dinglama miten, ‘kan ngaih dan a inang lo’ an tih ang deuh khan, kan hmuh dan leh kan pawm dan hi a inang lo khawp mai a.

Hei, kum 5 budget - 2019-20 te, 20-21 te, 21-22 te 22-23 te, 23-24 te vawiinah kan sawiho a ni a. He sorkar alo pian atanga vawiinni thlenga kan kal chhohnaah hian mipui lam hawi leh, he sorkar hian zoram chhanchhuahna tur budget hi ‘a siam lo a ni’ keini chuan kan ti lo thei lova. Vawiina kan *Demand for Grant* te kha en ila, hnathawhna tur Central Sponsor Scheme (CSS) tih bak kha a awm tam lo khawp a ni.

Tichuan, Finance Deptt. ah hian nikum lamah pawh khan ka sawi tawh a, ‘*financial dictator sorkar* kan hrawn a ni’ tih kha ka sawi tawh a. Kuminah pawh hian Finance Deptt. ringawtah pawh hian a nuaia nuai 3,27,474.79 hi park (dahkhawm) a ni leh a. Tunah hian kan han sawi tliar-tliar a, ‘SEDP - cheng nuai 595 kan nei’ kan ti a, khangte pawh kha Health Deptt - Healthcare pawisa tur cheng nuai 50 leh helaia sectoral location-a kha han locate ve mai awm a nih laiin, finance-ah park vek a ni a. Chutiang chuan SEDP kha kan kal chhoh pui mek a ni a, kan kal tawh zia pawh a ni a. Vawiinah hian kan kalphung, he kum 5 chhung kan kalna budget kan sawiho tawhna leh kan kalpuinaah hian, hotupa ber, finance minister leh chief minister ni bawkin a hmaah a

dah teuh mai a, a awm ang ang kha a tithiam deuh leh a be thiam deuh chan kha chu 'nang helamah' tih ang deuhin, a be thiam mang lo tan chuan hnathawhna tur, 'hmasawanna hmuh tur a tlem hle a ni' tih a lang chiang hle a.

Tin, ka hmaa mi thenkhatin an sawi tawh a, tin, nikum khan hlawh chungchang pawh ka sawi tawh a, "hlawh daih lovin in dah a ni; hei hi chu a dik lo e" ka ti a. Nikum Supplementary Demand, 2022-2023 kan Chief Minister zahawm takin he house-ah a rawn pharh takah khan, department 28 ngawtah hlawh pek belh a ni. Finance Department lam hian 5th May ah khan 'sum leh hlawh tur hi a daih a ni; a chuang dawn' an ti a, mahse Supplementary Demand kan en chuan cheng vaibelchhe 151 chuanga kha hlawh atan pek belh a ni.

A bik takin Pu Dy. Speaker, nang leh kei chu District Council-a awm kan ni a, Autonomous Council, ADC ho ah khian nikuma hlawh an indaihlohna ringawt pawh - Lai District-ah cheng nuai 2,317 RE-ah pek belh a ni. Budget Session kan neih lai khan, "hei hi a dik lo e; hlawh daih tur nikum RE pawh daih lovin in dah a, hlawh daih loh saa dah hi a fel lo a ni" kan ti a, mahse siam that a ni ta chuang lova, kum tawpah hlawh na na na chu pek loh theih loh a ni a, hlawh chu han pe a, pekna hnu hma pawh kan hmu vek mai a.

Tichuan, kuminah pawh hian department 21-ah nikum RE aia tam kha a awm ve a, a bak department 26-ah phei chuan indaih loh saa dah a ni. Law & Judicial Department-ah te hian nikum 2023 RE phak lohna hi cheng nuai 575.40; Social Welfare-ah cheng nuai 571.3; Environment & Forest-ah pawh cheng nuai 490.64; Power & Electricity-ah cheng nuai 423.81; PWD-ah cheng nuai 469.51, khatiang khan department 26 zet maiah nikum RE phak lo khan budget kan siamsak a, hlawh kan dah sak leh chu a ni a. Helaiah hian revenue expenditure tur leh capital expenditure tur, a show mawi nan Revenue Expenditure-ah kan dah tam a, Capital Expenditure-ah kan rawn dah pung ve leh deuh a. Chumi awmzia chu - vawiina kan hlawhte helai budget speech-a kan hmuh angin, kan hlawh ho te chu revenue section-a pek tur a ni a, heta a lan dan chuan 78.10 a ni.

Amaherawhchu, nakum budget session-ah chuan RE-ah hlawh kan indaihlohna hi a rawn pe leh dawn a, pek loh theih a ni dawn lova, chu chu vawiinah hian he budget pharh meka pawh hi chutiang chuan hei hi kan lo kalphung a ni hi a fel lo ka ti a. A nihna takah chuan SEDP kan dah anih pawhin deparment hrang hrang helaia kan sem ang hian sem mai tur a ni a, kan budget-ah khan locate mai tur a ni. 'Healthcare-ah vaibelchhe 50 kan dah' kan ti a, Health Deptt-ah hmuh tur a awm lo; lottery atanga an hlep ve tur cheng vaibelchhe 10 erawh kha chu healthcare-ah a lang a ni. Kan *Demand for Grant* kha keu ila, SEDP kha *Nil* vek a ni. Department-ah a awm lo reng reng.

Tichuan, a tla chawpin ro kan rel leh dawn a, pawisa kan pek leh danah pawh duhsak zawngte hnenah kan pe tam ang a, thenah chuan kan pe tlem leh dawn niin a lang a ni. Pu Dy. Speaker, hei hi chiang takin a lang a ni. He sorkar hian ram leh mipuite ei leh bara kan intodelhna tur leh, keimahni atanga kan mipuite kan lo dinchhuah ve theihna tur ruahmanna ‘a nei lo a ni’ tih hi a lang chiang hlein ka hria. AH & Vety department te, Agriculture te, Horticulture te leh Fisheries- Deptt-te hi kan ei leh bara kan intodelh ve na tur a ni a, heta budget-ah hian engmah a awm lo a ni. Agriculture-ah hian central sponsor scheme (CSS) atangin vaibelchhe 20,000/- vel hmuh tur an nei a, chung te chu kan hun lai pawhin a lo kal tawh; FOCUS, RKVY tih te bakah thil dang hrang-hrang central sponsor scheme te a ni; state fund, state budget atang hian dah a awm lo a ni.

Pu Dy. Speaker, hei hian he sorkar ina zoram hmasawna, ei leh bara kan intodelhna tur te, a ram mipuite kan dinchhuah vena tur kawng ruahmanna te a awm lo a ni. SEDP kan sawi hma hmain, ‘Covid vang a ni e’ kan ti. 2019 – 2020 ah khan covid-a la awm lo, khatah khan cheng vaibelchhe 750 dah a ni a, family-oriented ah chengkhat mah hman a ni lova, kan duhsak zawngte siam nan restricted tender-in a remchan channaah kan nam liam a. Ka hmaa sawi tawh - Airport te pawh central-ah project siamin dil ila, helai kan state pawisa lo hmuh tawh sa hi chu ei leh bara kan intodelh theihna atan te, lei-rem kan lo rah ve theihna tur atan te ni se a that teh reng nen. Tin, ‘Hortoki - Meidum ah ONGC-in oil an zawng a’ tih te pawh kan chhuanlam a, restricted tender-in nuai sang tam tak kan pe a ni. RTI nikum lama an zawhna chhannah chuan, an licence te pawh thla 8 lai renew tawh lo a ni a, hna pawh an thawk tawh lo. Tin, a hria ten an sawi danah chuan, hetianga company-in a oil an zawn nan emaw, hna an thawhna hmunah emaw hian a company te khan an mahni kalna tur chu an inruahman mai thin nia sawi te pawh a awm a ni.

Pu Speaker, vawiinah hian kan leiba chungchang te ka hma miten an sawi a, leiba hrim hrima kha kan va support emaw tih mai turin kan ngaithla a, vawiinah hian kan budget hi cheng vaibelchhe 14,209.25 a nih lain, kan leiba chu 13,854.80 a ni. Kan budget aia kan leiba a tlemna hi 625 chauh a ni. Pu Speaker, nakumah phei chuan kan budget zat aia tam leiba, he sorkar hi a kal zel anih chuan a awm dawn a ni. Vawiinah hian SASCI te kan sawi a, a lawmawm ka ti. Tuna kan leiba sawi mai lovin, kum 5 atanga kum 50 hnua piang turte tan pawh leiba hi kan hnutchhiah a ni. Amaherawhchu, chu leiba kan hnuhchhiah chu kan hmuh ang takin kan invest tur a ni; tihpun tum tur a ni. Vawiin nia kan kalpui danah hian Pu Dy. Speaker, kum tawpa kan inthlanna tur - election-oriented in kan kalpui a, hei hi kan hmuh dan a ni lo. Kan leiba tipungtu anih lai hian, election oriented-ah kan hmang a. Asset leh revenue earn theih tur, pawisa lo let leh thei tur, “kum 50 chhung tan he project hi kan siam ang a, chung chu kan ti ang a, chuta tanga lokal zelah chuan vawiin ni a kan puk nuai 497 hi kan rul leh ang a, kum 50 a lo kal hnua chuan hei hi a lo changkang tawh ang” tih lam ruahmanna a awm lo hi a vanduai thlak ka ti a ni.

Pu Dy. Speaker, kan Finance Minister khan darkar khat dawn a present a, minute 10 kan sawi bik a, a tlem a ni; kan kham lo chu a nih hi.
Engpawh nisela, Pu Dy. Speaker, ka ti tawp dawn ang a.

Leiba kan neih hi kan invest anih chuan, a tha; a lo let leh dawn a, a pung dawn anih chuan, a tha. Amaherawhchu, vawiin niah khatiang let tur awm lovin tun sorkarah ringawt hian vaibelchhe 6,000 vel leiba a nei hman a ni. Congress sorkar kal ta atanga vawiin ni inkarah khan cheng vaibelchhe 6,000 chuang leiba kan siam hman hi; hei hi, ‘sum leh pai enkawl thiam finance minister kan nei’ kan la ti thei em ni?

Pu Dy. Speaker, a tawp nan - Sap thufing pakhat chuan - “*Beram-in Sakeibaknei rual a hruai ai chuan, Sakeibaknei-in beram rual a hruai a tha zawk e. Hruaitu tha a pawimawh a ni.*” an lo ti ngai a ni. Pu Dy. Speaker, ka lawm e.

DEPUTY SPEAKER : Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Dy. Speaker, ka lawm e.

Vawiinniah 8th Mizoram Legislative Assembly-a kan Budget Session hnukung ber sawihona kan nei mek a ni a. Hemi zawhah hi chuan kum tawpah inthlan te kan nei dawn tawh a. 8th Mizoram Legislative Assembly chhungah member thar kan hmehhriat ngai loh, thian tha tak takah te kan han siam a. Kum tawp election lo awm leh turah an zavaiin duhsakna ka hlan hmasa a ni.

Pu Dy. Speaker, kan budget bu hi a pan hleng-hlawng viau mai a, kan Finance Minister hian sawi tur a nei tlem hle tih hi a chiang a ni. A bu hi kan han keu a, thu tak fun, kan ram hmasawna tur ang vision, ‘hei hi, hemi pawisa atang hian kal kal dawn a, chumi chuan mi retheite kan khai chhuak ang’ tih lam hi pakhatmah a awm lo a ni. Kum tina kan sawi angin, budget session apiangin kei chuan ka sawi a, “Mizoram sawrkarah hian vision a awm lova, kan State budget hi awmze neilo, mipuite tana hlawkna awm lo a ni,” ka ti thin a ni. Ministerte *Demand for Grant* kan han keu a, kum 4 chhung, tun hi kum 5-na a ni ta; Pu Deputy Speaker, kan Minister-te hian an hnathawhna tur pawisa hi an department-ah an nei lo reng reng. Helaiyah member ten an hnathawhna tur kan vote pui tur a nih laiin, vote pui lohvin hetah an in park a, a thei fa-in an han dil a, ‘a khawnpuia mi ka lakchhuah’ tiin intihtheih nan te an hmang a; a hnuah Supplementary Demand-ah kan sawifel leh a ngai si a ni.

Tuna kan budget hi kan Minister pakhat phei chuan heti hian a sawi a, “file-ah, ‘*hnathawh tir min tum lo a ni maw?*’ tiin ka ziaq tawp” a ti. Chutiang khawp chuan a chhunga thawktu minister-te pawh hian he budget hi chu an kham-khawp lo a ni. MLA-te tan pawh han sawi mawi vak ngaihna kha a awm lo reng reng a ni.

Amaherawhchu, kum dang ang lo takin, Pu Dy. Speaker, he kumin budget-a a awm chhun-chhun hi wawiina kan sorkar te hian an khawih ve hman dawn tlat lo. Kan kalphung ka han en a, party worker tam tak te hian an lo thlir ve a; he budget khawitu tur chu keimahni hi kan ni tlat tawh, nakumah kan rawn khawih dawn a ni. Han en ila, hmasawnnna an tih chhuna te hi SEDP pawisa te kha a la ni tlat.

Hmanniah sorkar anga hmasawnnna New Market building lian tak sak chungchang an rawn sawi a, ‘khawia pawisa nge?’ kan ti a, ‘NEDP pawisa’; SEDP pawisaa project lian tak thawk hi hmuh tur a awm lo a ni. Kan Chief Minister zahawm tak khan Governor Speech a windup-naah khan a rawn sawi a – “Kum 2019 kan rawn sorkar tira sum tam si” tiin, nuam a tihzia kha hahipin a rawn sawi a ni. Khata a rawn sawi theihna chhan kha engnge? Congress sorkarin uluk takin sum kan enkawl a, leiba atanga bul tanin, sorkar thar leha finance minister pawhin sum tam zia hahipa sawi thei turin pawisa kan hnutchhiah tlat mai a ni. Chung te chu an nawm, an makin an han chen a, an chawm bawk a; kum 4 a liam meuh chuan MLA zawng zawng, minister zawng zawngin sum harsat zia an sawi ta luai-luai mai a ni. Hei hian a entir chu - sawrkar tha, sum enkawl thiam, hmasawnnna tam tak siamtu Congress sorkar bawk kha ‘Zoram mipui nghak fak a ni’ tih hi, Pu Dy. Speaker, wawiinah ka rawn sawi duh a ni.

Kan sorkar hian vision a neih loh zia chu, nichinah kan member pakhatin a sawi ang khan matching share-ah kan han dah teuh ringawt mai a ni. Kan budget atangin ‘hei hi kan ti dawn; chu chu kan ti dawn’ tih a awm lo. Central sorkarin scheme a lo neih takin, a do let nan kan dah khawl, kan peipung e kan ti. Central sorkar, vai ho ina India ram puma an scheme-ah kan ram hi kan innghat a nih chu maw le! He lai ve riang-ruangah member 40 kan awm a, kan ram kalphung tur chu kan ngaihtuah ve dawn lawm ni? A zahthlak a ni. policy nei lovin central sorkar policy-ah kan sum neih zawng zawng *matching share* atan kan han ti ngawt te hi a buaithlak a ni tih kha ka han sawi duh a ni.

Hei, kum li, kum ngana kan kal dawn a, sorkar hnathawk hlawh kan han la thei lo ringawt a, thla thar Ni 10 a rawn kai dawn a, minister pakhatin, “A hun takah sorkar hnathawk hlawh kan pe dawn,” a rawn ti a. He MNF sorkarah hi chuan sorkar hnathawkte hlawh lak hun tak hi Ni 10-11 te zuk ni a maw le! A mak khawp mai; kan calendar hi an sawi danglam tawp mai a ni. Pu Dy Speaker, kum tawpah kan sorkar dawn a, sorkar hnathawkte a hun takah hlawh an la tawh ang. Chumi piah lamah chuan, an DA te pawh hi kan pe dawn a ni.

Covid avangin harsatna kan han sawi thin a, kan duh lamah chuan kan harsa leh si lo. Thil engkimah kan inhrek a, mahse, sum kan siam tumna lam - Lengpui Airport cheina turah chuan vaibelchhe tam tak kan han dah a; a tu contract ber nge hriatloh, ‘Zoramchhana’ an ti, ‘Kamrula’ an ti; ‘Chief Minister-in a tlawh zing lutuk,’ an ti; a buaithlak a ni. A thawktu tur tender pawh an chhuah hmian thla 5 chhung hna an lo thawk tawh a ni. An thawh mawlh-mawlh tawh hnuah restricted tender an han ti a; Pu

Dy. Speaker, eng sorkar nge kan hrawn le? Chu mai a la ni lo - an han sa chim a, a contractor te hremna kan hmu lo reng reng; action an lak pawh kan hre lo. An sak chim chu thu hran, an han huangtau em em khawp mai a, mipui zin vei-vak tena kan hman tur, bungrua te kan nawrna tur trolley chu cement bag chawh nan te, rod nawr nan te an hmang a, an ti chhe vek a zakthlak khawpin, Zoram mipuiin hei hi an hmu a ni. Insawi mawina chi pawh a ni lo, he tiang hi chu. Heti khawpa contractor te hlaua zah sorkar hi kan hre ngai lo. A zahthlak a ni, Pu Dy. Speaker.

Tin, mak leh deuh mai chu, sorkar thar a lo pian hlima kan tuipui em em mai, *rua leh mau* chungchang Governor Speech-ah a lang ta miah lo mai a. Pu Deputy Speaker, mau leh rua hmanga intodelhna kan sawi thin; ‘kum khatah vawi 3 a tuai ang a, raw hung khat nei chuan garage lo siam nghal rawh u,’ kan tih ang chi te kha kan theihngilh zo ta. Kan beidawng a ni ti rawh u. Kan vision neih mau leh rua hi chu vawiin niah kan vision atangin a tla tlat tawh; kawng chhawng te erawh kan la hmu turah ngai ta ila. Tin, healthcare scheme hi Pu Dy. Speaker, tawitea ka han sawi leh duh chu, kan MLA tamtak te khan a that zia, ‘MNF sorkarin healthcare scheme atan loan kan la dawn a, chuti zat chu an inziak lut a’ an ti a, Pu Dy. Speaker, healthcare scheme- a inziah luh ringawt, pawisa pek theihloh hi thil tha a ni ngai lo, tunah hian mi 23,462 bill an ba a ni. Inziah luh ringawt hi insawitheihna tur a ni ngai em le?

Chu mai ala ni lo, Pu Deputy Speaker; ‘ADB atangin loan kan la dawn a rullhna tur’ an ti; leiba rullhna tur ba kan han puk leh dawn anih chu. Ba rullhna turin kan ba leh dawn, hmundang atangin. Kan nasa lo khawp mai. A sawite pawh engtin nge kan sawi ngam zawk le?

Chuvang chuan, Pu Dy. Speaker, healthcare scheme te hi insawitheihna tur a ni lova. Congress sorkar lai chuan kan siam; mi zawng zawng a huam lo a ni maithei. A pe chhunte chuan leiba an nei lo; bill tha takin an la. Vawiin niah chuan bill la thei si lova healthcare scheme atanga mipui ina an thawh khawmte chu office expenditure-ah te an hmang ta mai mai a nih hi! Hetiang hi ‘healthcare scheme tha’ kan ti thei dawn em ni? Pu Dy. Speaker, hei, kan Finance Minister speech, point 3-naah – ‘Tourism Mart a hlawhtling zel’ an ti a, helaiah hian point khat lek kan Finance Minister-in min lo chhinchhiah sak atana ka duh a chu - kha Tourism Mart an neih tuma mi harsa te te motor an hire sakna bill la pek loh tamtak a awm tih hi an rawn sawi thin a, hengte hi a rang lama pek theih ni se.

Tin, point 4-na hi ka ngaihpawimawh em em chhan chu, ‘department hrang hrangte bank account atangin cheng vaibelchhe 35.74 zet chu sorkar sum-bawmah a lut ve tawh’ tih a ni a; kan department te hian hna an va thawk awm lo ve? Hna thawk lovin department-a kan sum dah luh te hi a pung beiseiin kan hup tun em maw ni le? Hetiang hi chu sorkar tha, finance thiam kalphung tur a ni lo. Department-ah pawisa an pe lut tawh a, chuta pung awm khawm intihteihna atana budget speech-a sawi hi chu

‘financial management thiamlo tak a ni’ tih kha kan han sawi duh a ni. Tin, point 5-naah SEDP - an manifesto-ah ‘nuai thum kan pe dawn’ an ti avangin, keiniin ‘pe hram rawh u’ kan ti a, Opposition te hian an manifesto tih hlawhtlin sak kan tum a, anni hian an tum si lo a ni. Cheng 25,000/- an pekah hian an lungawi em em mai anih chu! “cheng 25,000/- kan pe a, a balance 25000/- kan pe leh dawn’ an ti a, kan inlungual lo khawp mai. Opposition lam hian an manifesto tih hlawhtlin sak turin ‘nuai 3 tal hi pe teh u,’ kan han ti a, an niin, ‘a ni lo, 25,000/- hi a tawk; kan pe tam tawk, an lungawi tawk’ an ti a, ha-hipin an lo sawi ve a, a ngaihna a awm lo. Hmanniah Pu Speaker, zawhnaah a rawn chhuak a, kan bialah te pawh an rawn sem ve a, ‘training kan pe dawn’, an ti a. Nikum krismas hmaa cheng 25,000/- an pek khan training an la pe lova, tunah an hmanng zo vek tawh ang. An hman zawh tawh hnua training inpek hi awmzia a nei lo.

Pu Dy. Speaker, heng an SEDP - family oriented hi mipui harsa zawk ten lei rem an lo rah vea, an lo dinchhuahna tur scheme a ni lo. Election a hnai tawh a, ‘MNF mi leh sa pawisa kan pek chuan an chhuak lo ang’ an ti. Pu Dy. Speaker, hei hi ka sawi duh - ka bialah phei chuan cheng 25,000/- la tawh leh, la la lo hi an rawn lut teuh dawn. Cheng 25,000/- hi la beisei tawk-tawk vanga la awm bet mai-mai an ni. Chuvang chuan, hetiana mipuite hmangaihna thinlung nei programme ni lo hi chu ‘a hlawhtling thei lo’ tih kha kan rawn sawi duh bawk a. Tin, hei SASCI hi nichinah khan an sawi tawh a, a tha ang reng khawp mai a. Hetia a scheme-ah ringawt hi chuan ‘cheng vaibelchhe 200 dah a ni’ an ti a. Kan bialah pawh SASCI hnuaiah retaining wall te an rawn siam ve a, heng hi leiba puk, interest awmlo a ni chungin, kan rulh leh tur tho a ni. Thangthar lo la kal zel tur, nakinah keini chu kan awm tawh lo ang; sorkar lo kal leh zel tur atana *burden* tur a ni. Awmze nei lova harsatna siamtu tur, future-a harsatna siamtu tur a ni a, a paw ka ti khawp mai; financial crisis lo la thleng thei tur a ni.

Tin, kan House leader zahawm takin nakin a wind-up huna min rawn hrilhfhiah tura kan duh chu, point 48-na – ‘kum hmasa lama kan lo tih angin cheng vaibelchhe 5 chu MNF returnees te intundin lehna atan dah a ni’ tih a ni a. ‘*MNF returnees*’ kan tih hian - kan ramah independent suala a tawp thlenga awm, mahse remna leh muanna a lo awm tawh hnua kan hotute hnung zuia lo chhuak te kha ‘returnees’ an ti nge; ramhnua sorkar an awm laia “kan hotute’n independent hi an sual tak tak tawh lo; India nen inbiak rem an tum a, an inbe reng a, awmzia a nei tawh lo” tia rawn chhuak te zawk kha? ‘Returnees’ a tiha hi specific takin min hrilhfhiah turin ka rawn ngen bawk a ni.

Pu Dy. Speaker, hun tha tak min pe a, lawmthu ka sawi a, ka member pui zawng zawngte, nichina a tira ka rawn sawi ang khan, kan budget hnukung ber a ni a, kan kal lehna tur, inthlan kan hmachhawn lehna turah in zavaiiin duhsakna ka hlan vek che u a ni e. Ka lawm e.

DEPUTY SPEAKER : Tunge han sawi leh dawn? Awle, member zahawm tak, Pu Lalduhawma ka sawm e.

PU LALDUHOMA : Pu Dy. Speaker, kan sorkar hi an vannei ka ti khawp mai a. Covid kan tawrh ber kum kha, a lo thlen kum 2021-2022 kha a ni a. Khami kumah khan *devolution of taxes* atanga kan dawn tura kan beisei aia tam daih (a tamna hi vaibelchhe 895 lawih) mai min rawn pe a, kan mangan kum taka heti zat kan beisei phak loh, budget-a pawh a kan pass tel loh kan han dawng hian nasa takin covid kan tawrhna lakah khan min pui a, a lawmawm kati khawp mai a. Tin, MLA ten theihtawp kan chhuah ve a, nuaih 40 theuh kan fund atangin kan sik chhuak a, CM relief fund ah mipui ten theihtawp an chhuah bawk a. Tin, Covid avanga liau-liaua kan hmuh kha cheng vaibelchhe 114 a awm bawk a. Tin, Covid avanga kan kal zelna tur chhawmdawlina atan central sorkarin scheme tha tak mai 'SASCI' a rawn duang a, chuta tang chuan vaibelchhe 997 kan dawng leh tawh a. health grant-ah cheng vaibelchhe 32 kan dawng tawh bawk a. Tin, khami kum khan budget-a kan pass tel miah loh, hmuh kan inrin miah loh cheng vaibelchhe 6,025 supplementary-ah kan han hmu leh a. Heta kan pass tel miah loh, kan dawn leh tak si kha kan budget zatve aia tam 54% a tling a ni. Heng zawng-zawng malsawmna hi Covid khan a rawn keng a. Lehlamah nunna chante kan awm a a pawh hle rualin, Covid avangin kan sorkar hian malsawmna a dawng hnem em em a, thatpuina tham tak meuh hi a dawng a ni.

Chutih laiin Covid atana kan hman kha kum 2021-ah .30% kha a ni mai a, a kum lehah .64% kha a ni a. Kan sorkarin Covid avangin 1% sengso lo va. Chutih laiin kan sorkar hian covid zarah cheng vaibelchhe sang chuang a dawng a, malsawmna ropui tak a ni a. "Covid avangin kan che thei lo" tih hi chu e, a taka thil lo thleng nen hi chuan 'thil inhmeuh lo tak a ni' tih a chiang viauin ka hria.

Tin, chutianga kan hmuh bakah chuan, kan sorkar hian sum puk a uar viau mai a, kum 4 kal ta chhung khan open-market borrowing atangin wawi 33 pawisa pukin vaibelchhe 3,681/- a puk tawh a, thatpuina tham a ni, hei pawh hi. NABARD loan hi wawi 70 la tawhin, cheng vaibelchhe 653/- a dawng tawh a, ADB loan-ah hian vaibelchhe 1004/- ruahman mek a ni leh bawk a. Tin, PM DevINE-ah vaibelchhe 600/- pek kan ni a, PMJVK-ah vaibelchhe 187/- kan dawng tawh a. Tin, kawng siam nan hmanni lawkah cheng vaibelchhe 6,664 min pe leh a, *Digital Mizoram* hnuaiyah vaibelchhe 40 beisei mek kan nei bawk a; JJM te, RUSA te, kan sawi seng lo ang a; heng zawng zawng hi kan budget pangngai piah lama puk leh thil danga kan dawn belh a ni. Chuti chung chuan sorkar dang ten an tih ngai mang miah loh *Consolidated Sinking Fund* - kan reserve fund tih chet loh atana kan duh em em atangin kan sorkar hian cheng vaibelchhe 266/- a lo withdraw leh tawh bawk a. Tin, *Ways and Means Advance* hi nikum khan chawhrualin, nitin cheng vaibelchhe 32 puk ang an ni. Tun kum kal mekah hian nitin cheng vaibelchhe 32 puk ang kan ni; (kan budget bu kha en rawh u).

Tin, overdraft hi wawi 9 a awm tawh bawk a, heng zawng-zawng kan sorkarin sum a *chalai* hi, hmasawn dawrhna tham, a result hmuh tham a tling tawh a ni. Chuti chung chuan kumin kan budget thar tura opening balance kan en chuan cheng

vaibelchhe 640 niin, cheng vaibelchhe 640 leiba sain tunah hian bul kan tan a. Tichuan, kan leibat zat hi helaiah hian kan sawi dan a inang lo fo mai a, Mizoram-ah farmer kan tam ber a, 65% kan ni a. UP-ah chuan chutiang zat chu an awm lo ang a. Mahse Mizoram-a farmer tam ber aia tam daih kha UP ah chuan an awm a ni. Khawi atangin nge kan teh dawn kan tih chuan - *Za zelah* a ni. Leiba leh thil dang ‘fiscal deficit’ kan han tih zawng zawng hi GSDP behchhana sawi tur a ni a. Khawngaih takin Pu Dy. Speaker, he House zahawmna kan maintain-na pawh hi a ni ang a, hetiang ni lo zawng hi chuan i sawi tawh lo hram hram ang u; “mipuite hi i bum tawh lovin, thudik tak i hrilh ang u” tia insawm ka duh a.

Tichuan, ka han short cut ang a. Kan sorkarin an leiba zat an chhut ang hi chu a dik lova, RBI statement hi ka rawn tan chhan dawn a ni. RBI statement a lo chhuak tawh a, chutah chuan, 2020 - 2021 inkarah khan kan leibat hi 42% a ni a, India rama leiba tam ber *pahnihna* kan ni; a chiang a ni hei hi. 2021-22 RBI statement-ah kan leibat hi 56% a ni. India rama leiba tam ber kan ni; phat thu a awm lo. Tun kum kal laiah hian kan leibat hi 55% a ni a, India ramah leiba tam ber *pakhatna* kan ni leh. Engatinge pawn lamah te PR kan siama, he House chhungah wawiinni thlengin ‘leiba tlem ber *pahnihna* ti tea kan la inchhal ngam le? Helaiah hian a dik lova figure ziaik thinin, sawi thin mah ila, RBI hi kan bum ngai loving. Chuvang chuan, kan intehna tur chu ‘RBI hi a ni’ tih hi hria ila.

Tin, tunah hian nikum BE-a kan leibat zat tur kan teh leh tun kan budget thara kan teh a intam hleihna ringawt hi vaibelchhe 1,155 a ni. Kum khat chhungin kan leiba punna tur ringawt ka sawi kha a vai a ni lova, kum 1 chhunga a punna tur a ni; chu chu kan sorkarin a rawn chhawp chhuah a ni. Chuti khawpin kum 1 chhunga kan leiba a pun chuan, “eng sorkar nge kan nih tak le?” tih hi sawi tam a ngai awm lo e.

Kan budget pun vena chhun kan *state-owned tax* tih vel te chu - tui bill, electric bill a pung a, buhfai man a to dawn a, chu chu a ni mai; thil dang development vang a ni lo. ‘Capital outlay’ kan en leh chuan, Pu Dy. Speaker, ram kan intehna tur a ni. Nikum kan phaklohna kha vaibelchhe 1,039 a lo ni ta a. Leiba rulhna tur hi kuminah vaibelchhe 1,442 kan pek ngei ngei a ngai a, hei hi kan paih leh chuan, kan capital outlay-ah hian 11% chauh a bang tawh dawn a ni. 11% hmang hian kan ram hi khawi ram nge kan thlenpui ang le? Hei hi *sorkar chak* awm dan a ni thei em? Nichinah kan ngaithla tawh, kan capital outlay - Agriculture leh allied sector-ah ₹1,00,000 chiah zuk dah a! ₹1,00,000 chuanin tomato hmun pawh kan siam thei dawn em ni? State pakhat ve lem kum khat chhunga ₹1,00,000; a nih hian a ni lova. Kum li chhung hian ei leh bara kan sum ruahman hi a tlahniam char-char; kum tin a la tlahniam char char; hma kan sawn lo; chu chu *facts and figure* atangin a chiang a ni.

Tin, kan ram dinhmun kan tehna pui ber tur chu *GSDP growth rate* a ni a, hei hi khawvelin a ngaih pawimawh em em a ni. Hetah hian Covid lo thlen, kum 2020-2021

ah Covid in min rawn nang tawh a, kan budget session lai pawhin kan sawi tawh a ni. Chutiang a nih chuan, kan harsa dawn tih a hriat reng a, RE ah khan kan GSDP kha dah hniam tawh tur a nih lain, kan la indah sang ta thur-thur a. *Actual* a lo thleng a, tichuan, kan inchhut سوالنا chu cheng vaibelchhe 2,577 a lo tling ta a ni. Chuti khawpa sorkar inchhut سوال thin, a sum deh chhuah zat tur hre hlei thei lo kan hrawn chuan, mipuite tan chuan a buaithlak ngawt ang a. 19% atangin 9% ah kan tla thla a.

Tichuan, 2021-22 kan lo lut ta a, chutah chuan kan BE a tlemna hi vaibelchhe 12,178/- a ni ta a ni. Nikuma kan BE leh kumin a kan BE inthlauhna kha kha a lo ni ta a. Kan GSDP a thanna tur chu, a tlemna tur a ni ka sawi hi; khati zat khan kum khat chhungin a lo tlem ta a, a percent chuan 43% atangin -11% ah kan tla thla ta a ni. ‘-11% chu enge ni?’ tih chuan, GSDP growth kha kan thang miah lova, *zero* pawh kan ni lova, *zero* pawh kan tluk tawh lova, *zero* hnuaiyah khan negative growth -11% in, a hnung tawlh zawngin he ram hi min kalpui a ni. Hei hi chu ‘a rapthlak’ tih loh chi a ni tawh lova, *zero* pawh kan phak tawh lo a ni. Hetiang hi an awm lo ang. Ministry of Finance ina economic survey a rawn tihchhuah thar kan en phei chuan - 2019-20 ah khan -5% kan ni daih tawh a ni. Pawisa khati zo zai dawnga puk bawk si, “engatinge -11% ah hian min tlakpui tak mai le?” tih hi zawhna lian tak a ni. Enga tan nge in hman? Enga tan nge an hman? engatinge kan thanpui loh? engatinge kan product a pun chuan reng reng loh? Chu chu a ni. Tichuan, *negative growth* in tuna kan budget tharah phei chuan Pu Dy. Speaker kan tan a, -9% in tunah hian min tanpui a ni. *Zero* pawh kan pha lova, a back zawnga teh thlak, a hnung tawlh zawng, hmasawn loh dan chhiar thlak a -9% ah kan tawlh thla tawh a ni. Chu chu kum bul kan tanna a ni a, kum tawpah eng takah nge kan luh dawn a hriat lova.

Chutih lai chuan Covid kan chhuan lam a, national-a kan GDP growth -6% a ni. Tunge India ramah hian minus awm ve? National ah 6% a ni a, Nagaland 8%, Meghalaya 8%, Assam phei chu 10% chunglam an ni reng. Chutih laiin keini erawh *minus* in kan kal a, hei hi chu an insawifiah a ngaiin ka ring. Zoram mipuia hian heti zozai pawisa hmang siin insawifel a ngaiin ka ring a ni.

Tin, GSDP hi a dik ngai lova, hei hi thil sawi hrehawm tak a ni. 2014-2015 atang khan a rawn pung thut mai a ni, Congress hun atang khan. Heihi a dik lo hrim hrim a, a chhan chu - budget estimate-ah kan GSDP atangin engkim kan teh a, sang takah kan indah a, actual a lo thleng a khutah kan tlathla leh ziah a, tumah kan bum chuang lova. Mahse budget pass laiin lanmawi kan duh a ni, mipuia hian. GSDP a san chuan pawisa puk theih chin a tam a, chu chu kan thlahlel. Kan fiscal deficit a lan tlem phah a, chu chu kan thlahlel a ni. Chutiang budget hliir chu kan chhawpchuak a. Chuvangin, lanmawi tumna budget; mipui bumna budget; inngah ngam lohna budget; FRBM Act in a phut ang *budget langlang* ni lo, phur taka pass-pui thei lo chi hliir hi kan chhawp a ni.

Tin, 'inflation' ka han sawi leh ang a - thil man tona hi. India ramah chuan thil man to an control a, a tlem tial-tial a, tunah hian 4% chauh a ni tawh a ni. Chutih lai chuan keini chu 8.41%, a let aia tamin Mizoram-ah thil man a to a ni. Chuta kan chhuanlam chu a buah khan a inziak a – 'Ukraine indo vangin crude oil a to' kan ti a Ukraine indonah hian Russia-in a man chanvein India hi oil min lei tir a, keiniin duh tawkin kan hralh chhawng leh a; Ukraine indona hi India hian kan hlawkpui laiin, helaiah 'kan tuar; inflation a san phah' lo tih ve te hi a ziak hi nawhreh atan a tha khawp mai. A ang lo a ni heng hi.

Tichuan, Pu Dy. Speaker, chuti chung-chung chuan old-aged pension 2021 atangin kan pe thei lova, wildlife guard-ho CSS hnuai mi hmannah September thla thleng tunhnaiah an pe niin ka hria a, a bak an la bat sak a. CAMPA hnuai thawkte nikum April atang khan an la bat sak char-char a. Ni khatah ₹380/- chauh hlauh an ni; an khawngaihthlak. Ram hnuai an duty a, chung ho hlauh pawh chu kan pe thei lova, PMGSY contractor ₹150 crore kan ba a, PHE in ₹89 crore, P&E in ₹78 crore, pension pek tur ₹ 85 crore an la ba bawk a, Healthcare hnuai mi 23,462 hnenah ₹65 crore bat a ni a, Police TA/DA engmah kan pe thei lo bawk.

A tawpna atana ka sawi duh chu - Pu Dy. Speaker, tunhnaiah Ebenezer hospital-ah khuan Nurse panga hna a ruak a, mi 100 chuangin an dil a ni. Female Attendant hna paruk a ruak a, an hlauh chu thla khatah ₹7,500/- lek; chu chu mi 100 bawrin an dil bawk a ni. Chu chu kan Zoram economy chu a ni. Kan mipuite hi an rethei em em a, hlauh tlem te pawh an inchuh a ni. Chutih lai chuan kan budget kum 5-na kan thlenna turah hian a uaithla zawnga min kalpui hi a pawl em em a, hetiang hi chu han pass tlakah kan ngai thei ngang lo a ni. Ka lawm e.

DEPUTY SPEAKER : Awle, kan budget - general discussion hun chu kan zo dawn hnai tawh a. Kan House Leader zahawm tak Pu Zoramthanga, min khaikhawm sak tur leh, he budget chungchanga sawi tur tul ang angte sawi turin tunah hian ka sawm e.

PU ZORAMTHANGA, CHIEF MINISTER: Pu Dy. Speaker, ka lawm e.

Tun budget kan han present kha kawng chi hrang hrangin kan han thlir tlang a, general discussion kan han nei a, a ngaihnaawm khawp mai a. Thlirna chi hrang hrang atangin kan han thlir a, a fin thlak a. A then phe chu min ti bengvartu leh idea thar min petu tur thil tam tak pawh a awm a ni.

Amaherawhchu, thlir dan chi hrang hrang a awm a, lo te pawh 'an buh a tha em?' han tih chuan, a taka han thlir a awm a, *Chhura buh thlir* a awm a, Chhura-a buh tlira han thlir chuan a tha viau a, a lehlamah chuan, a taka zu thlir chuan a tha vak lo laite pawh a awm a. Chutiang deuh chu a ni a, tuna kan han tih pawh. A sawi hnunung lam

ten an han sawi phei chuan ‘Lal biakna sawiin i tin dial ang u’ tih mai tur ang khan kan chhuah tawh a. Amaherawhchu, khatiang khan kum 40 deuh thaw, kum 30 chuang state-ah pawh kan lo kal tawh a, tin mai ngai kha chuan kan chhuak lo thin zawng a ni a. Vawinah a percentage hliir maia han sawi phei kha chuan mipui tan chuan tihngaihna hi a vang em-em a, hnial ngaihna pawh a awm si lova. Chuvangin, mipui hriatthiam theih tur zawng present hi a ngai ve bawk a.

Ahmasa bera ka han sawi duh chu - he kan budget present turah hian harsatna kan tawh a nasa em-em a, Member zahawm tak ten, ‘Covid hi sawi fo tur pawh a ni tawh lo e; chhuanlam a tling tawh lo’ an ti a. Ram puitling Finance Minister-te inawhhlum thak phahnaa *Covid effect* kha, ‘engmah a ni lo’ tih ngawt kha chu; Champhai-Zote hovin pa pakhat in an den a sawi nep lutuk kha, ‘lung an vawrh leuh-leuh a, an haw mai a lawm’ an tih ang deuh kha a ni a. Mi rama minister-te mahni nunna lakna khawpa an manganpui, khawvela maktaduai ina kan thihpui kha, ‘engmah a ni lo’ tih theih kha a ni lo reng-reng mai a ni.

Keini pawhin a taka kan neih chu - sorkar laipui pawhin ‘in budget-ah hei hi pek theih turin lo dah rawh u; self-taxes ah heti zat hian estimate ah lo dah ula, hetiang hian devolution deficiency-ah lo dah ula’ min tih, kan dah ang thlapa kan han present kha, a takah central-in an tlin ta si lova. Tichuan, budget-a kan han pass kha, a tawpah chuan sorkar laipui, kan sum hmuhna pui ber chuan min pek leh theih siloh avangin, Pu Denga tihdan takah “khulaia kan unaute thusawi sawichhawn hi chu, dawt sawi a awl em mai” a tih ang deuh khan, dawtsawi ang kan chang a. Kan pawisa hmuh kha a tlem ta si a, chu chu ‘a tlem lo e’ tih chi a ni bawk si lova.

Tichuan, a hma 2019-2020 chho budget kal kha chu a la normal a, a ziaawm viau a. (*Hon. Speaker-in Chair a la a.*) 2021 covid-in min nuai atang kha chuan a hautak talh-talh hle a ni. A chhan chu, kum 1 leh thla 10 chhung khan cheng vaibelchhe 2600 - 2700 inkar, ‘hei hi inhmuh tur; budget ah lo dah rawh u’ an tih kha a tlahniam a ni. Kum 2-3 a han nih phei kha chuan, vaibelchhe 3,000 a tling a ni. Kha-kha sorkar laipui atanga kan *share of taxes* leh *devolution deficiency* atanga kan lak kalkhawm, a pui a ni a. Chutih laia keimahni State in kan lak ve thin pangngai - tax emaw, revenue chi hrang-hrang kan lak kha en ila. Lockdown avangin kan dawrte a inkhar thup mai; hotel zawng zawng a inkhar thup mai. Khatiang kara kan loss kha a kum telah khan engzat nge ni ang? Cheng vaibelchhe 3,000/- aia tam a ni ka tih hian, ka chhut rei tulh tulh a, ka lo la chhut tlem a, ‘kha ai khan a tam daih’ ka ti a ni. Amaherawhchu, a hlawma lo lut, belhkhawm theih mang siloh a nih avangin, a ni lo berah cheng vaibelchhe 3,000/- chuang, covid avang hian kan budget-a kan hmuh tur kan hmu lo a ni. Chu chu vawinah hian sawinep theih a ni lo. Cheng vaibelchhe 3,000/- chuang kan hlauh kha vawinah hian lo thleng lehin, ‘Mizoram sorkar ina cheng vaibelchhe 3000 in hloh kha kan pe leh a che u’rawn ti sela, RBI-ahrawn chhunglut leh teh se; tunge bill la lo, tunge GP fund la lo, sem chur-chur tham vaibelchhe 3000 chu a ni. Chu chu a leh lamah kan hloh ngar

ngar a ni a, a sawinep theihloh. Sawinep eng ang mah ila, khawvel hian an awihlo hrim hrim a ni.

Chutiang karah chuan kan ramri buai avanga pawisa kan economy ina a hloh ringawt pawh hi tamtak a ni. Vawk hrilenga kan vawk a sing tel thih avanga kan economy-in a hloh kha a tam a ni. Lirnging pawh khan eng emaw chen chu min effect ngei mai. Tin, chu chang chu a ni lo, kuminah hi a buaithlakna chu, kum danga awm ngai reng-reng lo, expenditure-a kan dah ngai chu - inthlanna atan cheng vaibelchhe 200 dah a ngai a ni. Election Department phei chuan kha aia tam daih kha dah turin min duh a, mahse, “ngawi teh u, kan dah tlem phawt ang a, hman tlem dan ngaihtuah ang u’ kan ti a. Tichuan, theihtawpa kan ip chungin kum danga awm ngai lo cheng vaibelchhe 200 kha kumin expenditure atan dah tel a ngai a, chu pawh chu hautak tak a ni.

Tin, chu chang ni lo - PMGSY te, central sponsor scheme-ah te kum danga min hriatthiam thin kha ‘kumin chu hriatthiam loh tur; release vek tur’ an han ti a, vaibelchhe za tel tam lohtheih lovin, kum danga kan tih loh kha kan release a ngai bawk a. Tichuan, khang zawng-zawng a tlingkhawm nen khan kuminah hian budget kan han present ta a ni a, a hautak khawp mai. Khang kha a percentage-a rawn sawitu tan chuan *chhura buh thlir* khan a thlir mam purh theih mai a. Amaherawhchu, a taka titu tan chuan, a ni hauh lova.

Entirnan: Kan leiba pawh kha, Member ten in sawi kha a dik a. Lehlamah chuan, tuna a hnuhnung kan en chuan, State lian ho chu an leiba a tam em em a ni. India ram State-ah a ba tlem ber chu Sikkim a ni a, tunah hian. A percentage in ka sawi dawn lova, a amount dik tak, an bat kha ka sawi dawn a ni. Sikkim - ₹12982 crore; chu chu ba tlem ber an ni; an state pawh a te a. Mizoram hi a bat tlem lamah *pahnihna* kan ni a, ₹12991 crore, crore 9 velin keini kan ba tam hret a, a tlem ber pahnih kan inzat thuak a ni. Tichuan state te dang pawh en ila - Manipur, Nagaland, Meghalaya, Arunachal te, (State lian tiam lovin) khang ho kha kan aia ba tam vek an ni. Chuvangin, a percentage in sawi eng ang mah ila, a taka kan bat tlem emaw, a tam emaw si chuan, kha kha kan rulh tur chu a ni si a ni. Chuvangin hei hi mipui pawhin kan hriat tur a ni. A dangah te chuan en ila – vaibelchhe ₹10,000/- te, vaibelchhe nuai ₹4 te, vaibelchhe nuai ₹3 te, vaibelchhe nuai ₹5 te, vaibelchhe nuai ₹6 te an ni. Amaherawhchu an state a lian a, khang ho kha chuan an ba tam ang u maw le. Chuvangin, lei bat kha ka ngah ta lutuk a; beidawngin kan awm dawn a nih chuan, khami amount atang chuan keini aia beidawng tur state an va han tam awm em! Amaherawhchu, kha kha chu State tinte kan kal dan, hman atangin kum tin a pung chho zel a ni. Kan sorkar hmasak khan tuna vaibelchhe nuai ₹6 ba te hi vaibelchhe nuai ₹1 a la tling meuh lova, a tam ber pawh kha. Tunah chuan vaibelchhe nuai ₹5, nuai ₹6 an ba tawh a, keini chu vaibelchhe ₹3,000/- tih bawr vel lek a ni. A chhan chu - India financing sytem-a loan-a lak tur, ‘a duh apiang tan a lak theih; amaherawhchu he mi bak chu tih awih loh’ tih min regulate a awm vek a, kha kha kan vaiin kan la vek a ni. Diktak chuan, chuti lutukin kan engto lo, engto ila state hausu pui

hian engah nge maw an bat duh ang le? Amaherawhchu, America pawh pawisa ba tam ber an ni; khawvel financing system-ah hian bat pawh a tam ang a, khata tanga kan invest pawh a tam ang a. Chuvangin, hei hi kan leiba system lo kalna a ni a, eng le khaw le, a takah chuan India ram state zinga aba tlem ber Sikkim aiin keiniin vaibelchhe ₹9-in kan ba tlem deuh. A dang zawng zawng chu – Nagaland leh Manipur, keimahni ang tiat bawr pawh kha keini aia sang vek an ni. A then chu ‘kan let eng emaw zata ba tam an ni e’ tih china kha keini a hmuna kan thlir ve dan chu a ni.

A dawtah chuan SEDP chungchang hi - kan flagship programme a ni a, chuvangin, Pathian zarah a pangngai in sorkar ila chuan, a tir atanga han tan char-char pawh kan duh a. Tin, 2019 ah pawh khan tam deuh SEDP ah kan kalpui hman reng a ni. Amaherawhchu kan hriat theuh angin covid avangin kan sem thei ta miah lova, dam khaw chhuah kan vai tum tlan a ni ringawt mai a, sem thei turah pawh kan inngai tawh lova. Eng emaw a ken tel a chu a awm naa, *family-oriented* chin pheih kha chu kan che ngam tawh lo a ni. Amaherawhchu, tunah a ziaawm ta a, kumin leh nikum atang khan. Khata tang khan, “A, ngawi rawh u, kan duhthusam angin sem thei lo mah ila, family-oriented tal hi chu a bul kan tanna atan i han ti teh ang” kan ti a. Tichuan, “chhungkaw 60,000, inkhatah ₹50,000/- theuhin tan ang” kan ti a. ‘Cheng nuai ₹3 in pe lo’ tih nghal ngawt maia kha chu, a tihngaihna a awm ngang lo a ni. Kan circumstance en hian puitling pangngai tan chuan vawikhatah a tih theih loh tih kha kan hre vek a. Amaherawhchu, hun a lo kal zel ang a, Pathian zarah financial year tharah pawh tuna awm te kan pek chhonzawm bakah, a tharin, eng emaw zah belhin, tuna kan pek te pawh pek belh zel bawkin SEDP hi kalpuia, mipuite development atan pawh tih zel kan tum a ni.

Tin, a dawt lehah chuan, kan budget hi theih tawpin kan han en a, deficit lo hram hrama kal kan tum a, deficit lovin kan expenditure leh receipt lam chu kan han dah hram-hram a, Khata kan hriat fo tura chu - central sorkar a awm a, tute emaw khan central fund sum tam tak an nei a, a zuk be thiam leh a tlawm thiam deuh ina zuk laka, an phal zawng pek kha a ni lova, kan ta a ni a. A be thiamin a zu lak ang idea kha India ram budget leh khawvel budget kalphung a ni lova, kan hre vek a ni; kha ang kha central tum dan pawh ni bawk lo a ni. An niin development fund vaibelchhe nuai tel an dah khu an mahniin a taka an hmanna tur chu - sipai hlawh atan te, establishment expenditure te, defense te; khang kha chu a awm. Amaherawhchu, agriculture te, horticulture te, thildang development atan hmang dawn se, khawiah nge buh chinna tur central-in ram a neih? Ram mel khat bial pawh a nei lo a ni. Chutiang zelin Horticulture kalpuina tur pawh a nei lo a ni. Chuvangin, vaibelchhe nuai tel awma khu state in development atana kan hman tura dah vek a ni.

Amaherawhchu, “chutiang atan chuan kan pawng pek dawn lo che u; in scheme, in project rawn la ula; tin, nangmahni pawhin heti zah hi lo thawh ve teh u, state matching share atan” an ti a. Chutiang chuan project thawn thlain kan zuk ti ta a.

Tichuan, matching share kan pek khan India ram development zawng zawng a pui a ni. central ina harsa taka an hlawhchhuah sa kha kan zuk dil a min pe a ni lo. Kan kawr leh etc. a tax kan pek zawng-zawng tlingkhawm kha central chuan a lo *challai* ringawt a ni; kan ta vek a ni. Chu concept chu political view point nei chuan an hre vek a ni. Mamata Banerji chuan theihtawpin ruling sorkar a bei a, an share chu an la tho a ni. Khatiang chiah khan keini pawh, keimahni fund atanga development han kalpui tak-tak tur chuan, anni chuan vawikhatah crore 10 te, crore 20 te emaw kha minrawn sanction ve a, a doletna - *a-kawihsapir* tur erawh chu 'lo inbuatsaih ve rawh u' min ti a, chu chu kan kal dan a ni. Chuti lo chu, heta kan neih sa tlem te, thlama a chi tur ang kha kangpuak zel ila engnge kan tharchhuah ang? Central-ah project siamin kan zuk la ang a, tichuan a matching share tur hetah kan lo dah ang a, khami hmang khan, 'thum-khat thlai chi khan phur tam tak a tharchhuak thei a ni' tih hriain, chumi system chu a ni mi ram development kal dan. Chuti lo chu, a chi kan-puah zel type kha chu UT system kha a ni a. Chuvangin, tunah erawh chuan 'state dang zawng-zawngte kal angin kan kal ve a ni' tih kha kan hriat a thain ka hria.

Tichuan, kan healthcare scheme te pawh kha an han en a, 'tlin lo chung-chungin kan ti a ni' ka ti a, vawiinah pawh ka la ti reng a ni. Mahse, a tha si a, kan mipui ten an mamawh si a; 'kan tlin hun a awm ang' kan ti a, ti hian kan han kal ta a, Covid nen, mipui hrisellohna nen, an bill kan pek thei lo nen, a vuipui tute nen. Vuipui pawh a dik baw si a, kan pe thei miao si lova; a hahthlak khawp mai. Chuvangin, kan mangang a, Asian Development Bank kan han dil ta a ni. 'Engah nge heti khawpa leiba nei si in puk leh?' an tih khan, lehlamah chuan, 'ngawi teh u, vaibelchhe 1000 kan han lak turah khan vaibelchhe 720 chu India in a thlawnin a pe dawn a ni a, a man em a ni. A dang 200 chuanga kha 'lo thawh ve rawh u,' an ti chauh a ni, a neitu khan. Chuvangin, vaibelchhe 700 chuang zet mai, an tihfuh chuan chu aia tam pawh khan a la hisap theih kha central-in a thlawna min rulhsak tur kan hmuh tura kha, han sawisel ngaihna hi a vang em em a ni. Chuvangin, kha kha a lo chhuah chuan, kan ram mipuite tan. Dik tak chuan, 'puk' pawh a ni lova, India in min rulhsak dawn a, 'vaibelchhe 200 vel tal hi chu rul ve rawh u' min ti a, kan pek tur tho-tho ah khan, chu chauh zawk chu a ni; 'puk' tiha han sawi chi vak pawh a ni lo. Amaherawhchu, India chuan a puk dawn a, amahin a rul dawn baw a, kan rulh tur chu hei te chauh hi a ni. Chuvangin, kha kha leh lamah chuan, 'puk ringawt mai' tia thil hlauhpuai anga sawia kha a dik lo e, mipuite tan. Hei hi 'puk angin an ti a, Mizo mipuiin an hlau tak tak a ni' ti sela chuan, min petu Asian Development Bank khan, 'India sorkarin a rulhsak deuh vek dawn si a, an va hre lo ve; zuk hrilh teh u,' an tih a hlauhawm em em a ni.

Awle, a dawt leh ah chuan – kuminah kan ziaawm tak deuh avangin vaibelchhe 50 leh lottery atanga lo lut vaibelchhe 10 nen a vaiin vaibelchhe 60 kan han dah lui ve leh ngat a ni a, kan nei tlem, kan nei tlemin. Chuvangin, 'kan ba vaibelchhe 65 a ni si a, 60 chauh in dah' a tih kha, Ni e, ngawi rawh u; 700 dang, sang dah lo thleng tura kha kan beisei a tin a ni. Chuvangin, engnge ni, "Vana tanga min chhandamtu chu nghakhlel

takin kan thlir a ni”, tih ang deuh khan, keini pawhin kha crore sang lo thleng tur kha nghakhlel takin kan thlir a. Tuna vaibelchhe 60 emaw kan dah hi chu tuna kan harsat zualna han sut nan harsa chung chungin kan han ti chauh a ni.

Tin, kan budget te hi pawng dah pun thur-thur kan ngam lo khawp a, kan fimkhur a. Tunah pawh SASCI kha en ila, vaibelchhe 200 chauh kan dah a ni. India sorkar chuan SASCI vaibelchhe nuai 1,30,000.00 a dah a, tun kum kal mekah 400 kan dawng a, chu aia tam chu kan hmu ngei tawh ang a. Amaherawhchu, allocation a lo la thleng si lova, ‘A khai, hei zawng a tlem thei ang leh a safe thei angin vaibelchhe 200 hi budget-a kan hmuh turah ila dah ang; ‘A zep pawh kan zep’ kan ti ang nge, ‘kan la insum’ kan ti ang? Amaherawhchu, a taka budget kan present tawh hnuah phei chuan, ‘vaibelchhe 200 tur angin inring phawt mai ang u,’ kan ti a, kan rawn dah hnu khan. A taka allocation kan hmuhah phei chuan vaibelchhe 500 min rawn pe ta a ni. Vaibelchhe 300 khan a rawn khum a, a lawmawm kan ti em em a. Khangte khan kan kalkawngah nasa takin min sutpui kan ring baw a ni.

Tin, ‘sum puk’ hi nichina ka sawi ang khan - NABARD atang te, NCDCREC te, PFC leh OMB atang tein kan puk thin a. Heng hi State kan nih tirh atanga a kal dan reng a ni a, thil thar a ni lo. Chuvangin, Congress sorkar hunlai zawng zawngah pawh India ram State dangte pawhin an tih anga an lo puk thin ang khan, keini pawh kan han sorkar khan India ram state dang ten a an puk thin leh, a puk dan tur India sorkarin a ruat ang khan kan puk chhunzawm zel a, kan rul zel baw a. *Ways & Means* advance ‘vawi chuti zat an puk’ tih te phei kha chu, kan puk zo chauh a, kan rul nghal a; kan puk a, kan rul nghal a. Chu chu State kalphung a ni. Chuvangin, khangte kha han sawi tehchiam tur pawh a awm lova.

Chuvangin, ‘Open Market Borrowing (OMB) ah crore 100 an puk leh ta’ tia aupui vak vak kha, ‘an zunin siamah an zung e’ tih ang a ni a. Open market borrowing tura Govt. of India in ‘puk rawh u’ a tih, state zawng zawngin kan puk an phal anga kan tih kha, thil tisual ang maia aupui vak vaka kha, zunin chu zunna tura siam a ni a, khata va zung thil tisual ang maia aupui vak vak kha a ni lo reng reng; state zawng-zawngin an tihdan, puk teuh pawh tum ila, Govt. of India in a awih chuang lo reng reng. A dan pangngai a awm vek a ni. Chu chu a ni a, 1987 state kan nih atanga kan lo kaldan pangngai kha a ni. A hrela palh kan awm pawhin, hei hi i hria ang u; state dang zawng-zawng pawhin an tihdan tho a ni. Chuvangin, kha kha, thil tisual ta anga aupui chiam kha ‘thil tih tur a ni lo e’ tih kha kan sawi a ni.

Chuti chung chuan harsatna tinreng karah, kan han sawi ang khan Samagra Shiksha Abhiyan-ah te pawh kan theih ang tawkin, kan hlawh a tul si a, kan tipung a, cheng vaibelchhe 91.25 a top-up na atan nen kan han dah a. Green Tribunal-in min duh angin Solid Waste Management-ah vaibelchhe 50 chuang kan han dah a; electricity-ah mipuite eng chhit man kan pekpuina atan vaibelchhe 157 kan han dah a. Tichuan, khang

zawng-zawngte kha a tul si avangin kan theihtawpin kan remkhawm a ni. Kan chapona lam nilo se la, tunah chuan kum 17 dawn lai Finance Minister ka ni ve tawh a, khati chung khan tun tuma kan budget kan han remkhawm hi chu, hmanna ka sawi ang khan *Phung A-Aw chhiar* ang mai khan, ‘*tan bawhah rawh, tan bawh thumah*’ tia remkual remkual a ngai a ni. Chuti chung chuan a har em em a, tun ang hun hi kan han thleng ta a ni a. Khati chen kha kan mualpho pui lova, kan mualpho puia, ‘*a chhe ber chi* ah chuan a chhuak lo ang’ tih kha ring ngam ve ila; a hahthlak khawp a. Congress hunlaia kan mi-dik ber leh kan mi-rin ber pakhat Pu Lalsangzuala Finance Minister a nih lai te pawh khan a mangang lutuk khan, “Damakulha ngunhnamin ka tukhumah hian a tin reng a ni” a ti a, budget speech-ah dah a ni a. Khatiang khan, an ri nak a nih kha! an harsat tum a tam; mahse, an rawn survive chho mai. Khatiang harsatna karah khan kan awm thin.

Keini pawh Covid leh harsatna dang karah khan kan awm thin. Nichina ka sawi ang khan, ‘Covid hnuah pawisa tam tak a lo kal leh tawh tho a lawm’ an ti a; khang rawn kala kha chu, a hmanna tur rawn ti sa a ni. ‘Hemi school sakna tur hi a ni; hemi field laihna tur hi a ni; hemi in sakna tur hi a ni’ tih kha, thil danga han hman ngawt theih a ni lova. ‘First installment rawn pe rawh u’ an ti a, a nihna ang thlapa hman a ngai. A tira kan daih lohna vaibelchhe 3000 chuanga kha chu khami hliama kha chu a la kal reng a. Vawiin thlengin kha kha sawi nep theih a ni reng reng lo. Finance Minister ka nih hnuah ka phur zawng-zawnga rit ber a la ni a, phur ve mah ula, rit in ti ngawt ang, kha kha chu. Chuvangin, khami period kal kha a ni a. Kan sawi ang khan, mi ram finance minister-te pawh inawkhlum hial an lo nih kha. Amaherawhchu, keiniah chuan Pathian tanpuinain kan ti naw-naw a, heti hian kan kal chho thei a, vawiin ni thlengin chaw nghei lovin, tui, electric leh thil dang dang – gas te harsatna nei lovin, development pawh eng emaw chen kalin, hlawh te pawh duhthusam angin, a nikhat niah la thei lo mah ila, khami thla Ni 10-ah emaw Ni 15-ah emaw kan han inpe thei hram-hram a. Kan sawi mawina a ni hauh lova; thla tin erawh chu kan inpe a, a pek ni erawh Ni 1-a kan tih theihlohna chhan chu khutah, *Chemtatrawta* thawnthu ang khan, ‘engatinge’ an tih chuan, Delhi lamin kan state *matching share of taxes* leh thil danga kha a ni takah min rawn pe thei hek lo. Kha kha a bul chu a ni. Min rawn pe se chuan, kan pe ve mai ang. Khulamin min rawn pe thei si lova, kan dahkhawl sa vaibelchhe 3000 chuang lo ba tawh, khami inzui chho avang khan kan dahkhawl sa awm thei si lova, a tlachhawp nen kan kal a ngaih avang leh, thla thara an rawn pek si loh avang khan kan a tlai deuh a, hlawh kan pek hun kha; amaherawhchu, kan theihtawp erawh chuan pek hma kan tum a. Kan pawisa hmuhna pui ber ten a Ni 1 niah min rawn pek theihloh avangin kan tlai deuh thin a, pawu kan tikhawp mai. Chuvangin, thla tina loan pek ngai leh, thil dang thla thara tih ngai te kha chu lo hrethiam turin kan ti a. Bank lam leh thil dangte pawhin, ‘kan hrethiam e; min rulh tho tho chuan, ‘Ni 1-a rulh leh Ni 10-a rulh kha a danglamna a awm lo e’ an ti ve a, chutiang chuan vawiinah hian kan kal a ni.

Chuvang chuan, Pu Speaker, heng ka budget rawn present hi ‘duhthu a sam’ tih rual a ni lova. Kan kal tawk-tawk a, mi state-te pawh an kal tawk-tawk a. Kan han zawt thin a a ziaawm pawl tak, *Ways and Means* advance-ah pawh a la tlem pawl tak North East state harsa ho ah hi chuan kan lo ni zawk mah-mah a, a lawmawm kan ti a. Mahse, chuti chung chuan uang tur chu kan awm hauh lo. Kan tih theih tawk finance thawktute nena theih tawp chhuaha budget kan rawn present hi, kan ram mipuite tan pawh han hmang mah ila thil tha takah a kal ka ring a. Thil hi a buaipui lai chuan a buai thlak khawp a. In sak lai chuan hnawh lutuk hian paw phiar-phuarin kan awm a, ‘heti ringawt mai’ tia thinrim a awl khawp mai. Chuvangin, kan airport chungchang in sawi pawh kha a dik e; a lo hmangtute pawh kan hau ve a, ‘engatinge’ kan ti a, contractor te pawhin ‘keimahni mai kan ni lo, CRP leh Police ho pawhin an hmang ve’ an ti bawk si a. A hmaa kan kalh hnanna room kha kan thiah vek si avangin, a dahna tur a awm tawh si lova, an lo hmang leh thin a. Chuvangin, kan chawi tir vek a, a thar 100 lei turin leh, tunah hian 70 chuang chu siamthatin a awm a, tuna hman khawp chu a awm a. A thar 100 dang kan chawi tir a, tunah hian hei hi kan process mek e. Tuna awm khu hman tham chuan a awm tho e.

Engpawh nise, kan Airport te pawh a la diak a, a khu rum-rum a a hrehawm. Mahsela, kumin kum tawp lam te han thleng sela, a hmelhmang a lo lan chuan, mipui ten “E khai! rin ai daihin a lo tha; chuvangin hei hi chu a man tho e” an tih turin, tha taka, North-East area Airport zingah hian, a aia building tha a awm ka ring lo tunah rih chuan; Guwahati ai pawhin a that ka ring. Chuvangin, khatiang tura kalpui anih avangin theihtawpin kan ti a ni.

Ka han sawi belh lawk duh chu - Pu Speaker, Airport Authority, Delhi lam pawhin “Min pe rawh u, kan kutah rawn hand over rawh u; amaherawhchu, min hand-over pawhin mi hnena kan pek leh in phal tur a ni” min rawn ti sa a. “Ekhai, ngawi teh u, in fanu nupuiah kan nei ang a, midang hnenah kan hralh leh dawn pawhin in rem ti sa tur a ni, ti kan ang tawh em mai’ kan ti a, kan la inpe hleithei lo chu a ni a. India ramin State capital tinah Airport a siam, a enkawl chauh hi state hna a ni a, mi pawhin mak an ti a, entawntlak an tih vena lai pawh a tam. Chuvangin, improve kan tum a, tunah hian crore 100 telin project kan siam a, chu chu reilo teah kan hlawhtlinpui theih pawh kan beisei a.

Aw le, Pu Speaker, Member zahawmtak te thusawite kan chhinchhiah a, nakin zela kan lo enzui tur te pawh a awm a. Vawiinah discussion tha tak kan nei thei hi a lawmawm ka ti hle mai. Ka lawm e.

SPEAKER : Aw le, kan sawihona kan zo ta a. Kan ban hmam - hei, Punjab atangin MLA leh an thuihruai ten kan House hi an lo chhim ve tih ka hrilh duh che u a, an awm bawk a, ka han sawi ang e.

Before concluding our session, I would like to share that the team from Punjab Legislative Assembly led by hon. MLAs, Sandeep Jakhar and Raminder Jit Singh attends this budgetary discussion today here in our Assembly. I hope they enjoy Mizoram during their short stay.

I would like to request our hon. Chief Minister that, I will be happy if you could kindly spare your time for them after this session is over. **(Pu Zoramthanga, Chief Minister:** I will do, Speaker, Sir.) Thank you, Sir.

Aw le, Finance Department hi ka fak duh a. Kan hriat angin G-20 Celebration kha kan hriat hmasakah 1st March a ti tur angin kan hre si a, kan India ram ropui tak G-20 a Chairman Presidency kan nih vawikhatna a ni ve si a. Chumi hre reng chuan kan session hi ti hma turin kan va nawr ta a.

Kan hriat tlan angin, a tlangpuiin 1st February ah central in budget an present thin a, a chep hle thin a; chuti chung chuan Finance Deptt. te ‘an thawkrim em em a ni’ tih ka hria a, kan ngenna - Business Advisory Committee rorel leh kan request te an tihlawhtling a, an thawhrimna ka fak lo theilo a ni.

Awle, vawiina kan Business chu kan zo ta a, naktuk Ni 22. 2. 2023 (Nilaini) zing chawhma lam dar 10:30 ah kan thukhawm leh dawn nia.

Sitting is adjourned. (4:29 PM)